

萬有文庫

第二集七百種

王雲五主編

續行水金鑑

(二十九)

黎世序等纂修



商務印書館發行

萬有文庫

第二集七百種

總編纂者

王雲五

商務印書館發行

續行水金鑑

(九十二)

黎世序等纂修

國學基本叢書

續行水金鑑卷第一百四十一

永定河水章廣七

乾隆二十年正月。會議得方觀承奏。籌辦永定河下口事宜一摺。經軍機大臣。會同工部議覆。以南岸冰窖改移下口後。何以未及三載。遽又請於北岸六工。開隄放水。作爲下口。與原奏內開水勢偏南。未便強之使北。及地廣淤薄。上游易理之處不符。令將現在水勢實在情形。詳明聲覆。伏查南岸冰窖。於乾隆十六年。改爲下口後。連年水勢暢順。趨下甚速。上游河道深通。下汛修防裁省。實屬有益。惟是全河之水。出口渙散。泥淤漸積。加以上年汛水盈丈。挾沙直注。查看下口十里以內。舊積新淤。頓高八尺。致塞去路。至南堰中下汛以下。雖有停淤。而地面寬廣。仍可容蓄。今臣請於北岸六工。開隄放水。令循北堰。導歸沙淀。照舊以鳳河爲尾閭。雖有向南向北之分。其實南北堰水道。本屬相連。惟因七八工之舊河身。橫互於中。畫分兩岸。而踰沙淀以東。則北堰至南堰三十餘里。就下之勢。或分或合。瀾漫一片。原足任其蕩漾也。至水勢偏南。乃未改下口以前之情形。緣彼時南岸所開石草滾壩。多於北岸。水由南洩者多。故河身水道。皆偏側向南。以下口地勢而論。視從前舊南岸外。較之舊北隄外。低三四五六尺不等。今則以南較北。轉高五六尺。安瀾城以下。爲停淤最薄之地。亦較北高二尺許。是水過沙停情形。卽有變易。不得不因勢利導。隨時籌酌。今議於北岸改爲下口。地勢寬廣。足資容納。卽不免水過淤積。亦不致旋濬旋淤。且外堰之外。多屬荒窪。將來並可以籌去路。不比南堰近淀。致多隔礙。臣兩次奏蒙聖訓。遵經逐細查勘。向北改移。

水道仍以南堰下汛爲其歸宿。實與現在情形爲使。堰內應遷房屋。擬卽給價早爲廓清。其疏河培堰諸務。如蒙允准。亦卽一面辦理。仍將下口水道機宜。恭候聖訓。親臨指示。臣益有遵循等因。查永定河水性。原屬無定。但旣查辦。卽當熟籌經久。前次改從南岸冰窖出水之時。該督原稱水勢順暢。趨下甚速。乃甫及三年。新淤頓積。則此番改下口於北岸六工。雖稱不致旋濬旋淤。但較從前是否可以多經年歲。仍令該督詳酌履勘。融會全河形勢。悉心籌畫。毋僅過目前。以致屢請改移。至開挑下口水勢機宜。旣稱恭候聖駕臨幸指示。應如所奏。候旨遵行。所有原奏內稱疏河培堰等工。需用銀兩。一切籌辦之處。統候題咨照例辦理。奉旨依議。永定河志。

乾隆二十一年三月。方觀承奏永定河下口。應築遙堰。以爲北堰重增保障。且於堰北起土。卽成引河。京南瀝水。可循歸舊河。復接築東隄。北過遙堰尾。以杜水勢東越。尋遙堰築成。自永清縣趙百戶營。鳳凰莊。入東安縣果新莊。至武清縣南宮村止。長三十里有奇。河渠志稿。

乾隆二十四年閏六月。奉上諭。據方觀承奏。各屬屢次大雨之後。唐河、沙河、白溝、拒馬諸水。同時並漲。下游悉歸淀內。以至大清河尾閘。不能宣洩。轉由鳳河倒漾。阻遏渾流。而宣化上游。雨後漲發。盆涌旁溢。南岸四工隄頂。漫開數丈。現在馳往確勘等語。入夏以來。直屬大雨時行。各河漲發。而山河上游諸路。亦均得透雨。山水下注。永定河隄堰。致有漫衝。著派安泰、赫爾景額。卽速馳驛前往。看視情形。並留赫爾景額在彼。協同該督。將漫口刻日堵築。毋致再有漫溢。其水過村莊。現在有無淹浸。及應行加恩撫卹之處。著方觀承一面勘明妥辦。一面奏聞。該督職司河道。不能先事預防。著交部照例察議。其疎防之河道各員。

俟查參到日。一并交部察議。永定河志。

是日方觀承奏。永定河南岸四工漫水。係由大孫郭村順固安東界之道溝。趨永清縣城。繞濠而南。循黃家河舊河身入霸州津水窪。流歸勝芳淀內之徑直河。上諭曰。知道了。究以速開引河。堵漫口爲是不可。以其歸淀而緩視之。入淀久則淤泥深。爲害大矣。慎之。純皇帝聖訓。

九月方觀承奏。永定南岸二工之金門閘石壩。長安城草壩。北岸三工之求賢村草壩。皆以分洩上游汛張之水。內長安城一壩。建於乾隆四年。椿朽土裂。難資分洩。是南岸金門閘以下。別無洩路。一遇盛漲。難免迸衝。仰蒙皇上指示。令於三工四工之間。添設減水壩座。臣詳加相度。四工界內地多浮沙。隄外地形過低。未爲合宜。其餘工段。酌籌減河歸宿。而道路甚長。經由村莊太多。不無妨礙。今看得三工宿字八號。北村莊地方。西距金門閘二十里。隄之內地勢相等。河身距隄遠近適合。應於此處建築草壩一座。金門寬十六丈。用大小夯土排築堅實。其減下之水。查隄外東南舊有橫堰一道。應循堰開挑引河。會入金門閘減河。長七百九十五丈。堰內並無村莊。甚爲妥便。至隄外引河。佔用旗民地畝有限。卽於附近河灘淤地內。照數撥補。再東西忙牛減河。河身太窄。減下之水。易致漫溢。應行開展。俾資容納。奉硃批。如所議行。永定河志。

乾隆二十五年七月。方觀承奏。永定河下口。於北隄外籌築遙堰一道。預爲均沙行水之地。自北堰上汛第一號起。東北圈至母豬泊止。共長八十六里。底寬三丈。頂寬一丈。高五七尺不等。又接築鳳河東隄。北過遙堰之尾。長三十二里。底寬一丈。頂寬一丈。均高五尺。經臣於乾隆二十一年三月。奏請聖訓遵行。除

鳳河東隄於二十一年辦竣外。其北堰工程。臣續次詳加相度。應於原估之外。加築高寬。普律底寬五尺。頂寬二丈。均高七尺。除讓出近堰村莊收縮丈尺外。實長一萬四千九百四十九丈。計八十三里零九丈。今遙堰告成。屹然鞏峙。與北堰相距自二里許至七八里。漸寬至三十餘里不等。旣以備將來下口遷改之用。而堰內村莊。並恃遙堰以禦東北一帶瀝水。其堰內瀝水。又有鳳河爲之宣洩。故村民皆樂於趨事。至堰外村莊瀝水。又得遙堰之下引河以爲去路。此引河卽就築堰起工坑坎疏成。通入鳳河。今鳳河間有倒漾之水。並藉引河以爲容納。復輸注於鳳河。是以連年遙堰內外。得免瀝水之患。現在田禾茂盛。臣履勘收工。分交北堰上中下汛員經管。徧栽柳株。隨時修葺。卽爲現在北堰之外障。永定河志。

乾隆二十六年七月十四日。方觀承奏。永定河於七月初八日午刻。盧溝橋長水六尺六寸。金門閘過水三尺。北村草壩過水六寸。北岸求賢草壩過水二尺六寸。至初九日以後。河水雖平。而北岸以外。京南一帶瀝水。滙注甚大。三四工以下。水深四五尺。皆浸泡隄根。霪雨之後。兼值北風衝激。北岸三工。黃字十三號。隄幫間被汕刷。復併入黃字四號。求賢壩減下之水。以致隄頂蟄裂數丈。隨卽加土搶護。奈腳根已虛。於十一日辰刻坍塌。渾水與瀝水通連。八丈有餘。緣此處隄外地面較之河身。不致如南岸之低。溢出之水約祇一二分。全河仍循南岸東趨。並未奪溜。隨於十三日馳赴該處察看情形。坍塌口面已寬至十八丈。溢水無多。軟鑲卽可斷流。現在多集兵夫。連夜搶辦。已有六分工程。河內底水二尺六寸。如不長水。卽可剋期完竣。方敏恪公奏稿。

是月二十七日。方觀承奏。查北岸工漫口。於軟鑲合龍後。內埽外隄。各長六十一丈。並戢隄戢埽等工。已

及一半。限於八月初二日。一律完竣。臣因下口清渾水道。有關緊要。現赴南北堰遙堰周迴。乘船察看。遙堰以內地廣而窪。渾水初經。足資蕩漾。過北堰上汛四十里外。卽清渾相併。所過之地。已間段溜淤。一二三尺。蓋清水盛渾水亦盛。則虞倒漾。清盛渾弱。則易停淤。此時渾水已漸微弱。故水緩沙停而淤速也。俟水勢大落後。臣卽令將下口淤處。大加疏通。仍挽流令歸舊道。方敏恪公奏稿。

乾隆二十七年正月。方觀承奏。永定河北岸三工黃字四號求賢村減水草壩。建於乾隆四年。剝裂朽爛。難以修整。應籌另建於黃字三號。其減下之水。卽就近引入舊壩引河。循隄東去。行據道廳等確切勘估。悉如舊壩成式。金門寬十六丈。壩面海漫寬五丈。並迎水出水。海漫俱用灰土排築堅實。壩下開挑引河。長二百七十五丈。寬十二丈。至八丈六丈不等。接入舊壩引河。並於隄外圈築斜堰一道。長二百九十丈。接連舊壩土堰。則減下之水。不致旁溢。及隄外附近村莊。應俟凌汛後。督令上緊興修。限四月完竣。奉硃批好。如所議行。永定河志。

四月初六日。方觀承奏。永定河下口。上年水勢北齧遙堰。間段淤阻。經臣奏請聖訓。相度疏挑。引歸舊道。今年凌汛大溜。悉以南趨循舊北岸隄根。暢流東注。非值清水全積。與渾水同時並漲。不致有阻遏之虞。臣將下口南北兩堰遙堰。鳳河新舊東隄。及上游之新改求賢草壩。並應挑中泓引河。逐加察看。俱以次興工。交永定河道駐工督辦。方敏恪公奏稿。

閏五月二十九日。方觀承奏。永定河自麥汛以後。陰雨連綿。河水疊次長發。二十三日。夜雨傾盆。河內長水亦祇三四尺。詎鳳河下游。清水驟長至一丈二尺。南堰中汛外。清水與堰頂相平。下汛清水。從堰頂漫

入因清水下阻。以致渾水宣洩不及。旁溢一股至北堰三十四號。又一股至十七號。旋俱斷流。又一股直注十二號。水勢涌起。於二十四日漫出北堰。斜注遙堰。循堰根里許。仍轉向東南。歸入沙淀。去路甚暢。又遙堰外瀝水。自十八九日。連次大雨之後。積與堰平。東西寬四五十里。深六七八九尺不等。復加二十三日夜間大雨。盆河地方。堰身浸透。二十四日午後。平墊四百餘丈。幸地勢向北漸高。故瀝水南趨。而渾水不致北泛。其有漾出堰下。減河者。仍轉入鄭家莊南遙堰之內。臣聞信。卽兼程前往。沿途察看。南北兩岸各工。俱經搶護平穩。二十八日至北堰改溜處所。乘船隨水查勘。東南歸入沙淀。其勢甚順。沙淀以下。水半澄清。與上年北堰九號過水情形。大概相似。其遙堰埝處所。臣詳加相度。若祇於北堰加培。恐夾峙於渾水瀝水之中。難資捍禦。擬於堰外圈築月隄一道。酌其地勢。展寬三四五里。以爲重層保障。此處地面空曠。以常年瀝水佔蓄之地。寬留渾水蕩漾之區。似於勻沙散水之法。大有裨益。方敏恪公奏稿。

是年。自北岸六工。第八號半截河村後。至黃花淀村前止。圈築月隄一道。長八千六百四十丈。合四十八里。築底寬五丈。頂寬二丈。均高七尺。畿輔安瀾志。

乾隆二十八年正月。方觀承奏。永定河南北兩岸。向分十八工。北岸工段。以天地、黃、宇、宙、洪、日、月、盈、九、字。編爲號次。南岸工段。以辰、辰、宿、列、張、寒、來、暑、往、九、字。編爲號次。乾隆十五年。恭逢聖駕視河。親臨指示。以兩岸自頭工至六工。應存其舊。續築之兩岸上下七工。八工。河身高仰。應於改流之後。裁去此三工名色。臣欽遵記載。嗣於十六年。下口改由冰窖。又於二十年。改由北岸六工二十號。其舊下口之上下七工。八工。皆廢。是以自北岸頭工至六工。惟有天地、黃、宇、宙、洪、六號。南岸自頭工至六工。惟有辰、辰、宿、列、張、六

號核其字號次序。本文已不相屬。而昺字之於隄。洪字之於河。亦非所宜稱。臣之愚見。兩岸工次。似可毋庸編列字號。南岸則稱爲南岸頭工二工。以迄六工。北岸則稱爲北岸頭工二工。以迄六工。南北兩堰。仍稱上中下三汛。較爲簡捷易曉。如蒙聖鑒允准。除飭廳汛按工改立簽記外。應並咨明工部。嗣後將題奏事件。報銷冊籍。皆照此開寫。以照畫一。奉硃批。甚是。如議行。永定河志。

是月。方觀承請將永定下口。寬築遙堰。塞北堰水口。將向南之舊河身。挑濬深通。導水仍注東南。使北堰以北。不致遽受淤墊。又鳳河上游。在大興、東安、武清等縣境內。瀝水匯注。挾帶泥沙。多有淺阻。並應分段開挑。方敏恪公奏稿。

四月二十一日。方觀承奏。永定河於乾隆二十一年。將北岸六工二十號。作爲下口。迄今八載。散水勻沙。頗稱寬暢。初改之時。水循舊北隄根。漸淤而北。北堰長八十里。自中汛以上四十里內。節年淤墊。已高三四五尺。上年盛漲。水由十七號溢出。循堰下減河東注。尋復斷流。又由十二號溢出。亦歸堰下減河。今臣詳加相度。十七號形勢爲順。應將十二號缺口堵築。就北堰內舊有之河形。開挑引河一千八十丈。仍由十七號北堰外減河。下注葉淀。此處北堰至遙堰。寬七八里。地勢亦較淀內爲低。足資蕩漾。惟是改河以來。各堰俱無修防。有時水近隄根。因風掀簸。沙土虛鬆。每虞坍透。祇須用高四五尺之埽個。長一二丈之柳椿。隨時抵禦。即可無患。於隄堰衝刷處。稍加防守。俾水有約束。自淤亦能自刷。即可多經年歲。現飭道廳等於疏濬項下。通融酌備料物。並在各工採取條枝柳檁湊用。俟今年伏秋汛內。察看水道情形。再爲酌定章程。方敏恪公奏稿。

乾隆二十九年方觀承奏直隸埽船一項於乾隆三年設立以疏淀中水道十年又經添置兩次其設立土槽船行船牛舌頭船三項統立埽船計四百隻杈夫一千二百名轄以千總外委分隸永定天津清河三道內牛舌頭船因不適用於十年後節次議裁現存埽船三百二十隻杈夫一千八十名管轄千總二員把總四員外委二十員臣節年體察情形埽船之用在於撈泥尤重疏淀然水深五尺以下爬撈卽不能著力而船泥載重水淺又復行滯且兩淀廣袤數百里撈泥一船去淤幾何及至河淀遇有水中取泥等工作仍須另雇民夫乃可集事而埽船歲需等項約計十年之中需銀九萬五千餘兩功效有限耗費實多應請將額設埽船三百二十隻全行裁汰杈夫一千八十名悉行散歸漁業嗣後河淀工程如有需用夫船之處臨時雇覓庶工歸實用不致多糜經費至原設管船之千總外委應酌爲裁省查直隸河工惟永定河設有守備一員其隸天津通永二道之汛弁俱係千把外委今埽船旣裁可否將應裁之管船千總二員改設守備一員駐劄天津隸天津道管轄所有南運河河兵千把總汛務及天津道屬各工均令該守備經管聽候天津道差委又原設把總四員應將三角淀廳一員保定常務廳屬一員裁汰子牙廳下汛駐劄獨流之把總一員津軍廳下汛駐劄韓家樹之把總一員仍照舊安設經管格淀長隄其子牙廳上汛駐劄莊兒頭之千總旣裁所管格淀長隄工段應照霸州州同分管之例歸子牙廳屬王家口縣丞就近管轄以重要工其隨船經制外委二十員悉令撤回經工部議覆奏准永定河志

乾隆三十二年四月奉上的諭前因閱視河淀情形見鳳河有斷流之處於回鑾駐驛南苑時令查勘上游疏濬以達河流今據阿里衮等查明團河下游卽爲鳳河一畝泉下游卽歸張家灣運河俱應行開挖深

通已有旨給發帑金及時修濬矣。但此二河下游皆係地方官應行經理之事。聞其中亦不無淤淺阻塞。今上游既議修治而下流若仍聽其淤梗是尾閭不能暢達。即疏濬水源亦屬無益。著傳諭方觀承即派委明習妥員前往查勘。將應行開挖之處及時興工。務使一律暢流。以資宣洩。仍將勘估情形據實覆奏。永定河志。

乾隆三十四年七月直隸總督楊廷璋奏永定河南岸二工之金門閘滾水石壩於乾隆二年建造計寬五十六丈灰土石海墁共進深三十六丈爲宣洩異漲之要工六年因壩面過高不能過水奏奉議准兩旁各留一十八丈仍舊外將中路之海墁石二十丈放低一尺五寸俾常汛則可從中減洩異漲則可通壩過水迄今將三十年河身漸淤本年凌汛後河流漸覺改移壩口稍有迎溜之處測量河身較從前放低之處已屬相平不能攔溜必須將石海墁升高庶可宣洩異漲而常汛亦不致於旁溢但石工並不損壞毋庸拆毀已成之工與道廳商酌於壩口暫作草壩關欄以俟定議酌撥今臣復親加察看壩口既有迎溜之勢設一時大溜改移必致有費周章隨與該道滿保暨兩岸同知蘭第錫等悉心講求斟酌查從前放低一尺五寸之石海墁自迎水至出水處共進身一十六丈今擬將迎水處進深一丈二尺照舊加高一尺五寸與兩旁三十六丈之海墁一律相平統於壩口鑿槽安砌尖脊石龍骨一道長五十六丈高二尺五寸以資捍護即使異漲奪溜而來有此龍骨以禦之自必紆徐跌蕩而過核計加高迎水處進身一丈二尺添建石龍骨五十六丈又出水護壩排椿共八十丈內二十丈因積年過水汕刷朽爛應行抽換出石灰土簍箕並管頭木亦因年久被水衝刷殘缺應補築完整以資鞏固應請明歲二月興修趕辦

工竣後臣親勘驗核實報銷奉硃批既明年興工俟一二日面商爲妥欽此七月初八日南石槽行宮面奉諭旨著照所請行永定河志

乾隆三十五年五月大雨永定河北岸二工六號決口四十七丈命工部侍郎德成會同總督楊廷璋督堵河渠志稿

六月初一日奉上諭據德成楊廷璋奏辦理永定河北岸漫口情形稱五月二十八日亥時大雨如注河水陡長將新下之埽掀撼漂浮現在水深二丈五尺釘椿難於穩固惟有漫口以北老隄尙屬堅實卽於該處斜鑲軟壩挑溜入河仍於坐灣頂衝更開河引溜歸舊等語大雨後河水驟長溜流猛迅原非人力所能強爭若急於下埽以攪其勢轉恐於事無益但永定河之水非黃河長源遠赴者可比盛漲既過卽可漸平自應暫讓其洶湧之性俟一兩日後流緩溜微卽行加緊堵築興工自當較易而現在開挖引河引溜歸舊最爲緊要關鍵若引河速成於築口合龍尤易於集事德成務同楊廷璋詳度機宜妥速籌辦再向來沿河正隄之外俱築遙隄此次漫溢之水若在遙隄之內則原係豫留河流盪漾之地尙屬無妨或已漫開遙隄仍復折歸堰內所經之處亦復有限儻竟溢出遙隄一往泛濫則民地田廬必被淹損楊廷璋卽應確查被水之區是否成災迅速照例分別撫卹經理毋使小民稍致失所仍將實在情形詳晰奏聞毋少諱飾至楊廷璋昨歲面見時曾奏及所辦永定河工程伊到彼卽得神力相助迅速奏功彼時覺所言略涉自滿從來明神默相原屬理所應有而河神尤爲靈應果能極盡誠敬未嘗不可感通若書冊流傳開雲返風之類輒自詡爲正直神自扶持不過文人任意誇張殊不足信楊廷璋設或稍存此念

未必不因此致損招尤。卽應深自懺悔。積誠孚感。以期速佑安瀾。仍著楊廷璋等。將日來施工有無成效之處。卽速具奏。純皇帝聖訓。

乾隆三十六年七月。永定河水漲。南岸二工漫口七十餘丈。北岸二工漫口一百餘丈。命德成會同楊廷璋督堵。又命兩江總督高晉。工部尙書裘曰修。會同籌辦。旋經堵塞。河渠志稿。

十二月。高晉。裘曰修。直隸總督周元理奏。臣等復勘永定河發源於山西口外。入直隸懷來縣境內之和合堡。從石景山而出。臣等至彼。詳加相度。和合口原係兩山夾峙。一水中通。渾流至此。天然收束。舊有玲瓏石壩。意在稍緩其勢。其實水小則無需抵禦。水大則易於衝坍。壩工旣難經久。自可無庸修復。迨至石景山始有段落工程。顧永定河性最湍急。南衝北激。水勢迄無一定。則善治之方。誠如聖明洞鑒。亦無一勞永逸之策。惟有疏中泓。挑下口。以暢奔流。堅築兩岸隄工。以防衝突。猶恐大汛時盈滿爲患。深濬減河。以分其盛漲。查石景山至盧溝橋。舊有石工。凡坍損蟄裂段落。擬一律修補完固。自盧溝橋迤下。頭工至六工。河身皆由淤阻。而頭工二工尤甚。臣等酌將中泓灣曲。形如之字。河身悉行取直。各就形勢抽槽。寬自六七八丈至十一二丈不等。深四五尺至七八尺不等。雖汛水長發。普漫而來。有此溝槽。導引大溜。自歸中泓下注。其兩岸隄工。卑薄殘缺處甚多。今擬間段加培。至迎溜頂衝背後。舊日漫口補還原隄之處。應估築月隄。以爲重層保障。惟兩岸悉係浮沙。築隄恐不堅實。應取膠土加幫。否則內用沙土。外用礮土。蓋面封頂。庶資鞏固。南岸之金門閘。並北村壩。北岸之求賢壩。皆爲分洩異漲而設。金門閘口。現今淤高。而北村求賢兩壩出水處。向係灰土。兩邊壩臺。向用草工。現俱疊被衝刷。今擬改作灰土。至下游引河。金

門閘與北村兩道均歸入忙牛河其淤阻之處宜一律挑通查忙牛河經由霸州地面入中亭河若減水過多則霸州一帶田畝被淹且中亭河不能容受更易阻滯查忙牛河下牛坨地面有黃家河一道爲忙牛河分流今漸淤廢查此河東南行由津水窪入田家泊地俱空曠約寬二十餘里足資容納今擬於牛坨之旁忙牛黃家二河相接分流之處築挑水壩俾上游減水多入黃家河少入忙牛河則去路益暢而忙牛河亦不致溢出其北村壩引河已經全淤向係西行四里餘卽入忙牛河與金門閘減下之水同爲一路且自東轉西形勢不順往往東漫今擬開向東南計五十一里於將至牛坨之黃家河稍上入忙牛河卽可會入黃家河合流而下兩旁地畝內瀝水皆可藉以宣洩不獨減洩永定多餘之水而已此辦理南岸減河之情形也北岸求賢壩現在壩口殘缺亦因被淤之後形勢改易應行另建並開小引河一道達於舊河順入黃花閘月隄之下歸母豬泊內此辦理北岸減河之情形也至六工以下自改建下口以來溜勢屢經北徙若再徙而北則逼近東安武清兩縣治臣等兩次確勘今歲溜勢經葛漁城之北馬頭之南條河頭地方直往東行臣等因勢利導開通北路並於舊日已廢之北堰十二號築攔水土壩以遏其北徙之道則徑達沙家淀會鳳河下游由雙口歸大清河較爲直捷大汛時消退迅速無虞旁溢其鳳河淤淺處間段挑深東岸之殘廢者量爲整理惟永定河所患在於水停沙淤河底淤高致旁趨爲害是河每年雖有挑挖中泓之例但河流綿亙二百餘里額定歲費所挑不抵於淤應汛各員或再經理未善未免虛應故事此次雖經疏治水過仍恐停淤應請每年秋汛水落後臣周元理親率道廳查勘一遍按其所淤丈尺估挑以備下年過水年年實力行之則淤沙有減無增河流自能順軌矣北運河工程從節

奉旨依議。永定河志。

乾隆三十七年四月。裘曰修。周元理奏。永定河汛水後。溜緩沙停。易致積淤爲患。挑濬之工。最關緊要。惟水中嫩淤。人夫不能跼立。難以施工。從前原有濬船一項。緣過於淺小。不能裝運泥沙。而所設杈夫。多係另雇貧民。有名無實。經前督臣方觀承建議。裁汰臣等熟籌水中挑淤。必須設立船隻。方能力作。且責令河兵經管撐駕。亦毋庸另設杈夫。今議用五艙船八十隻。三艙船四十隻。計大小一百二十隻。給配十八汛內應用。奉硃批。如所議行。乾隆四十七年。署直隸總督英廉。以濬船無實效。而修艙未免虛糜。奏請裁汰。永定河志。

六月十六日。工部尙書。兼管府尹事裘曰修奏。永定河水性渾濁。夾沙而行。與黃水相等。但黃河不煩轉輸。直達於海。此則入淀穿運。然後達海。是以較黃尤爲難治。然黃河綿長數千里。此則二百餘里內。人力猶有可施。願自改易下口後。自六工二十號以下。任其蕩漾。而蕩漾既久。泥沙停積。南淤則北徙。遂以北隄改作南隄。迤北又建遙堰。再淤再北。則添越隄。昨歲又穿越隄而北矣。若非此番特命經理。則東安。武清縣治。將爲歸墟之壑。是以相度便利。於新開條河頭以下。導之使東。斷其北徙之路。作通河尾閘。每歲每汛皆當挑挖。必分泥沙於兩旁。而中間河槽一道。斷斷不可阻塞。向來河員。止講築隄。不言濬河。不知淤日積。則河日高。加隄而河身與之俱長。水不下達。則未有不旁溢者。此下口之疏濬。在今日不可不亟講也。其上六工。已無中流之形。東衝西激。在在成險。連歲趙村。公義村等處漫工。皆在上截。蓋水不就下。專恃隄堰爲保障。而沙土浮鬆。安能抵禦。此六工以上之疏濬。在今日又不可不亟講也。現在督臣周元

理所見相同。合詞奏請添設濬船。以截淤多少。爲汛員殿最。顯示黜陟之途。爲轉陞之地。數年後諸河必大有成效。又直省之弊。近水居民與水爭地。如兩河之外。所有淀泊。本以瀦水。乃水退一尺之地。卽報陞科。呈請築堰。有司見不及遠。遽爲詳報。上司又以納糧地畝。自當防護。如塌河淀。七里海諸處。隄堰直插水中。隄堰旣立。水從缺口而入。漫淹更甚。仰祈敕下所司。一切淀泊。原係蓄水之區。嗣後不許報墾陞科。其淀泊中偶值涸出。不得橫加隄堰。則諸水皆有歸宿。不致壅遏上游。而河道民田。似不無小補。永定河志。

是月奉。上諭。裘曰修奏。驗收永定河工程一摺。並除近水居民與水爭地之弊。請敕所司。一切淀泊。毋許報墾陞科。並不得橫加隄堰等語。所見甚是。淀泊利在寬深。其旁間有淤地。不過水小時偶然涸出。水至仍當讓之於水。方足以暢蕩漾而資瀦蓄。非若河海沙洲。東坍西漲。聽民循例報墾者可比。乃瀕水愚民。爲貪淤地之肥潤。佔墾效尤。不知所佔之地。日益增。則蓄水之區。日益減。每遇潦漲。水無所容。甚至漫溢爲患。則閭閻獲利有限。而於河務關係匪輕。其利害大小。較然可見。是以屢經降旨。飭諭冀有司實力辦理。今裘曰修旣有此奏。是地方官前此奉行。不過具文塞責。不獨直隸爲然也。他省濱臨河湖地面。類此者諒亦不少。此等佔墾陞科之地。一望可知。存其已往。杜其將來。無難力爲防遏。何漫不經意若此。著通諭各督撫。凡有此等瀕水地面。除已墾者。姑免追禁外。嗣後務須明切曉諭。毋許復行佔耕。違者治罪。若不實心經理。一經發覺。惟該督撫是問。永定河志。

八月工部查永定河。荷蒙皇上發帑興舉大工。現已告竣。嗣後凡有應修應濬者。自當熟籌辦理。今據裘

曰修等奏請將永定河今歲所挑中流引河計十一段將來水落之後或有淤沙停積用新設濬船挑濬按工汛之險易酌爲分撥查南北兩岸共十二汛除北四工距河較遠係爲平工毋庸分給濬船外其十一汛謹擬南岸頭工五艙船八隻二工五艙船六隻三工五艙船六隻四工五艙船八隻三艙船五隻五工六工皆五艙船六隻北岸頭工五艙船六隻二工五艙船八隻三工五艙船八隻三艙船五隻五工五艙船八隻六工五艙船六隻六工二十號以下新開下口引河五艙船四隻三艙船三十隻共撥五艙船八十隻三艙船四十隻分給各工交該汛員經管入於交代隨時黏補等語應如所奏辦理又稱永定河六工分爲十二汛之外其六工以下向設三角淀通判一員管河州判一員南北堰汛官六員其南三汛駐劄三角淀左近三角淀早已淤高改建下口之後距三角淀已遠通判移駐於東安之別古莊而州判及南三汛並未移駐今新開下口既安濬船自應將該州判及南三汛移於就近辦理查新開下口從條河頭出毛家窪經葛漁城之下史各莊等處入沙家淀此處爲通河尾閘最關緊要應令該州判及南三汛卽於條河頭毛家窪葛漁城一帶駐劄其濬船調撥兵夫撐駕應有把總外委經管查格淀隄當城以下已改爲疊道其設有把總一員原從永定撥去今擬仍歸永定河令其管理濬船兵夫並添設經制外委二名俾得分領應用而三角淀通判率領州判專司濬船之事董率各汛暨把總外委查巡淤阻分段挑挖以專責成等語應如所奏辦理又稱永定河舊額每歲搶修歲修疏濬下口中泓共銀三萬二千兩查河身日深則歲搶修之工可以日減今應通爲一事總以濬河爲主其歲搶修額銀許其通融辦理但不得出於額設範圍之外等語應如所奏辦理又稱濬河計算土方應於汛過水落時查明每汛

有淤灘幾段。寬長若干。應挑深若干。預估丈尺。核明土方。給銀挑濬。於麥汛水發之前完工。由該道驗收。以防浮冒。至若水中撈泥。則須用濬船撈入艙內。驗明每艙計土幾方。一總合算。又向例疏濬每土一方。給銀七分。而中泓則每土一方。給銀四分。殊未平允。應照七分之例。畫一造報等語。查永定河疏濬中泓。於河水斷流之時。傳集村民。分段挑挖。與中流之挑挖水土者迥異。工作又止限二十日。自應照高斌等奏定成例。每方折給銀四分。毋庸另行議改。至兵丁撐駕排挑。原不計方給價。麥汛後兵丁上隄防汛。另雇民夫駕船撈濬。應如所請。照每方七分之例支給。俾官民皆得易於集事。又稱每歲挑挖之後。至次年應挑之時。查該汛原有淤灘幾段。今抽槽通溜。截灘幾段。以截灘多者記功。少者記過。又新生嫩灘。能用濬船即時挖去者爲功。嫩淤成灘者爲過。功過皆由該道申報督臣。以憑陞黜等語。應如所奏辦理。又稱各工汛員。有州判縣丞主簿吏目之不同。功多者准以次陞轉。尤多者特與保薦。守例千把外委功過。均照此例。惟河工守備。上無陞轉之缺。果能大有成效。許督臣奏明加銜。或以營員陞轉。俾一體有所鼓勵等語。查各省佐雜。果有奮勉勤能者。原准該督題咨陞用。至稱功多者准以次陞轉。尤多者特爲保薦之處。毋庸議。其直隸河營千把外委內。如有奮勉勤能。該督亦可隨時陞拔。守備內有實力任事。大有成效。必能通騎射操防者。許保題送部引見。可否以陸路都司陞用之處。恭候欽定。又稱從前堡船柁夫。每歲支領雇價。而閒曠日多。殊爲糜費。今濬船咸令河兵撐駕。計每船五艙者。須用兵四名。三艙者須用兵三名。每年麥汛至白露。計八十日。此八十日內。各兵有上隄防汛之事。應計其每船添雇民夫。由該道臨期酌量辦理等語。應准其酌量辦理。又稱汛水將長。將落時。水頭迅急。中流引河。恐泥沙衝入。致

阻應用。濬船順流排蕩。使之通流。此係河兵力作應行之事。不能計算土方。祇在本廳汛員弁實力辦理等語。應令該督轉飭該廳汛員弁臨時實力辦理。奉旨依議。今按奏議共十二條。其第九第十十一十二四條。係南北運河及天津事宜。從節。永定河志。

十二月周元理奏。奉上諭。永定河下口。自康熙年間築隄之始。原就南岸。雍正年間。因河身漸淤。改由北岸。近自乾隆癸酉。又改從冰窖。南出兩河之間。是以康熙年間之北隄。轉爲南隄。雍正年間之南隄。轉爲北隄。嗣後節次興工修治。地勢屢更。是冰窖之故道。又已不免。今昔異形。著傳諭周元理。將康熙年間初次築隄。沿至於今。中間改移地名次數。並議改緣由。詳查列簡明清單。卽附摺奏聞。欽此。臣查永定河自初此築隄。今除節年歲修。或裁灣取直。或因勢導流。稍有遷移不計外。前後河道。共改六次。謹具簡明清單。奏呈御覽。清單。康熙三十七年。自良鄉縣老君堂築隄。開挖新河。由永清縣朱家莊。經安瀾城。入淀。至西沽達海。爲永定河兩岸築隄之始。此第一次河道。改由安瀾城。是年。又因安瀾城河口淤塞。於永清縣郭家務下。改由霸州柳岔口。歸淀入海。並築接兩岸大隄。卽今東老隄。西老隄。此第二次河道。改由柳岔口。雍正四年。因柳岔口以上。漸次淤高。於柳岔口稍北。改爲下口。自永清縣郭家務起。開河引水。至武清縣王慶坨之東北。由三角淀。葉淀。入大清河歸海。並自南岸六工。永清縣之冰窖起。至王慶坨止。北岸五工。何麻子營起。至武清縣范甕口止。建築兩岸大堤。卽今日之舊南堤。舊北堤。此第三次河道。改由王慶坨。乾隆十六年。南岸六工以下。冰窖減水草壩。因凌汛水大。壩口擊溜。遂由冰窖改河。從舊有之東老隄。開通歸葉淀入淀。因於南岸自霸州之柳岔口。接築至天津縣三河頭止。改爲南堰。北岸自

六工十六號至鳳河西邊蕭家莊止。接堰一道爲北堰。此第四次河道。改由冰窖草壩。二十年因冰窖河口以北淤成南高北低。仰蒙聖駕親臨閱視。將北六工二十號以下開隄改河。於地勢寬廣之處。任其蕩漾散水。勻沙仍歸沙家淀入海。此第五次河道。改由北六工二十號以下。地名賀堯營。三十七年興舉大工。水由北六工趨下。恐河流再向北徙。於下游條河頭一帶河道挑濬寬深。使水勢直抵毛家窪。該處地面寬廣。足資容納。仍歸沙家淀達津入海。此第六次河道。改由條河頭。以上各河道自築隄後迄今遷徙靡常。前後共改六次。計第一次之安瀾城。距今河身已徙北十餘里。冰窖改河之後。康熙年間之北堤轉爲南堤。雍正年間之南隄轉爲北隄。以今河身而論。則凡屬康熙雍正年間所築之南堤北堤俱在河之南矣。再乾隆五年因河流日漸北徙。於北大隄起由東安縣葛漁城至鳳河西岸止。築北堰一道。乾隆二十一年因北堰不足恃。又於永清縣趙百戶營築遙堰一道。此二堰久經汕刷殘廢。已成蕩漾之區。又二十八年於北大隄永清縣之荆堡起至武清縣之黃花淀止。添築越堰一道。越堰與三河頭以上之南堰相距三十餘里。現在河流在此二堰之中。本年大工案內修理鞏固。合并陳明。永定河志乾隆三十八年三月初四日上閱視永定河下口隄工。周元理面奉上諭。兩岸隄裏近河之隄根反軟。灘上應多種叵羅柳枝。永定河志

是月十一日奉。上諭。今日閱視淀河內鷹嘴壩。又鹿疇兩處。應添引河工程。其鹿疇引河。據周元理擬挑九百丈。已足資取直之益。自應卽如所擬行。至鷹嘴壩曲處。該督止擬開挑引河一百二十七丈。渠西河頭仍恐射隄灣處。不能引溜歸槽。著向西北展長百十丈。則大隄不致受頂衝。以資保障。河防原以衛民。

惟期盡善。卽爲費較多。亦所不靳。著周元理卽照指示機宜。動帑妥協辦理。仍飭大員董率稽查。務令工歸實濟。民資利賴。純皇帝聖訓。

是月二十三日。周元理面奉上諭。下口一帶南北兩隄內。多有村莊。應圍村悉栽臥柳。以資捍衛。永定河志。

是月周元理面奉上諭。調和頭改條河頭。其北岸之越堰。改爲北隄。卽承北岸六工。將上中下三汛。依次改爲七八九工。南堰改爲南隄。其三汛亦改爲七八九工。永定河志。

六月。周元理奏奉上諭。口外自五月二十一。二等日雨後。灤河及潮白等河。水俱驟長。連日熱河雨覺稍稠。聞灤河水勢復大。畿輔一帶雨水情形。大略相仿。未審永定河今年水勢如何。是否不致盛漲。河溜能否循赴中泓。甚爲注念。著傳諭周元理。卽速據實覆奏。至該處設立濬船。以供濬刷淤泥之用。春間親臨閱視。見船艫河中。尙未視有成效。彼時卽曾諭及。如果實力淘濬。使中泓沙不停淤。於河防自不無小補。若徒視爲具文。自難冀其得益。添設濬船一事。原出自裘曰修之意。彼身若在。自必加意董辦。不虞廢弛。今裘曰修已故。恐滿保等未必認真董辦。徒有濬船之名。而無挑濬之實。則是虛糜工帑。製造豈不可惜。永定河原係周元理專責。而濬船之事。周元理亦同會奏。著留心督辦。毋任作輟。因循致成虛設。仍將現在辦理情形若何。一并覆奏。欽此。查畿輔一帶。上月二十一。二等日雨後。各河道俱報長水。幸而安流順軌。工程鞏固。惟潮白二河水勢稍大。北運河之王家務。筐兒港等壩。過水五六尺。亦卽消退。經臣奏明。茲跪讀上諭。仰見我皇上廬切民生。軫念河工之至意。查永定河於上月二十日。河水長發。據報全河水勢。

自六七尺至八九尺不等。該道滿保督同廳汛各員。在工搶護。水勢雖猛。大溜直走中泓。迅趨下口。間有漾水。泛至隄根。隨即下埽鑲墊。兩岸十二工。一律穩固。二十八九日。暨六月初一日。又連次得雨。疏密相間。於秋禾既屬有益。各處河水亦旋長旋消。初一日辰時。金門閘過水六寸。巳時即已斷流。現據各廳具報。河水止深三四尺。即盧溝橋亦不過六七尺不等。水勢極爲平順。至濬船一項。原係裘曰修與臣會商。奏請添設。何敢稍事因循。凡有應濬之處。該道廳督率河兵。往來挑挖。臣於上月查工時。親往督勘。一應淤嘴。以及稍有阻礙地方。復飭令在在裁切疏濬。此番水發。溜走中泓。直達下口。未必不稍資濬船之益。臣現於本月初七日起程。至長安城防汛。督令該道廳等分派河兵。駕船淘濬。以期裨益河防。不敢稍有作輟。永定河志。

是月奉上諭。周元理奏。五月二十二日以來。永定河水勢雖有增長。大溜直走中泓。迅趨下口。兩岸隄工穩固。覽奏稍慰廑念。至所稱各處河水。旋長旋消。初一日辰刻。金門閘過水六尺。巳時即已斷流等語。金門閘宣洩永定河盛漲。其形與南河之毛城鋪相似。永定河挾沙而行。與黃河水性亦同。向來毛城鋪於過水後。即將口門及河流去路。隨時疏濬。以免淤停。實爲利導良法。金門閘自常仿而行之。著周元理督飭河員。於金門閘過水之處。即爲挑濬。務使積淤盡除。水道暢行。以資疏洩。嗣後金門閘每遇過水。永照此辦理。仍將永定河長落情形。隨時奏聞。永定河志。

是月周元理奏。查勘永定河下口。至七八九等工。各處隄堰。俱屬穩固。又乘坐濬船。順流而下。察看河溜水勢。於發水後。俱有遷改。而條河頭舊有之河道。今年又向北徙。緣乾隆三十五六兩年。在北岸二工。南

岸頭工漫口出水。是以三工以下。流及下游者。其勢甚緩。至三十七年。伏秋二汛。水又平穩。則下口一帶。不受衝激之患者。已三年矣。五月二十一日。及六月初一日。兩次汛期。發水極其猛迅。上游各工。幸得搶護平穩。而大溜洶猛。奔騰直趨下口。將中泓河底刷深三四尺。所有泥沙。悉歸條河頭之舊河。淤成平地。其澄清之水。俱從條河頭以北散漫而下。所以沙淀竟不致受淤也。查南北六工以下。原皆任其蕩漾之區。而條河頭以北。地勢本窪。現在河水漸趨於北。雖係清流之水。恐將來日刷日寬。則七八九工之北隄。又不可不預爲防範。目下伏汛雖過。秋汛卽屆。已分投委員。協同該汛官。將北隄之八工九工。星夜加高培厚。並委員分撥濬船。將向南新淤各處。督率河兵。竭力挑挖。蓋此蕩漾之地。苟能使南受一分之水。卽於北受一分之益。現與保滿酌商。俟白露後。水勢歸槽。再行確勘形勢。或於條河頭以南。復加挑通引河。仍由舊道。俾有分注。或另籌疏濬之方。容相度體訪。於趨赴熱河行在時。詳晰陳奏。永定河志。

是月。周元理奏。永定河下口改溜北徙。勘明具奏。查本年汛水漲發。勢極迅猛。將中泓河底刷深三四尺。致挾帶泥沙。直注條河頭舊河。淤成平地。其蕩漾之水。改徙北流。所有條河頭春間聖駕經臨之地。本在河之北岸。今又在河之南矣。臣昨乘船沿流查勘。水由洛圖莊以南。澄清散漫而下。經馬頭惠家鋪之後。響口村之前。直達沙家淀。離北隄尙遠。現在北隄之七八九工。俱已加高培厚。務保無虞。謹確按情形。繪圖貼說。恭呈御覽。現今改徙之大溜。深有四尺。其散漫之水。不過二三寸。所有各處新淤。應行疏濬者。已分撥濬船。逐段挑挖。合并奏明。永定河志。

是年立永定河事宜碑。豎道署儀門左。永定河志。

續行水金鑑卷第一百四十二

永定河水章牘八

乾隆三十九年二月周元理奏永定河下口上年河流改徙由條河頭北趨所有該處北隄七工十三號至九工三號止一帶隄堰最關緊要上年冬臣查勘該隄與永定河道滿保面商勘估加培茲據核估具詳臣又於二月十四五等日由盧溝橋察看南北兩岸情形並赴三角淀下口各處履勘核計查下口北隄七工十三號起至九工三號計長二十九里離河稍遠之處亦有漾水已及隄根舊隄低薄自應一律修築高寬今擬將該處舊隄加高培厚底寬六丈五尺頂寬三丈高七八尺不等又下口北六工二十號南邊淤灘二段應裁灣取直上口面寬五丈底寬二丈下口面寬四丈底寬二丈均深五尺又淀水洩入鳳河舊溝三道溝形窄狹恐宣洩未能暢達今擬挑挖各面寬三丈底寬二丈深三尺其南北兩岸隄工俱有應行加培之處仍照例辦理永定河志

是年奉上諭永定河舊例每年歲需銀三萬四千兩定額永遠刪除嗣後每秋汛後將下年歲修需費若干勘估奏明請領次年驗收核銷其搶修先發一萬兩存貯道庫儻有不敷奏明墊發工竣核銷河渠志稿

乾隆四十年四月周元理奏據永定河道滿保稟稱永定河南岸頭工汛內有玉皇廟前土隄一段長四百五十餘丈外雖鑲作草工緣本年凌汛後河流直走隄根必須遠取膠土大加培築以資捍禦擬將隄

頂加成三丈五尺。底寬八丈五尺。高一丈及一丈一二尺不等。長四百五十八丈。應於伏汛前趕築完竣。等情。今臣詳加查看。即係乾隆三十六年漫口之處。最關緊要。即委南岸同知陳琮駐工督辦。至南北兩岸。尚有間段沙土隄工。應即加高培厚之處。亦逐一勘明。已令該道詳加估計。即於本年歲搶修等銀內。通融辦理。永定河志。

七月。周元理奏。初九日奉。上諭。熱河自初七日以來。雨水略勤。未知口內各屬。陰雨情形若何。尙不致過多否。莊稼有無妨礙。永定河水勢有無增長。是否不致出槽。深爲廕念。周元理即速查確據。實覆奏。欽此。查本月自初六日夜間得雨。斷續。初七日辰刻至亥刻。雨更驟密。初八、九兩日夜大雨如注。永定河水勢騰湧。人力莫施。致大溜先後衝激。北三工南頭工二處。隄岸倒塌漫口。現在漫口二處。北三工堵口甚易。不日可以報竣。其南頭工。現在儼齊料物人夫。趕緊堵築。臣駐工親督。尅期完工。不致遲延。俟通省報到雨水情形。另行具奏。奉硃批。覽奏稍慰。其有無成災。不可粉飾。大約如何。速奏。永定河志。

乾隆四十一年十二月。周元理奏。查鳳河長一百七十餘里。緣上流水性帶沙。河多灣曲。易致停積淤塞。現在河底深淺不一。而武清境內。淤阻尤甚。必須按段挑深。方得暢流無滯。今核計逐段應挖土方。長二萬八百三十三丈。應令該州縣各按境內。照估領銀。雇夫開挖。惟武清縣工段較長。應添派鄰近之寶坻縣。協同辦理。奉硃批。如議。實力爲之。永定河志。

是年。以南岸頭工。河形灣曲。溜逼隄根。開挑引河一千四百二十四丈。河渠志稿。
乾隆四十二年七月。周元理奏。臣在永定河防汛。於南北兩岸。往來察看。查有北岸三工十一、二號。隄形

灣曲。兜水生險。今年六月底七月初。連次水發。溜逼隄根。溯洄淘刷。深至二丈有餘。該處埽工。長至一百餘丈。逐段皆險。搶護之時。人工料物。費用爲多。臣目擊險要。擬於隄內添築直隄一道。俾溜勢不致兜灣。再於西首上游。斜築挑水壩一道。以攔入中泓。其舊隄仍按年加培抵禦。作爲外圈。如此因勢制宜。似可化險爲平。計自十號至十三號直隄止。長三百四十丈。上游挑水壩。長四十五丈。謹繕摺繪圖貼說呈奏。永定河志。

乾隆四十四年六月。直隸總督楊景素奏。初一日臣馳至盧溝橋。次早循北岸頭工。查勘至下口三角淀地方。復由南岸查勘各工。俱已徧歷。見溜走中泓。一切埽工平穩。水歸沙家淀。不致旁溢。惟北岸三工內有二里計一段。南北兩岸緊束。僅寬九十八丈至一百一十四五丈不等。查上游兩岸。隄寬數百丈。至此一束。勢難暢洩。故以上工程。多有出險。且各工內尙有一二處。與水爭地情形。現屆大汛。勘辦不及。惟有將各要工多貯料物。選派幹練文武督率兵夫。分段駐工。晝夜防護。其平穩工段。亦不許稍有疎懈。臣因保定署內奏銷等項。尙未辦出。卽於初六日馳回料理。一有就緒。仍赴永定河駐工督率防守。永定河志。八月。楊景素奏。臣前查永定河工。有與水爭地情形。因屆大汛。查辦不及。當經奏請。欽奉硃批。旣稱辦不及。汝來時面奏可也。欽此。茲臣到工防汛。諮訪相度。北三工六號南三工十五號以下。河身僅寬九十八丈至一百五十丈不等。與上下游現寬三五百丈者。形勢迥異。河身至此一束。勢難暢洩。是以向年上游工程。多有出險。今擬於北三工四號至十號止。展築新北隄九百三十五丈。再將十號至十五號舊北隄。加幫培築。並將南三工十五號至十八號舊越隄。及十八號至二十一號舊南隄。分別加高培厚。其南北

臨河舊隄二道酌量廢去。則河身均在四百丈以外。與上下游一律寬廣。不致與水爭地。設遇汛漲。亦是暢流宣洩。如蒙聖恩俞允。請於八九月興工。明歲春融接辦。務於三月內完竣。奉硃批。著照所請行。該部知道。永定河志。

乾隆四十五年七月。直隸總督袁守侗奏。二十二日奉上諭。前因十八日熱河雨勢較大。遙望雲氣濃厚。來自西北。卽恐長安城上游有漲水漫溢之虞。隨傳旨詢問袁守侗。河水是否不致盛漲。工程是否安穩。令由驛據實覆奏。今據奏到。永定河因本月十七八九等日。上游各處大雨。河水長發。幾與隄平。隨督同道廳等分投搶護。詎水勢溢漲。盧溝橋西岸漫溢出槽。北頭工水過隄頂。洶湧異常。人力難施。衝開七十餘丈。由良鄉縣前官營散溢。求賢村減河。仍歸黃花店鳳河等語。覽奏深爲廬念。惟有趕緊堵築。以期安流順軌。無礙田廬。查關閘內河身。自頭工至六工。原係歸入鳳河。今漫口處歸入減河。仍歸黃花店鳳河等處。自應設法挑溜。使大溜仍歸正河。一面上緊堵築。趕進埽個。永定河來源不大。此時驟長之水。想晴霽數日。卽可稍落。合龍自易爲力。著傳諭袁守侗督率員弁。竭力趕辦。其有成災者。妥加撫卹。毋致一夫失所。至該處有此漫工。袁守侗須日夜在工督催。不宜舍此而來。已於摺內批示。至所請交部議處之處。將來勘明成災分數。自應題本。於疏內照例聲敘。此時毋庸急請交部也。欽此。伏查永定河河身本淺。此次因上游一時驟長。致漫溢出槽。今已晴霽數日。漲水漸次消落。臣連日督率道廳等。將漫口上緊趕築。上慰聖懷。再永定河水勢本屬無定。自漲水消落後。於二十二日。上游大溜忽爾不走中泓。直向南趨。至頭工二十五號。始斜至北頭工四十一號。而出漫口。其時南頭工二十五號隄前。尙有淤灘五六丈。當卽

挂柳保護。乃一晝夜全行刷去。溜走隄根。立即飭用埽搶護。隨鑲隨陷。又值二十三日午後。長水一尺。溜勢更緊。復多撥兵夫搶鑲。搶至二十四日寅刻。始得護住。現用柴土追壓。可保無虞。計刷場隄身長五十餘丈。寬一丈餘。俟護隄埽工做完。卽於隄後加高培厚。補還原隄丈尺。至漫水經過地方。現在委勘。俟查明如有已成災者。自當妥加撫卹。以仰副聖主念切民瘼之至意。奉硃批覽奏俱悉。近又復有陣雨。不知彼處如何。甚廑念。速奏來。永定河志。

八月奉上諭。據袁守侗奏。永定河漫口。督率道廳等趕緊堵築。加工下埽。該道蘭第錫等。駐工趕辦。不遺餘力。於初九日酉刻合龍等語。今夏永定河因上游漲盛。致隄工漫溢。文武各員。本有應得疎防處分。今該督袁守侗於一月內。督率道廳趕緊堵築。剋期合龍。辦理迅速。亦應甄叙。所有在工員弁。功過各不相掩。著加恩仍行交部議叙。以示分別。勸懲。並行不悖之至意。永定河志。

乾隆四十六年五月。吏部據內閣抄出。直隸總督袁守侗奏稱。永定河南北兩岸。分界立汛。每汛經管河隄。自十八九里至二十七八里不等。惟北岸頭工。分管四十七里三分。當日因地處上游。河身寬展。工程平穩。故所管隄工獨長。近年水勢偏趨北岸。上年秋汛。北頭工四十一號。隄工漫溢。本年凌汛。水刷隄根。在在出險。修防甚爲緊要。原設宛平縣主簿一員。駐筭四十二號。其上游隄工。實有鞭長莫及之勢。雖永定河形遷徙靡常。不便遽請更定。而隄防險易。今昔不同。不得不量爲籌備。臣與永定河道蘭第錫。詳加商酌。查有永定河下游三角淀所屬南隄九工。武清縣縣丞。經管舊隄二十里。自乾隆二十年下口改移。離河較遠。修防甚易。雖不便遽議裁改。而酌量調用。實因時制宜之法。應將南隄九工。駐防之武清縣

縣丞移駐北岸頭工。自一號至二十二號止。畫分河隄二十二里。一切草土各工。均責令該員修築。並請卽以原銜管北岸上頭工汛事。毋庸另給關防。其二十三號以下。至四十七號。仍令宛平縣主簿經管。所有南隄九工。分管舊隄暨濬船疏濬等事。請就近飭委霸州淀河州判兼管。足資料理。將來北岸頭工。河遠工固。無須修防。或下游南隄。又增險要。卽仍令該縣丞回駐九工。以符舊制。至現今移駐北頭工。其應支廉俸役食等項。仍照舊赴武清等縣支領。所需汛署。亦據該道代爲捐廉建修。毋庸另議動項。如此酌量暫移。定制旣未更張。而險工得員分理。亦足以資防護。所有分管隄工字號。及應撥汛兵名數。另行均勻派撥。造冊送部奉硃批。如所議行。永定河志。

乾隆四十七年正月。直隸總督鄭大進奏。臣陛辭後。卽赴永定河下口。率同該道蘭第錫。親勘該處六工以下河身。內向有村民居住。自乾隆十五年。欽奉諭旨飭禁。前督臣方觀承。查明給價遷移。嗣因下口改流。復又奏請暫回居住。茲永定河南北兩岸。自頭工至六工。舊有村莊。業已遷移淨盡。其自六工以下。水勢遷徙靡常。屢將北堰改築展寬。現今修守之北隄。與原設之南隄。遙隔五十餘里。其中居民。共有五十餘村。或因灘地尙未除糧。就耕守業。或貪覓魚葦之利。聚居高阜。水漲卽以船爲家。雖現與下口水勢並無填塞阻滯之虞。但旣附近河身。自當凜遵聖訓。勸令遷移。以清河流。臣勘明永清縣境內。應遷者柳坨等六村。東安縣境內。應遷者小孫家坨等五村。共十一村。旗民二百八戶。草土房七百二十間。已諄諭該縣等。勸民遷移。務須不動聲色。妥爲經理。其條河頭。葛漁城等四十餘村。均與現在河身相離較遠。似可准其暫回居住。但須禁其添蓋房間。疊築圍壩。以杜佔居填塞之弊。俟將來河流又有遷改。如果逼近應

遷再行隨時查明妥辦。永定河志。

乾隆四十九年三月。工部尙書金簡奏。履勘盧溝橋下沙淤過甚。命步軍分段挑挖。河渠志稿。

乾隆五十年十月。工部議查永定河自盧溝橋以下。頭工至六工。長二萬七千七百餘丈。隄岸最關緊要。乾隆三十七年。加培興修。今據直隸總督劉峨奏稱。下游之三四五六工。水緩沙停。河底日高。隄身益卑。本年汛水漲發。水滿隄頂。幸賴子堰攔護。請將南岸自四工三號至六工十九號止。北岸自三工十五號至六工十號止。隨舊隄高低。普律加高一二尺至三四尺。幫寬一丈二三尺至二丈餘尺不等。又南岸四工一號至三號。隄身灣曲。添築直隄四百十五丈等語。查隄身單薄。設遇盛漲之年。難資抵禦。其灣曲處所未免河流偏趨。易致頂衝生險。均應如所奏辦理。謹奏奉旨依議。永定河志。

乾隆五十四年七月。吏部議得劉峨疏稱。河防人員。經管隄工。所管汛地。與職官銜名。必兩相符合。始足以專責成而資防護。查永定河北隄八工。武清縣主簿經管。隄工長一十九里。共三千四百二十丈。內三千三百二十八丈。均在東安縣地方。坐落武清縣境內者。僅九十二丈。又北隄九工。東安縣主簿經管。隄工長一十一里七分。共二千一百八丈。係武清縣地方。並無東安縣地段。彼此錯綜管理。名實參差。臣與永定河道羅煥。公同商酌。應請將北隄八工。武清縣主簿改爲東安縣主簿。北隄九工。東安縣主簿改爲武清縣主簿。並將八工原管武清縣隄九十二丈。畫歸九工管理。庶得專管本境隄工。名實相符。責成專一。該二缺並無繁簡之分。現任主簿馮煥。周安國。均堪勝任。其俸廉役食衙署。亦毋庸更易。惟該二汛之鈐記。各照所管地方擬定字樣。咨部換給。以昭信守。查設官分職。原貴名實相符。以專責成而收實效。應

如該督所請。准其改管。該二汛鈐記。俟咨禮部鑄給。奉旨依議。永定河志。

九月。劉峨奏。據永定河道羅煥詳稱。永定河南岸四工。下至六工。北岸三工。十五號。下至北岸六工。各土隄。均於乾隆五十一年。奏請加高培厚。現在隄身一律鞏固。足資捍禦。其未經估辦之頭二三工。前因地居上游。可以從緩。並七八九工。係下口蕩漾之地。是以亦未請修。本年夏秋間。汛水盛漲。至一丈六尺不等。盧溝橋出峽之水。奔騰湍激。南岸頭工十號。並十二號。又三工六號。並十五號。北岸下頭工三號。並十四號。又三工三號。及十二三等號。或因河流偏趨。或係迎溜掃灣。汕刷隄身。疊出危險。雖經搶護穩固。而隄身舊形單薄。必須間段加培。又下口北隄七八九工。係乾隆四十四年加築。僅高五六尺不等。本年河流北趨。水漫隄根。而隄之北面。卽爲減河。隄身實屬卑矮。必須擇要培築。臣覆查永定河隄岸土工。遇有殘損。例應另案奏辦。以資防護。本年防汛時。該道羅煥面稟。臣卽親歷南北兩岸。及下口北隄應修處所。逐一履勘。隄身實形卑薄。亟須籌辦之工。請准其估辦。於本年十月。及來歲春融。分作兩次。上緊培築。務於汛前一體完竣。永定河志。

乾隆五十五年正月。修鳳河隄工。河渠志稿。

乾隆五十六年四月。直隸總督梁肯堂奏。永定河南北兩岸。工段縣長。埽壩櫛比。乾隆四年。設立河營守備一員。專司埽壩工程。約束河兵力作。事務本屬殷繁。南北往來。兼顧兩岸工程。每有鞭長莫及之勢。臣與永定河道羅煥籌計。若再酌添一員。分任其事。庶足以專責成。而裨河務。查石景山汛地居上游。悉係大石片石工程。修防較易。向隸同知專管。乾隆三年。設立千總。專司報水。事甚簡少。臣之愚見。原設永定

河守備一員。應令駐劄南岸四工扼要處所。專司南岸六汛埽壩工程。將石景山汛千總一員裁汰。改爲永定河協辦守備。駐劄北岸三工。專管北岸六汛埽壩工程。如此畫分管理。各有專司。聲勢絡繹。巡防益加周密。至協辦守備。應支廉俸銀兩。與千總所食相符。應令新設守備。仍食千總廉俸。毋庸另議增添。惟應刊給協辦鈐記。以昭信守。再鳳河東隄。並桃花口斜堰工程。亦關緊要。原設外委一員。尙不足以資經理。永定河向設濬船。久經奏明裁汰。而濬船把總。僅止隨同廳員。專司疏濬。名實亦不相符。請將濬船把總。改爲鳳河東隄把總。移駐東隄。辦理修防。仍兼管下口疏濬事宜。以收實效。鳳隄外委。則令移駐石景山汛盧溝橋。專司汛期內報水之事。奉硃批。該部議奏。經兵部議覆。奏准。永定河志。

乾隆五十九年七月。梁肯堂奏。永定河自入伏後。水勢增長。六月二十九日。臣自省赴長安城防守。三十日。途次新城縣高碑店。臣署差弁。送到永定河道喬人傑稟稱。自二十二、三等日。水勢增長。後至二十五日。共長水一丈三尺二寸。河流已與頂平。搶加子堰保護。二十六日。又長水一尺六寸。連底水共深一丈四尺七寸。水勢洶猛。人力不敵。將北二工二十號隄頂漫過。塌去隄身六十餘丈。河溜直趨。歸入求賢村減河。由鳳河仍至永定河下稍入海。雖已斷流。又南頭工二十六號。亦漫過隄頂。塌去隄身八十餘丈。水由老君堂官莊馬頭歸入大清河。現在督率各員。趕緊堵築等情。臣卽兼程於七月初一日。行抵工所。親加察看。北岸二工漫口之處。業經斷流。已調集人夫補築。尙易集事。南岸頭工漫口較寬。現在天將晴霽。水勢漸消。正可趕緊辦理。東西兩壩。均經喬人傑等先已裹頭。辦有壩臺。尙屬妥速。現在軟鑲打樁。一俟做至水深應下埽個之時。卽行下埽。並挑挖引河。務使尅期堵築。至臣與道廳等官。不能先時保護。以致

漫溢。應請旨交部嚴加議處。再過水之良鄉、涿州、固安、永清、霸州、東安、雄縣等州縣。業委員分途確查。如有田禾廬舍傷損。卽照例撫卹。永定河志。

是月奉。上諭。昨據梁肯堂奏。永定河伏汛漫口。趕緊堵築一摺。已於摺內批示。該處入伏後。水勢增長。更兼風雨驟激。致漫過隄頂。塌去隄身。自屬人力難施。現在北岸二工漫口。幸已斷流。自應趕緊堵築完竣。其南岸頭工漫口較寬。當此天時晴霽。水勢漸消。尤當迅速調集人夫。挑挖引河。上緊堵築。以期剋日蒞工。所有漫水經過州縣。如田禾廬舍。或有淹浸。卽迅速查明。有應行撫卹者。卽照例撫卹。毋使小民稍有失所。此爲最要。梁肯堂等務須妥慎詳查。迅速辦理。不可稍存諱飾。至該督前次請撥部帑八十萬兩。業經奏稱順德、廣平等府。可以趕種有秋。毋須動撥。今永定河水勢漲漫。良鄉、涿州等處。多有被淹。辦理賑卹。不無需用。如有應撥帑接濟之處。卽酌定數目。速奏撥給。至該督等所請交部嚴加議處。俟漫口堵築完竣。具奏到日。再行核辦。並著將漫水是否。今已全涸。何時可以堵築完竣。各情形。迅速奏來。以慰廑注。永定河志。

八月。直隸提督慶成奏。永定河工次。連日晴霽。晝夜趕辦。至七月二十九日。兩壩相隔。僅有三丈。擇於八月初二日卯時堵合。而口門愈窄。急溜湍激。各工員多未閱歷堵築事宜。龍門下埽。不甚便捷。致大浪衝失兩埽。至午。人力漸乏。向聞有沈船墊埽之法。隨與僑人傑。卽用渡船橫置口門中間。多載膠土。鑿沈水底。前後填以沙囊。乘機椿埽。並力齊下。一面將引河頭挑開。勢如吸川。建瓴奔騰。下注分掣。大溜一舉成功。於初二日申刻合龍。河流順軌。勢甚舒暢。於玉皇廟前加築挑水壩一座。大溜回灣。鑲築攔水壩。藉資

捍禦爲一勞永逸之計。上慰聖主慈懷。合龍後新隄整齊。臣帶同工員丈量新工。計長一百二十八丈七尺。餘緣初漫時搶築東西壩臺。恐不堅實。具報後復棄去水刷舊隄二段。約有二十餘丈。又堵築時移避頂衝。不能盡循舊跡。增多十餘丈。實較原報漫口八十餘丈之數。多做四十丈。現在天氣晴朗。河水漸消。新土夯礮堅固。舊隄加防結實。卽於初五日起身復命。所有合龍日期。理合恭摺馳奏。永定河志。

是月奉上諭。慶成奏永定河南頭工漫口。於初二日合龍。河流順軌。勢甚舒暢等語。此皆仰賴神靈默佑。得以迅速合龍。欣幸之餘。倍深敬惕。茲又發去大藏香二十枝。慶成現已起身。前來行在。卽著喬人傑分賚玉皇廟、河神廟。敬謹祀謝。以答靈貺。至慶成等前因永定河水勢漲發。隄工險要。督率員弁搶護平穩。已降旨將慶成、喬人傑交部從優議叙。並將喬人傑賞給按察使銜。今復能晝夜趕辦。渡船墊埽。一面開放引河。分掣大溜。得以剋期合龍。深堪嘉獎。慶成、喬人傑著再交部議叙。所奏通判何堂調赴工所照料一切。皆妥營田効力之原任玉田縣知縣陳鳳翔。派委挑挖引河。不辭勞瘁。甚爲得力等語。何堂著准其一體咨部議叙。陳鳳翔亦著該督給咨送部引見。以示鼓勵。又據徵瑞奏。天津賀家口地方。海河漫溢。隄工甚險。當經督同運使嵇承志。天津道丁漣鏐等。晝夜搶護。將隄身幫培堅固。村莊人口均爲保護安帖。田禾不致損傷。仍得豐收等語。覽奏欣慰。嵇承志、丁漣鏐於海河漫溢。冒雨督工。搶護平穩。亦爲出力。並著交部從優議叙。現在徵瑞已赴河間景州一帶。勘辦賑卹事宜。該處新築隄工。仍著該運使等加意防護。一律穩實。永臻鞏固。永定河志。

仁宗睿皇帝嘉慶元年八月初七日。奉上諭。據伊江阿奏。山東運河一帶。因七月二十六、七等日。連朝大

雨湖河並漲。現在設法宣洩等語。看來秋雨既多。直隸永定河亦關緊要。梁肯堂此時因朕萬壽期近。自己前來熱河。但該督到此。不過隨班行禮。並無應辦之事。著傳諭該督速回永定河工所。察看水勢情形。督率工員隨時加意防護。不必急於前來也。河渠志稿。

嘉慶二年七月。梁肯堂奏永定河入秋後。水勢時長時消。閏六月二十九日亥時起。大雨如注。七月初一日至初二日。雨勢更急。平地水深二尺。盧溝橋底水深至一丈五尺二寸。南北兩岸。在在出險。初三日子時。又復風狂浪湧。水高隄頂二尺餘寸。風浪愈急。人力莫敵。致北岸二工共塌去隄身二百六十餘丈。北三工又塌去隄身五十丈。南岸頭工場去隄身一百五十餘丈。並將金門閘龍骨衝去二十餘丈。全河大溜。悉由漫口下注。幸初四日雨止。天霽水亦漸平。現已調集人夫。趕緊裹頭辦出壩臺。即日軟鑲下埽。以期及早堵築完竣。臣與道廳等官。不能竭力保護。以致漫溢。罪無可逭。請旨交部嚴加議處。再過水之固安、永清、東安等縣。業委員確查。如田禾廬舍。稍有傷損。卽照例撫卹。永定河志。

是月。梁肯堂奏奉。上諭永定河水高隄頂二尺有餘。加以風狂浪湧。隄工漫塌。實由人力難施。尙非搶救不力。所有該督等奏請交部之處。著加恩寬免。梁肯堂在直年久。於河務情形。亦所熟習。不復另派大員前往幫辦。該督惟當董率在工。文武員弁。上緊堵築。迅速合龍。尙可將功補過。連日天氣晴霽。水勢曾否消退。該督如何鳩集工料。興工堵築。約計何時可以堵竣。著卽速奏。若該處河身。經此番衝刷。或更加深。通轉爲極好機會。並著查明具奏。仍繪一圖。貼說呈覽。至下游過水。固安、永清、東安等縣。猝經漫水下注。田禾不免稍被淹浸。該督並當派委道府大員。詳細履勘。實力撫綏。如有應行蠲緩之處。著據實奏聞。不

可稍存諱飾。仍卽回奏。以慰廑注。欽此。伏念臣職司河務。未能竭力搶護。以致隄工漫場。實屬咎無可逭。復蒙天恩。寬免交部。感激悚惶。更難自己。此次永定河塌去隄身數處。迨七月初四日。天氣晴朗。河水頓消。數日來。盧溝橋存底水七尺五寸。卽南頭工漫口大溜。已較前稍緩。查南頭工漫口。水由良鄉縣之任家營。老君堂。官莊。並經過涿州之桐村等處。入大清河。歸淀。南二工漫口。業已斷流。北二工。北三工。已成旱口。其溢水係過宛平縣之趙村。曹各莊。石垡。求賢等村。固安縣之北張化等村。由減河歸鳳河。仍入永定河下游。所有旱口工段。各長數百餘丈。及數十丈不等。必須層土層礮。補築堅實。已分派附近州縣。協同工員。趕緊興辦。南頭漫工丈尺較寬。工程尤關緊要。臣復札調清河道方受疇。星夜至工。幫同堵築。先於東西兩壩。逐漸軟鑲。各下邊埽。追壓到底。一面於口門相近處。挖挑引河。俟合龍時。挑開河頭。俾掣溜得力。水歸正河。目下工程。已做有二分。可期月內合龍。其金門並開口草壩。衝去工段。擬俟合龍後。次第修復。此番水勢湍激。衝刷河道。更加深通。現在大溜經行之地。誠如聖諭。轉爲極好機會。惟水勢消退之處。不免淤塞。臣等公同商酌。統於合龍後。再行測量。有應挑挖者。一律挑濬深通。謹遵旨繪圖貼說。恭呈御覽。永定河志。

七月二十日。奉上諭。熱河於二十日丑刻。又復陰雨。至午刻。尙未晴霽。雲氣仍自西南而來。因思永定河漫口。前據梁肯堂奏。新築隄工。因十五日之雨。又塌去二十餘丈。究係該督等意存欲速。鑲築未能堅實所致。本日未識是否。亦有陰雨深爲廑念。傳諭梁肯堂。惟當虔禱河神垂佑。不可稍涉怨尤。並督率工員。慎重進占。步步穩實。毋得草率從事。河渠志稿。

八月梁肯堂奏永定河兩岸墊場後因溜急工鉅經奏明飭調清河道方受疇帶同熟諳工程人員來工分段趕辦並於口門下相度河形指定地面挑挖引河三百餘丈以備引溜歸槽自堵築以來每日酌量水勢次第下埽至八月初六日口門僅餘三丈已刻敬祀河神後即追下大埽趕緊堵築一面挑開引河立見大溜下注直由引河歸入正河勢甚暢達順軌循流隨於未刻合龍其金門閘龍骨及草壩等工喬人傑等稟能妥辦即責成該道廳次第辦理迅速完工永定河志

是月奉上諭梁肯堂奏永定河漫口於本月初六日堵築合龍覽奏欣慰此次工程於七月二十七日後氣候晴和夫料湊手得以趕緊施工並開放引河順流暢注旋將兩壩趕下大埽即日堵合此皆仰賴河神默佑迅速蒞工欣慶之餘益深欽感特發去藏香二十枝著該督等敬謹祀謝以答神庥至該處現係新工善後事宜均關緊要該督尤應督率工員妥爲經理務須培築堅實以期永久鞏固永定河志

嘉慶二年三月十二日奉上諭胡季堂奏永定河隄工殘缺應行補築分別緩急辦理所奏甚是近日河員往往擬將河隄增高以禦汛漲殊不知河底淤墊不思設法疏濬徒將隄頂日益加高則河底豈不益高於事仍屬無濟著傳諭胡季堂祇須將應修應築事宜分別酌辦不可輒事增高以致徒費無益 帝聖訓

嘉慶五年六月直隸總督胡季堂奏臣前聞桑乾河有斷流之信到工面詢該道王念孫南北兩岸同知翟嶸雲陳煜及各汛官弁僉稱永定河即桑乾河傳說於桑椹熟時間有斷流之事亦非年年必見乾涸今年閏四月十二二十等日自盧溝橋以東間或斷流至五月初二日大雨後河水通流並云桑乾河斷

流主伏秋汛水盛漲。臣查此河既有桑乾之名。則桑椹熟時。河水乾涸。固係常事。至春夏之交。雨澤稀少。則夏秋以後。或虞淫潦。亦理所應有。今歲既已顯露乾涸。又有主伏秋盛漲之說。更不可不防其漫溢。自當較往年倍加保護。連日帶同永定河道王念孫。周歷各工。如南岸頭工至六工。北岸頭工至六工。所有舊險原築埽壩之處。令加鑲堅厚。至兩岸七工以下。卽係下口。乾隆二十年。在北六工二十號下。開隄放水。作爲下口。南北兩岸相距四五十里不等。原係任其蕩漾之區。今河勢漸向北趨。北隄未免喫重。查下口以下之南北各隄。本屬單薄。因是河流蕩漾之地。只有疏濬引河之費。並無培築隄岸之工。惟乾隆五十四年。曾將北隄七八九等工。隄身卑薄之處。略加培築。嗣以溜向南趨。十餘年未經請修。自上年以來。河流淤墊。水又紆折北趨。經該廳汛照依常年成例。估需挑挖引河銀四千七百餘兩。經臣具題報銷。迨本年凌汛後。水勢又向北行。漸逼隄根。經該道王念孫勘驗。應挑淤引流者。不過數段。毋許多費。所有節省挑淤之項。移作北隄加高培厚之工。該道將北隄七工。隄工底寬一丈四尺。頂寬一丈及一丈一尺不等。等各加高三四尺。計長二千三百七十八丈。增築夯礮。用資保護。並於八工以下。河流去隄稍近者。俱添挑水壩。並加鑲埽。以資防禦。臣親往查驗。該道不拘挑淤之常規。竟作培護之隄障。經費未加工用歸實。若照案題銷。誠恐部中未悉此時河勢。加以駁查。仰祈聖恩。俯如該道所辦。准其據實開銷。庶於河防有裨。永定河志。

是月奉。上諭。胡季堂奏。查勘永定河南北兩岸。並下口各工平穩一摺。內稱桑乾河。於桑椹熟時。偶露乾涸。係主伏秋水勢盛漲。此說朕所素知。今年閏四月間。盧溝橋以東。既有斷流之處。自當較往年倍加防

護不可因目前水勢平穩稍存大意。永定河道王念孫於河務尙爲熟悉。旣經詳悉履勘。將節省挑淤之項移作北隄加高培厚之工。自應卽照所請辦理。不必拘泥原題。估需挑費。總宜使工用咸歸著實。不得逾歲修經費。方爲妥協。永定河志。

十二月護理直隸總督顏檢奏。永定河道王念孫因公來省。講論河務。臣詢以永定河一十號汛。何以最要之南頭工一汛。所管道里獨長。假如一汛內有兩處喫緊。或適當風雨之夕。何能分身兼顧。儻致疏悞。所係匪輕。其對岸之北頭工。多年穩固。一汛轉設兩員。未免此勞彼逸。如有應需調劑之處。正可面爲商推。現據該道詳議移設汛員一事。於今昔簡要情形。實屬得當。復商之署藩司同興亦以所議係移員而非增置。洵爲有裨要工。臣詳加覆核。永定河自盧溝橋以下兩岸俱係石工。一至南頭工汛。則隄岸純沙。乾隆三十五年。至嘉慶二年止。漫工六次。俱在該汛之內。原設宛平縣縣丞一員。工長汛險。實不足以資照料。請將南頭工汛照北頭工之例。亦分爲上下二汛。派定隄工字號。勻撥汛兵名數。各自經管。所有原設之宛平縣縣丞。應作爲南頭工下汛汛員。其南頭工上汛汛員。查有駐節大城之霸州州同向管子牙。大隄及廣安等隄。現在另摺所議。應添椿埽之工。係在獻縣。河間二縣境內。其大城境內隄工。歸霸州州同管理。者係屬平工。請將霸州州同移駐永定河南頭工上汛。以州同經理首汛要工。實符體制。且永定河汛員向稱勞苦。茲添一州同陞階。亦足以昭勤勉。其霸州州同原管隄工。查有向管薊運河之薊州州判久不挽運陵糈。又無緊要工程。請移駐大城。管理子牙等隄。以代霸州州同之任。至薊州州判事務本簡。應卽歸并薊州中營巡檢管理。作爲地方水利缺。以符名實。以上霸州州同。薊州州判二員。各以原銜

移駐。毋庸另給關防。大城現有汛署。毋須另建。原設弓兵淺夫。悉循其舊。其南岸上頭工汛署。不過草土屋十餘間。需費無幾。該道自請捐廉建葺。亦毋庸動及帑項。臣因南頭工汛。從前屢經出險。一員不敷辦理。是以與該道王念孫商酌。移員分管。其霸州州同。薊州州判。本任委係可移可并。別無顧此失彼之慮。茲據該道分晰具詳。由署藩司同興等議詳覆到。理合恭摺具奏。如蒙聖恩俞允。則凌汛以前要工。卽資分管。事歸核實。奉硃批。吏部議奏。經吏部議覆奏准。永定河志。

是年。胡季堂奏請以工代賑。修築新安白洋淀南隄。長流河北岸東隄。雜淀東岸西隄。燒車淀西岸北隄。加高培厚。頂寬一丈五尺。底寬三丈至五丈。高八尺。雄縣千里長隄。卽東老隄。自任邱界至保定界止。長五千四百六丈二尺五寸。加築頂寬一丈五尺。底寬三丈高七尺。任邱境千里長隄。南自高陽界至雄縣隄界止。長一萬二千九百八十三丈五尺。照原建修頂三丈。底寬五丈。高一丈。霸州上六工隄。自東關龍王廟至平口村止。長五千八百八十三丈。照原建修築頂一丈三尺。高七尺。內自三岔隄至平口村止。長二百三十九丈。係營田西隄。加高培厚。築頂寬一丈三尺。底寬四丈。高九尺。下六工隄。自平口村東至工尾止。長三千六百十六丈。內第一段第三段。係營田北隄。築頂寬一丈三尺。底寬四丈。高九尺。營田南隄。長六百八十五丈。照原建修築隄寬一丈三尺。底寬三丈。高七尺。營田東隄。長七百三丈。照原建修築頂寬一丈三尺。底寬四丈。高一丈六尺。六郎隄。自東隄村至新城界齊家堰止。長一千八百六十二丈。照原建修築頂一丈。底寬三丈。高五尺。畿輔安瀾志。

是年。顏檢奏准。南杜村隄外河溝。通入子牙正河。移建閘座。以防倒漾。築護隄埽月隄等工。並請移駐河

員各專責守。奏略文安、大城被水，由河間民人挖開廣安橫隄，實因念祖橋、劉各莊漫口衝灌情急所致。今念祖橋漫口業堵築斷流，惟劉各莊漫口寬三十餘丈，水深溜急，施工非易。於道庫撥銀一千兩，購料上緊堵築。此處漫水斷流，即須將廣安橫隄並黃家道各缺口補築。庶三縣民人咸知水退可種，爭競之端不禁自止。惟子牙河大隄殘缺處，若不培築，再遇水漲，無以弭患安民。至大隄修築堅固，河間隄內瀝水別無出路。蒲塔等村地勢低窪，仍不免積潦爲患。原建王蕃二閘業已淤平，而由閘沿隄查王榆錢窪，不特引水淤成平地，即榆錢窪現能受水之地方圓四五里，若仍此洩水，必須穿窪挑引，方可導入子牙正河。工費浩繁，洩水仍難暢達。因於堤城上下相度，查有舊閘之南杜對面堤外有河溝一道，距河唇長六十餘丈。本年四月居民於此開挖，通入正河，藉消積水。即請於此開挖深通，隨其原挑溝渠，酌挑彎曲斜入正河，並在堤口移建石閘。如瀝水高於外河，即開閘洩放。當伏秋盛漲，即行閉築，以免倒漾。其獻縣、河間、大城三邑之子牙河西岸，堤工殘缺單薄，普律加高培厚。共工段長七千一百三十一丈，但獻縣河間境內迎溜險工難資抵禦。查乾隆一十八年水利工程案內險工八處，俱經裁彎取直，以順溜勢。是以三十年間不致漫水。今又倒注西堤爲害，若仍裁彎取直，河道既長，費亦過多。擬擇最險處參用永定河工程做法，間段加椿作護堤埽，以資鞏固。又念祖橋、劉各莊兩處漫口迎溜頂衝，土性純沙，臨河宜加築內戩，並下護堤埽隄後圈作月堤，以爲重門保障。又杜各村閘外引河酌挑彎曲，以順水勢。但引河逼近河唇盛漲易淤，擬築護閘月隄以爲外禦。至閘座工費查舊王蕃南閘僅有一邊雁翅，北閘亦間有殘缺。現在凍冰不能刨挖，以二閘之料供一座之工，即需添補亦屬無幾。又廣安橫堤各缺口並長城老堤

黃家道口亦須補築。查潯沱河過臧家橋迤北，卽名子牙河，又名沙河，經河間、大城、靜海、天津，以匯北運河。從前鮮有漫溢，自河流側注西堤，屢致出險。今卽於子牙河隄岸殘缺單薄處，加高培厚，而河之側注如故，仍恐嚙隄貽患，自應加做龍尾埽，簽椿保護。至念祖橋，劉各莊前此潰決之由，實因水深跌塘，浮沙不定。今議於裏口添貼心壩，以爲內戢，再圈築月堤，並下堤埽，誠爲慎始之道。其舊王蕃二閘廢後，水無去路，積潦難消，而導水之溝又易淤平，卽榆錢窪亦不能引水。今昔情形不同，自應移建杜各村，以時啓閉，並加築月堤，以資外禦。至修隄一項，查係動用民力，惟該處連年被水，雖經賑濟，民力未紓，恐難力役。此項工程，前曾外辦，應卽在外籌項，切實經理，毋庸另請動款，亦不致累及閭閻。杜各村聞應移駐河丁佐雜一員，專司啓閉。至管河之員，向係河間縣丞管理西岸，景和鎮巡檢管理東岸。今東岸鞏固，西岸嚙重，如令分岸經管，未免勞逸不均，應將念祖橋以南之東西兩堤，責成巡檢管理，其念祖橋以北之東西兩堤，責成縣丞管理，俾照料易周，可收實效。畿輔安瀾志

續行水金鑑卷第一百四十三

永定河水章牘九

嘉慶六年六月初八日奉上諭。昨因大雨連綿。河水漲發。朕心深爲廬念。特派那彥寶等。前往盧溝橋一帶查看被水情形。據覆奏盧溝橋東西隄岸被水衝塌。漫口四處。水勢散溢。下游居民田畝被淹。浸者必多。自宜趕緊修築。以資保護。所有東岸工程。著派侍郎那彥寶、武備院卿巴寧阿。前赴拱極城駐劄督辦。其西岸工程。著派侍郎高杞、祖之望。前赴長新店駐劄督辦。各帶司員。率同地方官。上緊設法疏消。堵築缺口。俾要工卽臻鞏固。毋稍遲緩。河渠志稿。

是月初九日奉上諭。姜晟在湖北總督任內。辦理軍需各務。種種貽誤。前據吳熊光查奏。當卽降旨。將姜晟交部嚴加議處。部議上時。必當治以溺職之罪。今京師自六月初一日起。大雨五日四夜。水勢驟長。節經朕派令乾清門侍衛等。馳往城外查勘被水情形。旋據復奏。永定河兩岸決口四處。盧溝橋一帶。幾成澤國。並經設法將各路軍報賫遞。此皆朕與廷臣集議辦理。又分命衆卿員。各路查災辦賑。衆臣均能奔走不辭勞瘁。而自初一日至初八日。地方大吏。杳無音信。殊出情理之外。保定距京甚近。值此大雨盛漲。卽鄰近地方百姓。尙應隨意留心體察。豈有京師帝居所在。爲臣子者。漠不關心。視同膜外。有如此之封疆大吏乎。若云被水阻隔。則朕近日派往之大員侍衛等。尙能策馬淌渡。接遞軍報。姜晟卽不親自前來。獨不當差人賫摺。自稱悚懼不安之意耶。乃本日姜晟奏到一摺。祇據河道稟報。內稱本年永定河河流。

未斷汛前。節次長水。實爲佳兆。又稱大雨疊沛。查明田禾尙無妨礙。真如在夢中矣。向來永定河至伏汛時。該督預行赴工防汛。上年河水未經泛漲。胡季堂尙往來工次。冒雨觸熱。致積勞成疾。乃姜晟猶稱一面預備。如應赴工。卽趕程前往督防。可謂全無人心。畿輔距京咫尺。地方大員。已玩愒乃爾。若遠省督撫。相率效尤。豈復尙成治體。姜晟之在直隸如此。其在湖北辦理軍需。廢弛玩愒。不必言矣。近因雨水過多。朕遇災增懼。不肯遷怒。節次降旨。引爲己過。卽宮庭內太監。偶有過失。方且曲意優容。豈肯於封疆大吏。有意苛求。以塞災應。但姜晟辜恩尸位。昏愎瞽亂。伊若出之有意。卽屬喪盡天良。若云全無見聞。則是形同木偶。此而不加懲辦。何以整飭官聯。經朕詢問。本日奏事之王大臣等。僉以姜晟罪因自取。必當革職拿問。若復加曲貸。轉非執法持平之道。姜晟著革職。派侍郎熊枚。帶同司員。前往傳旨拿問。卽暫署直隸總督篆務。派委妥員。將姜晟押解來京。交軍機大臣。會同刑部嚴審具奏。至永定河道王念孫。及南北岸同知。河務是其專責。今該處已有四處決口。王念孫全未知覺。猶以虛詞具稟。姜晟且那彥寶赴河干查水。住宿一夜。總未見該道等在彼看辦。均屬罪無可逭。王念孫及南岸同知翟鵬雲。北岸同知陳煜。著那彥寶。莫瞻蓁。於沿途遇見時。傳旨將伊三人革職拿問。一併解京歸案審辦。至石景山同知。亦係管理河務之員。但現在決口處所。是否該員所管工段。著熊枚查明具奏。再降諭旨。永定河志。

是月。署直隸總督熊枚奏。臣於十八日馳抵保定。接奉上諭。那彥寶等奏。查勘永定河下游河身內。並無急湍長流。附近居民。在河身內高阜處所。種植秫豆等物。其南岸隄外。並有涸出地畝。趕種晚菽等語。可見下流高仰。已非一日。若不設法。使河流仍歸故道。則南苑一帶。豈可竟成河流熟徑耶。此時伏汛盛漲。

口門一時不能堵築。惟有開挖引河。吸溜歸槽。最爲要務。著那彥寶等四人。會同熊枚。相度地勢。何處可以挑挖引河。卽稍佔地畝。亦屬無可如何。應詳酌具奏。欽此。臣查直省被水。至有七十三州縣之多。災黎嗷嗷待哺。刻不容緩。尤應與藩司悉心妥議。仍恐州縣中有未諳賑務者。已遴委勤幹妥員。馳往幫辦開賑。而災重州縣甚多。幹員不敷遴委。實不勝焦急。適趙州知州薛學詩。因公在省。該員在直有二十九年。曾任河工州縣。不但熟諳直隸土俗民風。抑且永定河上下游河道。亦素所習諳。卽於二十九日。札委晝夜兼程。星赴盧溝橋工次。預備欽使詢問。并隨往相度地勢。何處可以開挖。已向該州詳細告知。並將臣於十一日。會同欽使履勘二十三號漫決要口。據臣愚昧見及之處。亦與該州說明。令轉向欽使縷述。以備公同參商裁奪。臣擬暫駐保定數日。將放賑事宜。辦有頭緒。亦卽起程。先從永定河南北岸下游。各廳所報兩岸漫決各口處。徧行查勘。因永定河上游二十三號漫決要口。現在遵旨開挖引河。吸溜歸槽。則大溜仍由下游故道奔駛。惟北岸各漫口。約一千五百二十餘丈。南岸各漫口。約一千六百六十餘丈。現在俱不及搶堵。將來上游決口。堵塞大溜下注。須不令仍向南北岸各漫口分溢。方保無虞。現飛札永定河道陳鳳翔。飭將下游各漫口。預籌作何購料堵築。抑或卽將開挖河身淤土。挑補漫口之處。均屬其向欽使稟知裁奪。臣俟徧行履勘會議後。卽進京恭請皇上訓示。永定河志。

七月十五日奉。上諭。那彥寶等奏。請發帑銀一百萬兩。以備永定河採辦料物一摺。著照所請。於部庫內撥銀五十萬兩。內務府廣儲司庫撥銀五十萬兩。交那彥寶等。請領備用。本年永定河漫溢。所需料物。較之往年。多至數倍。而直隸州縣。多半被災。秫秸等項。不無短少。兼之道路泥濘。遠處一時不能運到。市價

昂貴。自屬實在情形。所有此次永定河工需用料物等項。著加恩准其照依市價購辦。但市價長落不一。此時雖屬昂貴。轉瞬水退道乾。價值自必日漸減落。那彥寶等。惟當隨時確查料物貴賤情形。飭令承辦之員。據實報銷。不得以目前最昂之價爲準。藉口浮冒。至河工定例。土隄漫口。係銷六賠四。著落各員分賠。至堵築石隄。及挑挖淤塞。向無應賠之例。現在永定河石土各隄決口。多至三千餘百餘丈。皆因下游高仰所致。歷任各員。因循玩悞。不肯隨時疏濬。以致下壅上潰。衝決石隄。咎無可辭。若不責令賠修。是貽悞各員。轉得置身事外。不足以昭平允。著那彥寶等估計用銀確數。查明自乾隆三十八年起。至嘉慶五年止。歷任直隸總督。永定河道。暨廳汛各員。分別正任署任。年月久暫。開單具奏。酌令攤賠。以示懲儆。河渠志稿。

是月。戶部議得侍郎那彥寶等奏。查河隄被衝決者。石工三百六十餘丈。護石隄之灰土工。一千一百二十餘丈。埽土工三千二百九十餘丈。其高仰淤墊處。所在在皆須挑挖。臣熊枚查勘被淹地方。共九十餘縣。處處皆須撫綏。大賑大工。同時並舉。若不通盤籌畫。惟恐辦理不周。查乾隆十一年。江南黃運湖河盛漲。則有江賑例。二十六年。河南黃沁漳衛諸河並漲。則有豫工例。均經部議准行。此次永定河漫水。既與從前江豫二省相同。而工賑事宜。與江豫二省無異。莫若查照江賑豫工成案。暫開永定工賑捐例。庶賑項工程。得以從容料理。億萬災民。益沐惠澤。於無既等語。臣等查賑濟辦工。需費浩繁。自應通盤籌畫。應如該侍郎那彥寶等所奏。准令士民報捐。如蒙俞允。臣等另議謹奏。奉旨依議。所有應議章程。著戶部會同吏兵二部妥議具奏。永定河志。

八月奉。上諭。熊枚查勘文安一縣。被水成災較重之區。並繪圖貼說進呈。朕詳加披閱。該處地形窪下。積水已越三年。今夏子牙。清河諸水。四面漫溢。竟深至二丈有餘不等。住居民人共計三百六十餘村。俱浮沈水中。嗷嗷待哺。朕心實增憐軫。該縣自建置縣治以來。必有舊定章程。爲疏通水道。保障居民。經久之計。是否近日廢弛不辦。並現在應如何設法疏消。百姓不致久困積潦之處。亟應講求妥辦。著陳大文悉心體訪。詳議具奏。睿皇帝聖訓。

是月。那彥寶。巴寧阿奏。臣等先於七月下旬。飭原任南岸同知翟鵬雲。帶同抄平人等。自盧溝橋至下口。一面估計。以便白露後興工挑淤。茲據翟鵬雲稟。沿河逐段測丈。除八九工俱有河形。現在該處尙存積水。難以平丈。所有自盧溝橋至下口七工。條河頭止。共計平過一百五十餘里。全河形勢。或起或伏。尙非一律高仰。查所平各工內。有大淤灘二十二段。計長八九百餘丈。高一丈一尺至三四尺不等。或中梗河心。或偏墊岸側。此必須挑挖深通者。其餘較盧溝橋第五虹底石版。漸見低窪。尙可緩挑等語。臣等見永定河自盧溝橋至下口。一百八十餘里。計長三萬二千四百餘丈。若一律高仰。必須全行疏濬。則工段綿長。恐一時難以籌畫。一經抄平。幸河形大勢尙屬北高南下。現在祇須間段疏濬。無虞阻滯。已於初六日。招集人夫。趕緊挑挖。一面挑河打壩。掣溜歸槽。務期河流及早順軌。仰慰聖懷。至兩岸之中泓。及下口。所有必須裁灣取直。並開引河分流之處。統俟明年凌汛以後。麥汛以前。再查勘挑濬。奉旨依議。永定河志。十月。那彥寶。巴寧阿。陳大文奏。臣等督率在工員弁。於十月初三日丑時合龍。邊埽戩隄。俱屬堅實。又慮挑挖淤工。稍有阻滯。則水流不暢。復派員弁沿河查探。所有原估挑挖八千九百三十二丈。及續估六千

一百八十七丈均一律深通。全河水勢復歸故道。查今歲永定河漫溢石隄四處。土隄一十八處。共三千七百四十七丈五尺。上廬宸衷。屢蒙訓示。始得次第合龍。所有北上頭工合龍日期。全河復歸故道。理合恭摺謹奏。永定河志。

是月。那彥寶、巴寧阿奏。十八日接准軍機大臣字寄。十七日奉上諭。那彥寶、巴寧阿奏。現築二十四號護隄土壩情形。並已未竣石土及應修坍塌。隙裂各工段。開單進呈。卽照所請辦理。現在天氣晴和。各工可趕緊修築。惟時屆小雪。氣候凝寒。若於凍土施工。轉恐不能堅固。著傳諭那彥寶等。酌量情形。何日凝凍。卽於何日停工。俟來年春融。再行修築。俾要工不致草率。欽此。查現在石土各工。均關緊要。若於凍土施工。轉恐不能堅固。已於二十日概行停止。查渾河水勢。長落靡常。惟資兩岸隄工。以防泛溢。其石隄工程。可期堅固。惟兩岸土隄。自乾隆五十年。加高培厚以來。十有餘載。日形卑矮。今往來籌度。所有南北兩岸舊隄。除下口七八九等工。計長八十餘里。河面漸寬。尙可從緩加築。自頭工至六工止。一百五十餘里。必須間段擇要。加倍培。並於最險要處。添築越隄。其迎溜頂衝處所。尤須備料添築埽段。以資捍衛。已飭永定河道陳鳳翔。逐段估計。預籌俟明年春融。次第辦理。永定河志。

是年。侍郎那彥寶、武備院卿巴寧阿。石土各工奏略。查永定河石工各隄。七月十九二十四等日。開工。所有石隄漫口四處。內東岸第十四號石工。較長七丈。今照依舊式。下截補砌青沙大石五層。頭臥縫下。生鐵銀錠底面灌漿。上砌片石。又加壓面石一層。背後地脚下。栢木釘築打灰土五步。上砌片石。已於二十六日修築完竣。其背後餞隄衝沒二十九丈。應築灰土三十二步。已築十二步。培護土隄二十三步。已築

四步。西岸稅局後身。不列號漫口六十八丈。現在地脚柏木釘俱已下完。灰土三步。亦經打竣。下截外皮大料石五層。現已安砌一層。背後石子。亦安砌一層。又橋南頭第二號漫口。計六十二丈五尺。內迤北四十五丈五尺。脚根尙屬結實。毋庸下釘。所有應築灰土三步。現在已築一步。南邊十七丈。尙有積水。現經淘戽。俟露出根底。再行分別土性。酌量下釘築土。至東岸第二十三號漫口一百五十餘丈。又坍塌三十餘丈。口門一帶。深處急溜衝刷。甚屬洶湧。雖時逾秋分。而正溜深處。尙有丈餘。若待消涸。堵築興修。不惟誤工。且明年凌汛。更屬可慮。惟有一面挑挖引河。一面趕築攔水壩。將大溜掣入引河。方可興工修砌。但河身積年石子層積。一切釘椿難下。因設法編用柳囤。中填大小石塊。挨次布列。以作排椿。又將秫秸鋪草包裹石子。捆紮成卷。俗名石牛。層疊囤傍。以作大埽。通計攔水大壩。長一百七十餘丈。加緊戩築。又據永定河道陳鳳翔稟報。南北兩岸土隄。旱口十七處。並展寬月隄二千八百三十餘丈。俱如舊估做法。夯礮堅實。於二十五、六等日完竣。並將頂衝緊要處所。幫鑲邊埽。其蓋頂兩幫。應用膠土。再次第添築。又第二十三號壩工合龍奏略。查第二十三號壩工。一面將壩身加高培厚。一面安鑲大埽。督夫搶築。於九月二十日酉時合龍。其壩南石子淤灘。順添勢挖深通。引河暢流無阻。現在水勢趨入北上頭工水口。又工竣奏略。所有石景山堵築石隄漫口四處。共長三百二十四丈五尺。拆補拘抵坍塌。斷裂石隄。先後估計。共長二千二百八丈。補築背後灰土素土各戩隄。先後估計。共長一千七百二十七丈四尺。又築打二十三、四號攔水壩四道。長四百六十九丈。又二十三號引河。刨挖沙石。長四百六十五丈一尺。南北兩岸堵築土隄漫口十八處。長三千四百二十三丈。補還原舊埽段。長七百四十七丈。新添險工埽段。長二

千二十九丈八尺。去秋北上頭工引河，創挖沙石，長八百五十七丈。挑挖淤灘，長一萬四千二百六十二丈。今春疏濬下口，挑挖中泓，長三千八百七十九丈。南北兩岸三角淀土隄，加高培厚，長二萬七千一百一十丈二尺。又奏略伏查永定河水，挾沙而行，急則沙行，緩則沙積。每當大汛，挾山西直隸衆山之沙，建瓴而下，至盧溝橋迤南，地平流緩，沙亦易停。及至下口，又恐其挾沙入淀，淤塞淀河。是以乾隆二十年，督臣方觀承奏將北岸六工第二十號，改爲下口，中寬四五十里，任其蕩漾，水散沙勻，俾澄清之水，由沙寬淀會鳳河入大清河。然沙有來路而無去路，非若黃河之沙，可直達於海也。日積月累，河身淤高，每逢盛漲，消納不及，遂致瀾漫。上游旣潰，下游益壅，誠如聖諭。渾河之患，總在淤沙，欲其暢流無阻，必需將全河淤沙挑挖淨盡。查南北兩岸相距自三四里至五六里不等，長一百數十餘里。下口寬四五十里，每年疏濬中泓所挖之沙，仍堆河內，原非治河善策。若將此一百數十餘里之沙，全行運去隄外，則所費實屬浩繁。果能一勞永逸，卽多費帑金，亦聖明所不惜。無如一經大汛，舊沙纔去，新沙又淤。况工程過大，一歲之中，除三汛及冰凍之時，不能一律完工，必致半途而廢。止可裁灣取直，疏通梗塞，並將卑矮隄身加高培厚，添做埽工。埽多可以護隄，隄固可以束水，水束可以攻沙。庶足暢河流而防衝刷矣。畿輔安瀾志。是年侍郎那彥寶等覆勘議請挑濬忙牛河。良鄉縣境自閘下起，工分五段，共一千九十五丈。至涿州境自陶家營起，工分七段，共二千六十一丈。至宛平縣境自長安城起，工分三段，共九百八十丈。至固安縣境自米各莊起，工分十九段，共一萬二千七百四十九丈四尺。又挑濬黃家河，固安縣境自牛坨橋起，工分二段，共九百二十丈。至永清縣境自黎行村起，工分二段，共一千二百八十丈。至霸州境自坨里村起，

工分九段。共六千二百九十丈。又挑濬北村引河。固安縣境。自灰壩以下起。工分十八段。共九千二百四十六丈八尺。口寬二丈至五丈不等。底均寬二丈。深各五尺。又奏忙牛河長一百四十七里。自金門閘至米各莊二十里內。淤成平陸。並無河身。自此以下。至黃家河。俱深暢無阻。北村引河。並未淤墊。緣金門閘口寬五十餘丈。忙牛河寬不過五六尺。河身褊淺。分洩不及。又加以今夏盛漲。閘上下兩處漫水泛溢。水過沙停。故閘口附近地方。竟至淤墊。其下游離閘較遠。因分流勢緩。沙停於上。水流於下。仍得疏通。通計忙牛河淤者十之二。不淤者十之八。下游之不淤。是曾經挑挖之驗。則現在上游之淤。顯係挑後新淤。請旨敕下直隸督臣。轉飭沿河各州縣。仍按原挑尺寸。妥爲疏濬。畿輔安瀾志。

嘉慶七年二月。奉上諭。那彥寶等。籌議永定河加培疏濬一摺。挑挖淤沙。固爲治河不易之法。但永定河南北兩岸。長一百數十餘里。自不能將全河淤沙。挑挖淨盡。該侍郎等相度形勢。裁灣取直。疏通梗塞。並將卑矮隄身。加高培厚。添做埽工。護隄束水。藉以攻沙。祇可如此辦理。惟當督飭工員。於新舊埽工。實力鑲築。以資捍衛。斷不容有偷工減料。以致工程卑薄。不能經久。其河身高仰處所。亦須間段挑濬。俾無阻梗。方爲妥善。著皇帝聖訓。

是月直隸總督陳大文奏。永定河南岸隄長一百五十四里。北岸隄長一百五十五里。又有下口南大隄八十餘里。北大隄四十餘里。及鳳河東隄斜堰五十九里。工段綿長。處處須兵保護。據永定河道陳鳳翔稟稱。永定河南北兩岸。額設戰兵一百十六名。守兵一千四十七名。工長兵少。每遇大汛。不敷差遣。請奏明酌添戰兵六十名。守兵三百四十名。分派南岸守備。北岸協備經管。酌量工段平險。添撥各汛。以資捍

衛臣查永定河南北兩岸原設河兵約計每里不及三名實屬鞭長莫及第未便於定額外再議加增當卽札飭藩司瞻柱會同臣標中軍副將武爾袞泰妥議茲據稟稱於綠營各標鎮額兵內酌核繁簡通融抽撥以歸核實而重河防查督標額設馬步守兵五千六百八十六名提標額設馬步守兵八千八百一十六名宣化鎮額設馬步守兵七千九百二十七名天津鎮額設馬步守兵六千七百六十九名核計四處兵數較多請每處抽撥戰兵十五名守兵八十五名共戰守兵四百名撥交永定河道分防各汛等情臣復悉心確核如此通融調劑於營務不致貽悞河防得有裨益糧餉仍不虛糜復咨商直隸提督特成額意見相同謹恭摺具奏永定河志

是月奉上諭陳大文奏請添設河兵以重修防永定河工段縣長原設河兵較少伏秋大汛不敷防護著照所請派添戰兵六十名守兵三百四十名分派南北岸酌量工段於險要處添設各汛卽在督標提標宣化天津鎮標戰兵守兵內抽撥其應否添設兵房著該署督悉心經理務臻妥協永定河志

三月奉上諭陳大文奏請動款修築河間縣高家口漫工派令王念孫到彼督辦一摺上年雨水盛漲河間縣高家口隄堰衝決之水自南而下灌注文安致積潦日久未消自應亟爲堵築以資捍禦其應需工料銀三千九十五兩零著准於天津清河二道庫貯河淤地租銀兩內動撥至原任永定河道王念孫係履勘原估之員於該處情形自爲熟悉著那彥寶等飭令王念孫酌帶永定河歷辦埽工之河兵卽赴河間會同地方官趕緊興工堵築務臻穩固 睿皇帝聖訓

六月直隸總督顏檢奏永定河石景山石隄東西兩岸亘長四十九里祇設同知一員外委一員汛期往

來查看。每有鞭長莫及之勢。昨與永定河道陳鳳翔等籌計。若數十里之石隄。不專設汛員。汛期防守歲修等事。恐難妥協。第設官分職。各有定額。未便議增。臣思宛平縣盧溝橋巡檢。駐劄盧溝橋。爲石景山汛內適中之地。該巡檢所管事務最簡。若改爲石景山專汛要缺。經管東西兩岸石工。仍兼管地方事務。分隸石景山同知。並西路同知管轄。每歲大汛。照南北兩岸三角淀撥夫上隄例。卽於所轄村莊內撥夫巡守。似與河工地方均有裨益。所有該巡檢印信衙署俸廉。均仍其舊。毋庸另議增減。經吏部議覆奏准。

永定河志

是年加培土隄。南岸上頭工至六工。北岸上頭工至六工。三角淀之北隄八工九工。南隄八九工。共十八汛內。長二萬七千一百十丈。加高二三尺至六七尺不等。培厚一尺至三四尺不等。侍郎那彥寶、武備院卿巴寧阿勘議奏請。得旨允行。畿輔安瀾志。

嘉慶八年閏二月。顏檢奏。各直省遇有州缺。俱設吏目一員。所以專司監獄捕務。與各省縣缺典史無異。河工本無獄捕之事。不應有吏目之名。查東河南河。並無吏目。惟永定河有涿州管河吏目一員。駐劄北岸三工。霸州管河吏目一員。駐劄北岸六工。又南運河有滄州減河吏目一員。駐劄滄州風化店地方。概不與知州同城。與獄捕事宜之名義。殊不相符。溯查原案。緣永定河原設筆帖式十二員。把總四員。雍正四年題定。將涿霸二州。於地方吏目外。各設管河吏目一員。又乾隆二十年。將靜海縣子牙河主簿。照涿州管河吏目之例。改爲滄州減河吏目。專管隄工一百餘丈。當更定之初。未經計及吏目一官。職司監獄。與管理河工之官。迥不相侔。數十餘年。未經更正。伏思設官分職。各有專司。所任之官缺。與所管之政務。

兩相歧異。自應量爲更定。以崇實政。請將涿州管河吏目。改爲北岸三工巡檢。霸州管河吏目。改爲北岸六工巡檢。滄州減河吏目。改爲滄州風化店巡檢。仍令專管河務。不得干預地方事件。其撥夫修防等事。悉照舊例遵行。毋庸更易。經吏部議覆奏准。永定河志。

是月。奉上諭。顏檢奏永定河購料情形。今昔不同。請暫準酌加運腳一摺。永定河購辦料物。向在附近村莊採買。均按例價支發。自嘉慶六年被水後。河工需用秫秸。向遠處購買。以致運腳多費。自係實在情形。著加恩照顏檢所請。除永定河下游六汛採買料物。仍照例價外。其上游八汛。辦理秸料。每束加腳價二釐五毫。以資採買。該督仍督率河道等。隨時稽查。俟數年後。附近地方可以採買。即將加價停止。仍照定例開銷。河渠志稿。

嘉慶十年六月。總督熊枚奏。十八、十九、二十等日。雨澤連宵。永定河水勢漲發。二十日辰巳二時。盧溝橋水勢陡長丈餘。連底水共一丈六尺。南北兩岸各工。在在露險。卽無埽段之工。水勢亦與隄岸相平。而南下頭南三南五北二北三北四等工。新埽陡墊甚多。均經隨時搶護。惟北岸三工四工。地勢稍低。致有漫溢。旋即挂淤。已成旱口。其北二工第二十一號。地勢亦低。因水長甚驟。漫溢三十餘丈。幸大溜仍走中泓。口內未曾掣溜。其下游水過之處。俱歸入低窪溝坎。於村莊田禾。不致損傷。日內天晴。水勢消落。現今永定河道朱應榮。及廳汛各官。晝夜搶護。臣嚴飭趕堵。務在伏汛前堵築斷流。其餘各險工。亦飭令隨時保護。永定河志。

是月。那彥寶奏。查石景山各工。均皆鞏固。盧溝橋原存底水四尺四寸。自二十日長水一丈有餘。連日長

落相抵。連底水共八尺一寸。卽由北岸往查二工漫口。行至北下頭工第二號。隄身塌斷。溜逼隄根。口門約長九十餘丈。幸隄外地面稍高。過水尙屬平穩。已掣溜三四分。在龐各莊黃村南。係宛平縣地界。隄外舊有河溝。漫水順勢南趨。署督臣熊枚。途次接見。卽傳知。面奉聖諭。飭令趕緊辦理。永定河道朱應榮。亦來接晤。並令上緊堵築。該督及該道。均凜奉溫諭。感激天恩。熊枚隨卽馳赴北下頭工。臣由南岸沿途查勘。凡迎溜掃灣之處。在在露險。喫重。各汛簽椿壓土。保護隄堰。現皆平穩。查至北岸二工二十一號漫口一處。長四十餘丈。隄身距大河稍遠。水勢仍走中泓。口門不致奪溜。過水不過一二分。業經盤護裏頭。至北二工十七號。有旱口一處。約二十餘丈。二十號有旱口一處。約三十餘丈。雖均有汕刷坑塘。堵築尙易。正河尙有大溜。自應乘時趕辦興修。但永定河汛員。各有要工。今旱口漫工數處。段落縣長。勢難兼顧。應遴調熟諳河工之員。幫同辦理。北岸三工四工。查勘有旱口五處。共百十餘丈。現已斷流。尙易辦理。永定河志。

閏六月。那彥寶奏。臣於初三日到工後。嚴催文武廳汛。遵旨先於北下頭工二號漫口。挂纜簽椿。相機進占。該處口門長九十八丈。壩前水深七八九尺。至一丈一二尺不等。雖經節次長水。尙未掣動。全河大溜。過水仍三四分。雖旬日來天氣晴霽。復恐水勢長落靡常。搶做後戩。加長壩臺。以資抵禦。催令員弁一同進占。至十七日堵築合龍。簽壓堅實。此皆仰賴睿謀預定。敬謹遵循。藉收一舉速成之效。其北岸二工二十一號漫口。長四十餘丈。過溜亦有三四分。壩前底水較深。探量水勢。計一丈二三尺至二丈不等。中有深塘一段。辦理恐稽時日。相度形勢。先於對面新淤灘上。開挖引渠。俾水勢順溜下趨。口門不致著重。現

已進占三十餘丈。後戩亦一并跟隨前進。至各工旱口七處。共一百七十餘丈。已另委妥員分投培築。永定河志。

是月那彥寶奏奉到諭旨。令將北二工漫口。剋期堵合。當即督同顏檢、朱應榮及廳汛各委員等。趁此天晴。集夫晝夜趕鑲。以期及早蒞工。查北二工漫口。寬四十餘丈。前已進占三十餘丈。緣對面淤沙。將大溜逼緊。致回溜倒漾。直衝口門埽前。水深二丈有餘。旋鑲旋墊。隨將東壩簽樁裏頭。由西壩并力搶占。至二十五日未刻。河流漲發。口門收束愈窄。溜勢愈急。一面開放引渠。一面搶鑲大埽。挂纜堵閉。頓見河流順下。口門斷流。並加鑲邊埽。幫築後靠。俱已穩固。隄外積水漸涸。至旱口七處。亦皆分投趕築。工程俱有六七分不等。但補築新舊土隄。一時最難膠固。且旱口向無邊埽。恐汛水再來。難資捍衛。已飭令加鑲。統俟普律完竣。驗看堅實。再行具報。至大河水勢。於二十五日未刻。陡長三尺二寸。處處拍岸盈隄。南北兩岸埽工業經加鑲長厚。其迎溜頂衝墊陷處所。俱經各廳汛員弁搶護平穩。惟南岸上頭工第十三號。下頭工第四號。三工第六號。四工第二號。及北岸上頭工十號。各土隄向無埽段。處所經大溜汕刷。極爲險重。非加鑲邊埽。不足以資抵禦。已分派各委員。幫同廳汛員弁。連夜搶做埽段。鑲築堅實。今水勢漸平。連底水共存九尺二寸。時屆初秋。尙恐復長。惟有欽遵訓示。嚴飭各員。小心敬慎防守。至各工應行亟籌善後事宜。俟逐細查勘確實。再行奏辦。永定河志。

嘉慶十一年正月。直隸總督裘行簡奏。永定河南北兩岸。分界立汛。每汛經管河隄。自十八九里至二十七八里不等。惟北岸頭工。宛平縣主簿。分管四十七里。在在出險。修防甚爲緊要。原設主簿一員。駐筭四

十二號其上游隄工實有鞭長莫及之勢。經前督臣袁守侗奏准將三角淀屬之南隄九工武清縣縣丞移駐。分管一號至二十二號河隄二十二里。其二十三號下至工尾仍令宛平縣主簿經管。分爲上下兩汛。自分汛以來二十餘載巡防尙屬周密。迨嘉慶六年伏汛河水異漲上下兩汛新生險工上年大汛水勢疊漲河流側趨致北岸頭工上汛十號又生新險據該管河道朱應榮議請將下游之三角淀屬北隄九工武清縣主簿移駐北岸頭工與原移上汛武清縣縣丞宛平縣主簿分作三段各令分管巡防較爲周匝。臣查地方情形有今昔不同需員經理隨時酌改以裨要工。今臣親往履勘似應如所請將三角淀屬北隄九工武清縣主簿移駐北岸頭工作爲上汛。分管隄長十五里。原移上汛武清縣縣丞作爲中汛。分管隄長十六里。原設下汛宛平縣主簿仍爲下汛。分管隄長十六里三分各照原銜毋庸另請關防。北九工汛務卽歸於北七八工兩汛分管。如此酌量移駐於要工益資防護。永定河志。

是月奉上諭裘行簡奏稱永定河南北兩岸嘉慶六年十年俱有新生險工及水刷隄根之處。今昔情形實有不同。原設汛員不足以資照料。著照所請將下游工平之三角淀屬北隄九工武清縣主簿移駐北岸頭工作爲上汛。原移上汛武清縣縣丞作爲中汛。原設下汛宛平縣主簿仍爲下汛。其北九工汛務卽歸於北七八工兩汛分管。至應撥河兵及籌款另建衙署等事並著照例辦理。永定河志。

是月裘行簡奏永定河道朱應榮稟稱永定河南北兩岸隄工歷年旣久河底漸高其險工近已埽與隄平其平工無埽之處日就卑矮汛水略長難資抵禦。目前形勢築隄實所宜急至石景山石隄亦有河高隄矮之處應添設石子堰過水以資保護。現在擇其尤急者逐段確估具稟。臣於上年十二月二十一日

赴工查驗。南北兩岸險工林立。若再加鑲。亦無後靠。且上年漫溢各工。雖已堵築完竣。而隄工尙未加培。其石景山石隄。亦有應需添築之處。仰懇聖恩。俯准乘此春融。趕緊辦理。以備大汛。永定河志。

是月奉。上諭。裘行簡奏。補築永定河隄工程一摺。著照所請。乘此春融。趕緊辦理。以備三汛。所有估需加培土工銀一萬九千零。著於永定河道庫貯內。先行動撥。永定河志。

是月奉。上諭。據裘行簡奏。直隸舊有千里長隄。自乾隆三十七年。大加培築之後。已閱三十餘載。其新舊格淀隄。自乾隆十年二十二年增築以來。亦久未辦理。現在隄工卑薄處所。多被衝刷。河水淤塞。各水縱橫。四注平野。不可不亟講疏築。請先撥帑銀四十萬兩。趕緊興修。仍於蘆商本年鹽價內。每觔酌增制錢一文。以盈餘所入之數。補工程撥用之需等語。直隸千里長隄。及新舊格淀隄兩項工程。年久塌卸。附近民田多成巨浸。自不可不講求疏築。俾霑樂利。但如裘行簡摺內所稱。在於蘆商鹽價內。每觔酌增錢文。以資撥用。此則不可。鹽觔加價一事。原爲恤商起見。從前間因商力疲乏。錢價過賤。暫時准行。但究屬病民。非可引以爲例。屢經降旨飭禁。此時辦理工程。與商人全無干涉。伊等有何賠累之處。轉欲藉此增加鹽價乎。朕於民生利賴之舉。卽多費帑金。從無靳惜。所有此項隄工。需銀約四十萬兩。卽著撥動正帑。交戶部查明。在於長蘆鹽課項下。酌撥應用。若該處課項不敷。並著另行籌撥。以資興築。各需該署督惟當督飭承辦工員。認真經理。確估實銷。務期工堅料實。俾小民永資利益。無庸於鹽務中屑屑籌費爲也。睿

皇帝聖訓。

六月。裘行簡奏。臣奏報雨勢情形摺回。欽奉硃批。十二十三日大雨。工程有無妨礙。據實具奏。欽此。查初

十日後雨水較大。河流屢漲。南岸四工第二號。因對岸溜陡折橫趨。直向南注。岸前老灘。汕刷逼近隄根。趕下埽個。十三日午後。雨勢滂沛。至十四日寅時。勢尤傾注。埽前水深三丈有餘。隨鑲隨墊。幸竭力搶護。將埽頭裹住。趕緊鱗次下埽九段。簽椿壓土。並將對面沙嘴。趕緊挑挖。十五日後。各段埽工。均已站住。十六日申刻。雷雨後。十七日寅時。上游疊次長水。由埽工各段衝刷而過。至未刻。中段埽工。忽復墊陷。趕緊鑲壓。復加釘椿木。搶護無虞。惟全河溜勢。對向南趨。隄工著重。現度形勢。擬將對岸坐灣處所。挑挖溝槽。並兩岸迎溜之處。加築挑水壩一座。以期溜走中泓。兩岸險工。均歸平易。奉硃批。實力妥辦。庶期安瀾。永定河志。

七月。裘行簡奏。十九日臣自密雲途次。接永定河道朱應榮稟稱。十二、十四等日。永定河逐次長水。一丈四尺有餘。北岸五工。向來雖係舊險。久已淤灘。化險爲平。並無埽段。詎連日水勢陡長。該處大溜湍急。變爲迎溜頂衝。兼隄外減河一道。瀝水甚深。逼近隄身。內外皆爲水灌注。十六日夜。風暴浪激。大溜直漫隄頂。於十七日丑刻。坍塌隄身一百餘丈。漫水由減河下注。口門水深四五丈。現在盤壩裏頭。趕緊堵築。臣接閱之下。不勝惶悚。伏查該處。雖係平工。但舊日口門處所。須防溜走生險。自應先事防範。乃至水漫隄頂。坍塌隄身至一百餘丈。實屬疎玩。應請將北岸同知田宏猷。汛員孔昭誠。革職留工効力。道員朱應榮。先摘去頂戴。與臣一并交部嚴議。現已飛飭該道多集人夫。趕緊堵築。永定河志。

是月奉上諭。裘行簡奏。永定河北岸五工十號。被水漫溢情形一摺。永定河北五工。因水勢陡長。大溜湍激。坍塌隄身一百餘丈。漫水由減河下注。口門水深四五丈。亟應趕緊堵築。昨經諭令該署督。趕回古北。

口一帶往來督修橋座。今永定河現有漫工。係屬該署督專責。且京中現無熟悉工程大員。可以派往。因思古北口內外各橋座。俱已派員督修。均可如限工竣。竟無庸該署督在彼照料。途間現有臬司楊志信隨扈。卽該署督循照向例。亦不過至古北口送駕。何必因此數日追隨。以致堵築漫工。稍有耽延。該署督迅速前來請訓。馳赴工次。督率道員朱應榮者。趕緊堵閉斷流。及早竣事。其下游被淹處所。該署督已派員往查。務卽勘明。係何州縣。是否成災。如有應需撫卹之處。著據實具奏。毋致失所。永定河志。

是月奉上諭。前據鐵保等奏。請將候補道員陳鳳翔發往南河委用。業經降旨允行。嗣襲行簡以直隸現有查辦地畝倉儲等事。又請將該員簡發直隸。其時南河工程事務繁多。且鐵保等奏請在前。若復將陳鳳翔改發直省。事涉紛更。當經飭駁。今永定河北岸有漫口隄工。急需妥員經理。因思南河節次發往差委人員尙多。陳鳳翔於江南河務情形。素非諳習。伊前因辦理永定河漫工。擢授道員。賞戴花翎。本係熟手。昨已有旨。將朱應榮先行摘去頂戴。交部嚴議。議上時。亦必開缺。所有永定河道員缺。卽著陳鳳翔補授。該員行抵何處。接奉諭旨。卽速赴新任。堵築漫口。朱應榮仍令在工幫同辦理。如果漫口堵合後。另行賞給差使。永定河志。

十月初一日。永定河道陳鳳翔奏。永定河北岸五工漫口工程。兩旬以來。趕緊加鑲。上月十八日後。逐步進占。迎水加鑲邊埽。壓土簽椿。背後幫築戩隄。兩壩俱下沈水大埽。至二十九日。口門水僅寬三丈六尺。溜勢愈急。委令保定府同知楊映昶督催引河。臣親往查驗。俱能如式深通。因口門對面老坎。逼緊溜勢。直注口門。兩壩喫重。復於老坎上首。開挖河槽一道。長一百一十三丈。裁灣取直。分洩大溜。俾合龍時易。

於施工仍歸入引河直達下口。臣先期親至下口測量地勢雖不高仰但歷來係散水勻沙之處誠恐水勢至此稍有停蓄隨飭令楊暎昶帶領兵夫添抽河槽二道共長七百九十三丈寬三尺有餘深二三四尺不等俾上下一律深通宣洩益爲迅速十月初一日寅刻得以合龍加壓厚土甚爲堅固一面開放引河頓見大溜建瓴直注河流得歸故道永定河志。

是日奉上諭本日據直隸永定河道陳鳳翔奏永定河北岸五工漫口工程兩日以來趕緊加鑲逐步進占另行開挖河槽宣洩大溜已於十月初一日寅刻合龍河流得歸故道並前任道員朱應榮在工奮勉出力請與辦理鑲築事宜出力之原任北岸同知田宏猷主簿孔昭誠可否照例開復其餘出力各員另行繕單奏懇施恩等語永定河北岸漫口亟需堵合今既合龍完善署總督又未接篆該道自應趕緊奏報至摺內遽請將原任道員朱應榮等開復其餘出力各員一并開單保奏籲懇施恩殊屬冒昧太覺膽大越分此風斷不可長保舉工員乃總督應奏之事該道既知該省總督出缺豈有如此大員不卽簡放派署之理自應俟總督到任後稟請保奏况朱應榮卽係由道員降調知府亦係方面大員與陳鳳翔品秩相等由該道保奏實乖體制卽云伊等實係在工出力何難於摺尾聲明聽候新任督臣核辦而必汲汲爲此奏乎陳鳳翔先經發往南河差委嗣後簡放永定河道所有北岸漫工原非伊任內之事此時堵築合龍本應加以甄敘惟伊此摺越分保薦大屬不合殊有應得之咎著毋庸交部議敘亦不必再與議處其摺單所奏出力各員籲懇施恩之處著交署督秦承恩秉公核辦具奏請旨永定河志。

是年署總督裘行簡奏請加築南岸上頭工下頭工二工至六工隄長六千三百十七丈築圈堰一道長

五十八丈。雞嘴壩一段。長五十五丈。又加築北岸上頭工、中頭工、下頭工、二工至六工。隄長九千八百二十七丈五尺。加築圈堰三道。長二百四十四丈五尺。石景山汛東岸。加築石子堰工十三丈五尺。折做隄頂片石五十五丈。片石隄頂之上。加高新砌石子堰。長一百七十二丈五尺。得旨允行。畿輔安瀾志。

是年。裘行簡奏。南岸四工之第二號。向無埽段處所。隄身迎溜頂衝。漸見塌裂。請於隄前添築魚鱗邊埽十一段。長六十一丈一尺。寬一丈一二尺至一丈七八尺。通高九尺。加鑲十八層至二十一層不等。嗣因溜勢上提。復於埽鑲迤西。添築磨盤壩一座。計三段。長十四丈五尺。通高九尺。加鑲十八層至二十層不等。並在對岸坐灣處所。挑挖引河一道。以資宣洩。長五百二十丈。面寬八丈至十六丈。底寬六丈至十四丈。深四尺至八尺。第二三號加培隄工。長二百丈。內分二段。原隄頂寬一丈五尺。至二丈四尺。頂寬二丈八尺至六丈。外高五尺至七尺。幫加頂寬一丈八尺至三丈五尺。底寬一丈至四丈二尺。高五尺至七尺。又南頭工下汛第七號。添築五段。北頭工上汛第八號。添埽十一段。俱得旨允行。畿輔安瀾志。

嘉慶十二年二月。直隸總督溫承惠奏。永定河挾沙而行。遷徙無定。入夏盛漲。則溜勢湍急。秋後水緩沙停。則易於淤墊。是以上游下口。逐漸淤高。一綫單隄。日形卑薄。此時欲圖久安長治。自當將河身大加挑挖。兩岸隄工。普律加培。然經費浩繁。辦理不易。且亦不過數年平穩。轉不若先事預防。盡目前補苴之法。臣仰蒙委任深恩。不敢不綢繆未雨。緣自石景山至南北兩岸履勘。與道員陳鳳翔。及年久之營汛弁員。悉心講求。現在盧溝橋石隄。東西岸僅高出水面數尺。距嘉慶六年挑挖時。河底已淤高丈餘。其南北兩岸河身。高坎嫩灘。不一而足。兼有雞心灘。挺峙河心。分溜頂衝。隄工必致喫重。而隄面隄幫。殘缺卑矮之

處又難枚舉。隨面詢該道。每歲設有歲搶修銀兩。何以工段如此廢缺。據稱常年疏濬中泓銀兩。裁灣取直。尙屬不敷。若河中生灘。施工更多經費。歷來未曾籌辦。至每年歲搶修。向無加培隄工土方銀。隨身又經風雨摧殘。車馬踐踏。是以日形卑矮。臣伏思河工守護。全在隄防。不但衛護田廬。且可攻淤束水。刷深河槽。如果兩岸隄工堅實。則溜勢自趨中泓。下游日收暢注之功。上游自免潰決之患。今大隄卑薄殘缺。河心又多淤灘。轉瞬大汛。在在可虞。隨飭令該道等。將現在隄身卑薄殘缺等處。及坎灘之迎溜頂衝。最關緊要者。按段估計。確實詳報。茲據該道等估報。再四籌酌。實關係大汛必不可緩之工。需用工料銀七千餘兩。謹開具應修工段丈尺銀數清單。繪圖貼說陳奏。俟奉到批回允准。卽於藩庫動支銀兩。責成該道陳鳳翔。董率各廳營汛員弁。及早興工趕辦。務於大汛前完竣。臣隨時嚴察。設有草率偷減情弊。據實嚴參。永定河志。

是月奉。上諭。溫承惠奏。詳勘永定河情形一摺。河工隄岸。最關緊要。今永定河因河底淤高。隄身日形卑溝。自應及早加培。以資捍護。所有此次估計工料銀七千餘兩。著照所請。卽於藩庫動支應用。該署督惟當督率道廳員弁等。剋日興工趕辦。務於大汛前一律完竣。核實題銷。毋任稍有草率偷減。永定河志。六月。水勢盛漲。北岸四工第二十四號漫溢。隄頂總督溫承惠。請築月隄一道。長一百八十二丈五尺。頂寬三丈。底寬六丈六尺及十二丈。高六尺及一丈一尺。一丈五尺。一丈八尺不等。奏略。查北岸四工第二十四號。因十九日盛漲漫頂。當經該道廳將土隄趕緊加培。並築順水壩。以防再漲。業已奏明。臣此次勘該處隄身。最爲卑矮。因水漲太驟。以致漫溢。究與迎溜頂衝。微有不同。維時水勢甫退。添築順水壩。已

能得力。此時細察形勢，仍須加長，改成月隄，於重門保障之道，更爲有益。畿輔安瀾志。

七月，溫承惠奏：永定河汛官均係經手錢糧，專司河務，但南岸七工原設州同一員、州判一員、縣丞四員，北岸八汛僅有縣丞一缺，餘皆主簿巡檢等官，推原其故，當日河流皆走南岸，險工林立，錢糧較多，是以汛員職分加優。自嘉慶六年後，北岸工程情形與南岸無異，而汛官階級仍然官小，則呼應不靈，且屢陞仍係佐貳，亦未足勵其奮勉之心。於河防國帑，實不足以昭慎重。自應酌量變通，將北岸各汛改爲州判、縣丞，以崇官階而重職守。臣與藩司慶格、永定河道陳鳳翔等，公同商酌，所有北岸八汛除頭工中河一缺，原設縣丞足資料理，其餘悉應更改，惟各省缺額本有一定，未便率請增添，莫若就河缺中擇其並無險要工程者，互相更換。茲查三角淀所屬壩州淀河州判、南隄七八工縣丞，所管皆永定河下口，止有疏濬工程。又薊州管河州判、正定元城、玉田三縣管河縣丞，皆無防險要工，較北岸各工輕重迥別。若將以上州判二缺、縣丞五缺，改歸北岸各工，而移北岸之主簿巡檢七缺，分置於三角淀等處，則永定河北岸防守險要，經手錢糧更足以專責守，其本無要工處所主簿巡檢已足分防照料，一轉移間，實於工務有裨。其俸廉役食衙署等事，悉隨缺轉移，毋庸另行增減移置，惟各員印信鈐記請敕部另行頒換，以昭信任。經吏部議覆奏准。

永定河北岸擬改缺分開列清單：

北頭工上汛、武清縣主簿擬將玉田縣縣丞一缺移置北頭工上汛，改爲武清縣縣丞，其玉田縣縣丞改爲主簿。

北頭工下汛、宛平縣主簿擬將元城縣縣丞一缺移置北頭工下汛，改爲宛平縣縣丞，其元城縣縣丞改爲主簿。

北二工良鄉縣主簿擬將三角淀屬南隄七工、東安縣縣丞一缺移置北二工，改爲良鄉縣縣丞，其東安縣縣丞改爲主簿。

北

三工涿州巡檢。擬將薊州州判一缺。移置北三工。改爲涿州州判。其薊州州判。改爲巡檢。北四工固安縣主簿。擬將正定縣縣丞一缺。移置北四工。改爲固安縣縣丞。其正定縣縣丞。改爲主簿。北五工永清縣主簿。擬將三角淀屬南隄八工。武清縣縣丞一缺。移置北五工。改爲永清縣縣丞。其武清縣縣丞。改爲主簿。北六工霸州巡檢。擬將霸州淀河州判移駐北六工。作爲北六工霸州管河州判。其巡檢移駐淀河。作爲霸州淀河巡檢。永定河志。

是年溫承惠奏請石景山石隄東岸二十一、二、四等號。河底淤高。隄形卑矮。應加石子子堰。一百八十三丈。南岸土隄南上頭工第十二號。溜近隄根。加高培厚。工長五十五丈。南下頭工第七號。險工培厚。工長一百八十丈。南下頭工第八號。險工加培。工長一百八十丈。南二工第十三號。險工加高。工長三百六十六丈。南三工第十七號。隄身卑薄。恐生新險。加培。工長一百八十丈。南四工第八號。隄身卑薄。恐生新險。加培。工長一百三十丈。南四工第二十五號。溜近隄根。培厚。工長九十丈。南五工第二十二號。險工加後。餞工長九十丈。南六工第十八號。溜近隄根。加培。工長一百八十丈。北岸土隄北頭工上汛第七號。隄身卑矮。加高。工長二百丈。北頭工上汛第十號。隄身卑矮。加高。工長一百丈。北頭工中汛第十二、三號。恐生新險。加培。工長一百六十丈。北頭工下汛第十三號。恐生新險。加培。工長一百八十丈。北二工第二十一號。險工加培。工長八十三丈。北三工第十二號。險工加培。工長六十七丈。北三工第十三號。月隄。隄身卑薄。加培。工長二百三十丈。北三工第十八號。恐生新險。加培。工長七十二丈一尺。挑挖老坎二處。南五工老坎與北五工相對。遂致兩工皆迎溜頂衝。應挑挖深通。以洩大溜。長四百七十三丈。深五六尺不等。面寬

十六丈底寬八丈北三工老坎與南四工斜對挑溜直衝南四工第二三號甚爲險要應挑挖以順溜勢長三百八十九丈深六七八尺不等面寬十五丈底寬七丈五尺得旨允行畿輔安瀾志

十一月奉上諭溫承惠奏永定河埽段加增料物不敷購辦懇請酌添銀兩一摺所奏非是各省工程料物部中遵照定例覈銷一切例外加增之款在所必駁如果工程緊要料價實昂則部駁上時朕仍格外施恩量加允准若外省所奏情形不確跡涉冒濫卽部臣不加覈駁豈能妄邀允准永定河南北兩岸工程歲修搶修銀原共祇二萬二千兩迨嘉慶七年那彥寶在彼辦工之時曾奏請增添歲修搶修銀二萬二千兩數已加培原因六年異漲非常年所有彼時該處兩岸附近村莊產料不多一切添辦埽工購運實屬不易是以特旨允准自增添以後不過數年今溫承惠又以兩岸險工續添新埽需用料物加鑲輒欲再增歲修搶修銀一萬八千兩似此逐年增添伊於何底永定河距京甚近設真有險要工段所需料物較多朕何難立派大員前往查辦今若以尋常工段動議加增易滋冒濫之弊所奏不准行溫承惠著傳旨申飭睿皇帝聖訓

續行水金鑑卷第一百四十四

永定河水章牘十

嘉慶十三年正月初八日奉。上諭。國家經費有常。凡定額之外。斷不能屢議增添。前據溫承惠奏請。酌添永定河歲修搶修銀兩。業經降旨飭駁。茲據稱經費不敷。請動款豫買料物。以備另案險工支用等語。事尙可行。著准其照數於司庫內每年豫領銀一萬兩。俾先期豫購料物。貯工備用。仍歸入歲搶修項下報銷。並著嚴飭各屬。覈實經理。毋任稍有偷減浮冒等弊。河渠志稿。

二月。溫承惠奏。永定河隄岸向無加培土方銀兩。且多年均未修葺。卑矮殘缺。不足以資防禦。而北岸爲尤甚。上年查明緊要處所。奏請另案加高培厚。是以伏秋兩汛。疊次盛漲。幸仰荷鴻庥。保護無虞。惟工段縣長尙多未經修葺之處。飭永定河道陳鳳翔查得盧溝橋稅局後身。沙淤幾與石隄相平。須加砌石子堰二段。又南北兩岸土隄內幫。多被大溜汕刷。隄頂又爲異漲衝激。須另行加培。謹開具應修工段丈尺銀數清單。恭摺謹奏。永定河志。

是月奉。上諭。溫承惠奏詳勘永定河情形。尙有應辦要工。據稱盧溝橋稅局後身。加砌石子堰二段。又南北兩岸土隄內幫。亦須另行加培。估計共需工料銀一萬八千四百五十餘兩。此項工程。旣關緊要。自應及早修培。以資防護。著准其在藩庫項下。動支銀兩。擇吉興工。該督惟當責成。該道陳鳳翔。董率各廳營汛員弁。分投趕辦。於大汛前一律完竣。但必須料實工堅。不得稍涉草率。致滋浮冒。永定河距京密邇。將

來工竣後。朕隨時簡派大員。前往查驗。設有偷減情弊。不難查明懲治也。永定河志。

閏五月。奉上諭。德瑛等奏。勘明直隸隄河橋道閘壩各工一摺。並開繕清單。繪圖貼說進呈。朕詳加披閱。此次估修千里長隄各工。經德瑛等逐一收驗。覈與原估冊報。大率相符。溫承惠飭屬承修。均能如式。所辦尙好。自此次修築之後。不惟保護民田。兼以興復水利。實於閭閻有裨。惟隄工地段縣長。每遇大汛盛漲之時。不能無汕刷殘缺。若不隨時修補。必致日久傾圮。既恐貽害田廬。兼且重糜帑項。殊非經久之計。朕本年春間。臨幸淀津。諭令將沿途行宮座落。派人看守。籌款黏補。原以其修理本已完善。若復勤加葺補。則所費無多。而工程益臻鞏固。况隄工關係民生。較之行宮座落。更爲緊要。豈可稍任廢弛。在地方官之意。未必不以清蹕經臨。鑾輅駐止處所。倍須敬謹修葺。殊不知朕省方時巡。卽爲閱視河隄。求莫求寧起見。地方官正不得稍有疎懈也。著溫承惠將此項工程。應如何責成地方官。定期呈報。隨時修補。及防護鞏固者。如何量加獎勸。因循廢弛者。如何酌予懲處。務須悉心籌議章程。俾不致玩視要工。庶隄身永臻穩實。民田廬舍。均資利益。卽須酌籌歲修經費。諒亦爲數無多。辦理自易爲力。至格淀隄工。原係攔截子牙河渾水。不使灌入淀河。從前不惜帑金。庀工建築。自有深意。若此時不加修補。任其殘廢。則子牙渾水灌入淀河。必致受淤爲患。著溫承惠飭令地方官。再行詳查設法修補。即使毋庸修葺。亦當將實在緣由。詳悉奏聞。以憑酌覈。所有文安。大成。天津等縣各工丈尺。與原估不符之處。著工部查覈具奏。 睿皇帝聖訓。

六月十三日奉上諭。甘省爲黃河上游。每遇汛期水漲。俱用皮混沌裝載文報。順流而下。知會南河東河。

各工一體加意防範。得以先期籌備。因思永定河發源於晉省渾源州。該處水勢情形。設遇汛期加長。亦應速行知會下游。豫爲防護。著該撫飭知渾源州。隨時稟報。儘察看水勢增長。卽由六百里一面具報直隸總督。一面呈報軍機處。勿稍遲滯。並著成寧將該省現在雨水情形。及渾源州水勢如何。速行查明具奏。以慰廑注。河渠志稿。

是年尙書德瑛劉權之奏。查此次估修千里長隄。自高陽劉家溝起。至大城南趙扶村止。環峙淀南。實爲附隄七州縣民田保障。除沿隄高阜村莊。毋庸修築老隄外。計現修隄工。共分七十段。長四萬二千三百四十六丈四尺五寸。臣等按照估冊丈勘。其頂底高寬長丈。悉屬相符。間有數段尺寸。較原估寬餘。試驗做法。亦均結實。惟高陽保定土性帶沙。歷試錐籤。間有滲水。又任邱第三段至十段。霸州第一段至第三段。隄工均兩面夾水。其隄根護土。應於原估尺寸外。加厚加寬。以防汕刷。臣等已飭汛員再加夯礮培築。並令沿隄補種柳樹蒲葦。俾資遮護。臣等查工時。近隄紳士居民等。僉稱此處隄堰。向係民修。保護田廬。自嘉慶六年大水衝刷後。小民無力修培。仰蒙皇上發帑修築。兩年來此數百里民居田廬。普慶安瀾。頂感天恩。籲懇據情轉奏。迨行至蘇家橋望窪亭一帶。遙見文安窪麥隴連雲。以積年淀水所佔之區。此日盡成沃壤。益仰聖主深仁厚澤。伏思此項隄工。向資民力。今蒙皇上發帑興築。屹峙鼎新。尤應於南隄後保護有方。除尋常浪窩水溝獾洞。飭令隨時填補。至每歲盛漲時。及水退後。似此長隄。不能無一二處汕刷殘缺。應令地方官諭民通力合作。加意修培。惟奉行日久。易致懈弛。其應如何督飭經理。請敕下直隸總督。飭屬妥議章程。按時稽察結報。以裨要工。至格淀新舊隄。並格淀疊道。自文安三里灘起。至天津西

沽砲臺止。共分七十二段。通長一萬七千九百八十五丈。內惟靜海工段丈尺。與原估相符。其文安大成天津隄工。以上年水刷過甚。頂底丈尺。間與原估不符。臣等丈量時。另行分段註單。俟工部按照土方銀兩覈算題明。著落承辦之員賠交。查文安新格淀隄工。南三里灘積水寬長。中有民舍。盡被水圍。詢係去年子牙河泛漲。大城臨河民堰。被衝灌入。四無出路。該民懇求暫開格淀新隄一段。以洩積水。臣等察看積水。均已澄清。不妨暫開一段。俾瀉入淀河。可無淤淺。是以卽飭文安大城兩縣。就三里灘地最低處。各挖隄數尺。以資宣洩。現在涸出十之六七。而歸入淀河之水。尙在涓涓不息。俟積窪處再有消滅。卽令於汛前補築完善。該居民踴躍樂從。無須再動官項。其迤南王家口民堰。經大城縣勸令百姓。興工補足。不致再患積水。惟天津蝦蟆窪。格淀疊道。長五里有奇。據天津道稟。該處地極窪下。土性又不凝結。且界在天津子牙兩河間。風水汕刷。屢築屢衝。今春該縣奉文勒限賠修。彼時兩面皆水。無計施工。這後商用排椿葦草。層層加壓。保護隄根。始克竣事。而現在尙不免缺陷。是以所修丈尺。不能與原估相符。此處工程。若盛漲經臨。力難保護。臣等詳閱該處工段。長九百三十餘丈。察勘隄根。實係排椿束草。是修築不易。而現在楊柳青等村居民。尙復請開涵洞。以利民田。查該處兩面瀕河。近隄地畝無多。非文安大城可比。若值水落。則南北兩面涸出之地。皆可種植。若經盛漲。皆係積水。卽開設涵洞。仍無消路。村民不過欲藉涵洞。以圖小舟貿易往還。而於隄工實屬非宜。是以未經允准。且建隄之意。原爲分別清渾。免致淀河淤淺。而設。曾經裘曰修等請將靜海當城以東之隄。改爲疊道。較原隄稍低。意謂子牙河水溜沙多。盛漲時隄低易漫。隄高易缺。漫過則沙少。決口則沙多。亦豫防淀河受淤之見。今子牙河身已高三四尺不等。若無

此隄攔護。則渾水串入淀河。必致受淤。現在子牙河下游。業經督臣溫承惠。於王家河以下。挑濬二千三百餘丈。導使東趨。由大紅橋匯入北運河。並於王家河添築攔水壩二道。阻其北注大清河之路。又挑挖紅橋以下支河七道。以資分洩。計盛漲時。當不虞橫溢。就此時形勢而論。該隄於民田廬舍。不甚關係。毋庸按照原估丈尺補築。惟此隄隔別清渾。究不可少。況經興修。未便任其殘廢。請敕交直隸督臣。飭令地方官隨時察看。就現築丈尺設法修補。卽遇汎水盛漲。不致前功盡棄。非特帑項不致虛糜。且於隄防有益。至各疊道。自雄縣十里鋪至鄭州西關止。共十四段。長二千二百四十六丈。又靜海當城至楊芬港疊道。長三百九十丈。又獨流村疊道。長八百九十三丈。又天津海河疊道。自馬家口至水師營。共一百一十一段。長一萬七百二十六丈。其高寬丈尺。與原估相符。內趙北口一帶。爲南北往來衝途。不免間有墊陷。已飭地方官隨時修補平治。其當城至楊芬港疊道。查該督原奏清單。並原估細冊。均開三百九十丈。臣等履勘。計長十餘里之多。且內有缺口三四處。詢稱疊道原長二千餘丈。零星逐段估修。實止三百九十丈。其烏龍口殘缺。實因海水難以施工。且隨修隨塌。春間卽用浮橋接搭。以供車馬經行。該處舊有工段。略加修築。除三百九十丈外。均不在估修之內。臣等查本非大路。卽或因伏秋盛漲。汕刷亦無庸再加修築。又挑濬河道。自任邱大清河至天津西沽。與北運河會流處。共挑成三十五段。通長二萬九千四百一十二丈。逐一測量。中泓水深七八尺不等。兩岸河底水面。較原估丈尺。有寬深而無淺窄。現在船隻通行。下游會流處。亦皆通暢。惟子牙河下游支河七道。現在水未出槽。並無分流之水。察看紅橋以西。均有挑挖河形。其橋東會入北運河處。潮汐往來。漸形淤淺。已飭該縣於汎水漲發時。卽就原挑處分道抽溝。俾暢

達以順水性。又橋梁閘壩各工。均按照估冊。切實驗收。其丈尺椿料。均屬堅固如式。畿輔安瀾志。是年溫承惠奏。千里長隄。新舊格淀隄。及各處疊道橋閘。並挑淤等工。經前署督臣裘行簡。派員勘估。奏委清河道胡鈺。天津道沈長春等。督率各州縣。分段趕辦。上年八月。臣復親勘。間有未能如式。及被水汕刷殘缺平墊之工。卽飭該道等。照估續加修復。查清河道承辦天津挑濬子牙河。並築攔水壩。共估銀二萬一千五百七十兩。又天津道承辦文安。大城。靜海。天津等格淀大隄。及靜海格淀疊道。獨流等處橋座。原續估工銀十五萬二千一百五十八兩。臣復覈與原案相符。再天津等境內。格淀隄工。前經各員。照估修築完竣。緣地勢低窪。界在大清子牙兩河間。上年水勢浩瀚。漫過隄頂。致各工多有殘缺平墊。及水落已值天寒。未能培補。前已奏明。今歲春融冰泮。卽飭天津道督同各縣。趕緊加鑲補築。業已完整。惟間有水中撈泥處所。辦理較難。且連日大風。又加汕刷。未復原估尺寸。現仍趕緊培補。畿輔安瀾志。

嘉慶十四年二月二十八日。奉上諭。昨日溫承惠奏。永定河添備料物。豫支銀一萬兩。懇請增入歲搶修報銷。已降旨。每年加增五千兩。作爲定額。並准於例支歲搶修二項下。每年豫支一萬兩。以備工用矣。因思上年伏秋大汛時。雨水連綿。永定河水漲發。險工疊出。經該督飭令道廳各員。支領銀兩。添備料物。堆貯工所。隨時鑲護。得資穩固。是上年備料銀一萬兩。尙無浮冒情弊。著加恩准其另款題銷。嗣後歲搶修已加賞銀五千兩。不得於額外復有增添。睿皇帝聖訓。

嘉慶十五年正月。溫承惠奏。永定河兩岸隄工。土性純沙。難以堅久。須隨時加高培厚。庶足以資防禦。茲據該道王念孫。查明應辦加培工段。擇節估計。具稟請奏。臣親赴查勘。所估各工。實係應辦。謹繕具應修

工段丈尺銀數清單。敬呈仰懇聖恩。俯准辦理。俾險工得臻鞏固。永定河志。

是月奉上諭。溫承惠奏請動款加培永定河兩岸隄工。據稱該處土性純沙。經車馬往來踐踏。易致卑薄。現飭永定河道王念孫查明應辦工段。上緊加培。樽節估計。共需例價銀一萬四千八十八兩零等語。自係應辦要工。著准其照例動款培修。該督卽飭王念孫等認真妥辦。務須工堅料實。以資經久。毋任承辦之員稍有偷減情弊。永定河志。

五月初九日奉上諭。畿輔水利關係民生。必須盡力講求。通盤籌辦。今唐沙等河七十二川之水。向由西淀入東淀。分三股下注者。近年自趙北口十二連橋以外。已多淤墊。又北股中股。悉皆淤塞。僅存南股一線單渠。以洩上游諸大川之水。其勢自難容納。而東淀下游至楊家河一帶。二百餘里。又復節節於淺。以致上游往往潰決。附近各村莊地畝。處處被淹。小民種藝無成。逃荒失業。每年議賑補救不遑。而各處大道通衢。亦常被水淹浸。以致車馬不便。有礙經行。殊非體制。溫承惠稱約計需數百萬金。一時礙難請撥。且南河大工尙在未竣。應俟經費充裕。再行辦理。今先委員將趙北口以下淤沙。擇其至要之處。相機疏導。並勸用民力辦理等語。所見尙淺。國家經費有常。原不可以濫用。然關係生民要務。則不容靳惜。若必俟南河一切工竣。始行興辦。則南河工程甚多。難以剋期辦竣。豈有因此而令畿輔要工延誤之理。至於民力有限。勢必不敷。徒滋科派之累。此事竟常通籌全局。發帑興辦。以籌水利而衛民生。因思天津鹽務加價一項。本爲南河辦工而設。今卽移以辦直隸河工。同係正用。此外尙有天津關稅一項。著溫承惠卽與嵩年查此兩項。每年應解戶部內務府者。共有若干。直隸籌辦水利。通計實需銀兩若干。幾年可敷辦。

竣著覈算明晰據實奏聞候朕降旨施行。睿皇帝聖訓。

七月初八日奉上諭。本日王念孫奏永定河汛水異漲北岸二三四工及南岸頭工同時漫溢一摺。當即派令玉福馳往查勘矣。前因初三四等日陰雨連綿恐清河至古北口一帶河水漲發降旨令溫承惠前往履勘道路橋梁茲永定河南北兩岸同時漫溢想俱必成爲口門工程緊要自應亟爲堵合。溫承惠著不必來京並不必隨赴差次。卽日馳往永定河將現在漫溢情形先行具奏並駐工督同王念孫迅速堵築完善以期鞏固。所有下游被淹處所遴委妥員詳細查勘如有應行蠲緩撫卹者卽分別具奏。永定河志。

是月十一日奉上諭。昨命乾清門侍衛內閣學士玉福往永定河兩岸查看情形。茲據覆奏南下頭工漫口之外又有南二南六等處北二北三北四漫口之外又有北五北六北七等處。續經漫溢現今南下頭工溜勢直注西南其過水地方田畝不免漫漫等語。又據單開漫口丈尺南岸下頭工一處已有三百餘丈其餘旱口各處通計共有八百餘丈之多自應先將各旱口趕緊堵築堅固再將南下頭工漫口堵合挽回故道方可順流遵軌不致有泛溢之虞。此時工程浩大需費必多著溫承惠卽速前來工次督率李亨特逐一查勘將應須工料銀兩確實估計先期奏請並委員將下游被淹地方應行撫卹之處據實查明需用賑卹銀兩約計數目奏聞候撥。永定河志。

是月溫承惠奏。臣於初八日接據永定河道王念孫稟報永定河南下頭工北二三四工同時漫溢當卽恭摺具奏。初九日欽奉上諭。已恭載初八日。臣卽星馳前進於初十日早行抵工次復接各工報到同時

漫溢情形。隨親赴南下頭工查驗。十號十一號接連一處。口門寬三百餘丈。水深九尺至一丈一二尺不等。已掣全河大溜。南下頭工十一號以下。北下汛八號以下。均已斷流。河身淤爲平地。現飭趕緊盤壩裹頭。以防汕刷。復周歷兩岸。南二工十五號一處。南六工十二號。接連十三號一處。北岸二工十四號。十七號。二十號。四處。北三工七、八、九、十號。四處。又老隄五號。十號。二處。北四工二十一、二十五號。二處。北五工十三號。一處。北六工四、五、十號。三處。十六、七號。各二處。共七處。北七工四號。十號。二處。悉係平工處所。缺口寬五六丈至六十餘丈不等。因南下頭工奪溜。俱成旱口。實因初三、四、五等日。大雨連綿。水勢接續增長至二丈外。實爲從來未有。致漲水高於隄頂。初五日夜。各工同時漫溢。實無捏報情事。查南下頭最係險工。屢次決口之處。土性純沙。隄外早成河形。最難堵合。秋汛正長。勢難施工。且現在旱口多至二十餘處。必須分別緩急。先將旱口確實估計。或止須復還原隄。或加做月隄。分晰開單奏明。趕辦堅實。再堵築漫口。惟該處口門寬三百餘丈。深至丈餘。秋水刷底。恐口門愈刷愈深。須用料物甚多。現在附近地方舊料已購買無餘。新料尙未登場。止可先購漫麻。櫟木等項。俟新料登場。令廳汛迅速購買。再同時漫溢處所。計二十餘處。每處皆積淤高仰。幾與隄平。計應挑引河一百數十里。必須挑挖寬深。方能掣溜。更須料物充足。俟秋汛過後。一氣呵成。立時堵合。方不致糜費帑項。臣已檄調清河道孫樹本。河致府知府李逢亨。來工估辦。至此次河水異漲。通工堵段。在在墊陷欹倚。亟應鑲做整齊。其被淹處所。飭藩司速查辦理。永定河志。

是月。溫承惠奏。南下頭漫口。俟新料登場辦理。業經奏蒙聖鑒。臣於十五日馳回工次。永定河道李亨特。

已於十三日抵任。卽督同該道悉心籌畫。先委妥實諳練之員。分赴各旱口。確實估計。茲據該道核明。開單呈送。臣查兩岸旱口。共計二十五處。寬窄淺深不一。間有盛漲時。汕刷過甚。跌成坑塘之處。辦理難易。亦有不同。謹將各工丈尺銀數。分晰開具清單。恭呈御覽。永定河志。

是月奉上諭。溫承惠奏永定河漫工。先行籌辦旱口情形。據稱兩岸旱口二十五道。估需工料銀三萬一千一百三十兩零。卽於奏明動撥藩庫銀三萬兩內。先行支用等語。永定河南下頭工漫口。正當秋汛。尙難施工。其各處旱口。自應趕緊堵築。現有動撥藩庫銀三萬兩。足敷支用。該督卽應督飭屬員。購集夫料。迅速趕辦。但各處工程。總期永遠鞏固。若因堵築旱口。較易爲力。稍有草率。則一遇盛漲。恐不足以資捍衛。該督惟當悉心綜覈。並責成道員李亨特、孫樹本二人。認真經理。務使工堅料實爲妥。至州縣被水地方。應行撫卹事宜。節經降旨。令溫承惠查明。該督卽須派委妥員。分投查勘。將實在情形及應需銀數。迅速具奏。不可稍有諱飾。永定河志。

九月。溫承惠奏。臣遵旨督辦要工。兩月來晝夜經營。不敢稍懈。督飭清河道孫樹本、永定河道李亨特。率領員弁。集夫購料。分投趕辦。所有堵築旱口完竣。及引河壩工情形。於初六日具奏。隨將水口趕緊進占。一面將兩壩加培厚土。步步結實。以資鞏固。查勘引河。均已一律挑挖深通。口門收窄。溜勢奔騰。卽飭將引河頭挑開。勢若建瓴。分掣大溜。直達中泓。順機乘勢。於初九日午刻合龍。迨申酉之交。龍門大壩已漸次追壓到底。忽風雨交作。秋水搜根。大溜復側注龍門壩內。陡然過水。牽連兩壩。立時蟄陷。臣督同孫樹本、李亨特等。連夜搶護。壩外水勢。仍復洶湧。臣親上龍門大壩。率同守備。指揮兵夫。加料壓土。幸天氣轉

晴月光照耀。自戌刻至初十日卯刻。始得保護平穩。大壩邊埽均已鞏固。全河水勢順軌安流。復歸故道。復差查兩岸旱口各處。補還原隄工程。亦皆堅實。此皆仰蒙皇上洪福至誠默相感召。並賴河神默佑。得以迅速蒞事。永慶安瀾。至大壩後戩業已跟做堅實。一切善後事宜已面屬李亨特詳細查勘稟覈。另奏辦理。永定河志。

嘉慶十六年正月。兵部議奏。據溫承惠奏。永定河南北兩岸。工段縣長。埽壩鱗比。必得添設都司一員。督率經理。臣細查通省營制。有宣化府屬蔚州路西營都司。該營地處偏僻。事務最簡。應請將該都司移駐永定河盧溝橋地方。其應支俸廉等項。均毋庸另議增添。並請將蔚州路把總額缺。即改爲經制外委。奉硃批。參將管轄。其西寧城馬步守兵六十五名。即歸該把總操防。蔚州路把總額缺。即改爲經制外委。奉硃批。該部議奏。欽此。到部。臣等查永定河工段縣長。僅止守備二員。勢難兼顧。今以事簡都司移設。該督係因地制宜。慎重河防起見。應如所奏。奉旨依議。永定河志。

二月。工部議奏。據溫承惠奏。永定河南北兩岸土隄。性係純沙。自嘉慶六年異漲後。更形卑矮。上年七月初。水長奪溜之後。河形益顯淤積。而隄身爲異漲衝刷。更形殘缺卑薄。今春必須大加疏培。以禦大汛。現據李逢亨估計。以上年盛漲水痕爲準。如隄頂高於水面一二尺者。暫緩加培。其隄面過水。及離水僅止數寸者。必須急爲修治。查南岸七汛。北岸八汛。除距河過遠之處。應從緩辦。其臨河緊要處所。或加內外幫。或加高隄頂內戩。或加埽靠。或用好土包淤。又南六工對面老坎。兜灣遏水。有礙新工。應行挑挖。又北四五六等新工處所。被衝順隄溝槽跌塘過大。恐遇盛漲衝刷。隄身喫重。擬於上面添估攔水斜壩。下面

挑挖倒溝。俾免浸注之患。又石景山東岸第九第十十九二十一等號。上年異漲衝塌。應修石工四段。另築攔水壩一道。俾資捍衛。臣親歷詳勘。實係急須辦理之工。再上年水旱各口新工處所。添下埽段較多。本年大汛修防尤爲最要。不特新埽尙須加鑲。卽舊有埽段異漲衝激之後。亦多殘損蟄陷。必須加鑲拆修。正月二十六日奉硃批。工部速議具奏。欽此。臣等查永定河南北兩岸隄工。向無額設加培銀兩。近年雖經該督歷次奏請另案加培。並未普律全修。今據奏自係實在情形。應如所請辦理。永定河志。

七月溫承惠奏。永定河營員弁除都司守備千總把總外。向設經制外委十二名。額外外委四名。兩岸工段縣長每值大汛。應派該弁等率領河兵協同防守。並隨時分委查看各汛工程。惟額外僅止四名。爲數較少。向年在目兵挑選數人。由總督及該道衙門給與外委虛頂戴。俾其率兵防守。呼應較靈。臣因體制未符。當經裁革。第額外人少。旣不敷委用。且遇有經制缺出。又不敷考補。現據永定河道李逢亨稟請添設。臣查永定河南北兩岸十五汛。每汛應設額外外委一名。以資協防。除舊設四名外。應請添設十一名。卽在熟悉工程之目兵內選充。仍在額設兵數之內。所食糧餉亦仍照該汛額設兵目。按名關領。無須另行增添。而差遣足資委用。實於河務有裨。奉硃批依議。永定河志。

嘉慶十七年正月溫承惠奏。永定河三角淀爲全河尾閘。河流向由條河城葛漁城達淀。歸大清河入海。迨後河勢北趨。葛漁城等處淤爲平陸。水由北八工之黃花店下注。近年南淤北漾。每遇大汛。北八工自二十號以上。河流逼近隄根。上年秋汛後。全河大溜忽於九號兜灣側注。逼成橫流。而八號以至二號。又有支河並注。是北八工一汛除頭號外。多係險工。迥異向時形勢。查下口本係以堰作隄。甚爲卑薄。歷年

僅令兵夫修補。並無加培公項。一交大汛。兩水夾隄。無從取土。該工距東安縣城。僅止數里。城郭田廬。均關緊要。似此河勢情形。急須速爲籌辦。當飭永定河道李逢亨。詳細勘估。茲據稟請。自北八工二號。至二十一號頭止。大隄內外幫。分別加高培厚。以資捍衛。然全河溜勢。俱由九號隄根側注。縣長十餘里。若普律全加埽鑲。需費甚鉅。擬於九號迤上對面舊淤河形。挑挖引河。並於九號橫流上游。估做攔水草壩。挑溜東行。復接草壩至十一號。估做圈隄。並做防風。以防水勢泛衍。俾引溜仍歸舊河。又於二號至八號。十二號至二十一號。共做挑水草壩十四道。復儲備料物。以便臨時相機應用。臣復加確覈。均係亟應趕辦之工。謹開具工段丈尺土方銀數清單。恭呈御覽。至下口河勢。漸形高仰。容收工時。親加察看。如有應需疏濬。另籌請旨辦理。永定河志。

是月奉。上諭。據溫承惠奏。永定河下口情形。請加培辦理一摺。永定河下口。近多險工。亟須籌辦。所有加培隄岸。挑挖引河。及接築草壩。土壩等工。共估需銀一萬九千九百餘兩。著照所請。准其於藩庫內動支。該督卽督飭該道分率廳汛員弁。認真修辦。勒限於大汛前一律告竣。毋許稍有草率偷減。務令料實工堅。俾資捍衛。永定河志。

嘉慶十八年六月。溫承惠奏。步軍統領衙門具奏。武清縣民李珍。以永定河下口北九工河隄開口。賀老營河。淤塞致東安武清二縣被水。赴京呈請。補築挑挖一案。奉旨。永定河下口隄工。著交溫承惠遴員踏勘。應否挑築。秉公查辦。欽此。將李珍咨解到。臣隨飭委永定河道李逢亨。率同務關同知田宏猷等。並帶同原告李珍。馳往勘明。查議具詳。臣詳查舊案。及該道等現勘情形。緣永定河下口北九工。向設主簿。

管轄汛務。旋於嘉慶十年前。督臣裘行簡任內。因所管隄堰。無關緊要。奏准將該主簿移駐北岸頭工。以北九工汛務。改歸北七八工兩汛分管。該處舊有隄堰。歷來俱由本汛河兵修理。並無額設歲修錢糧。而全河水勢。向由條河頭迤南葛漁城一帶。達淀歸大清河入海。迨後河勢北趨。葛漁城等處。淤如平陸。水由北八工之黃花店下注。近來南淤北漾。每遇大汛。溜逼隄根。經臣於上年奏准。自北八工第二號至二十號止。將舊有隄堰。一律加培高厚。並挑挖引河。暨添做攔水草壩等工。以挑溜勢。向南直走中泓。自二十一號至二十四號止。長四里有餘。係河身尾閘。逼近母猪泊。爲衆水出路。若將舊有殘缺隄堰。一併接築。並添做埽段。不但需費甚鉅。且水漲時高出隄頂。水落時亦仍由工尾倒漾外幫。又有減河水勢。趨注隄身。腹背受敵。斷難經久。是以據該道詳明。毋庸修築。至賀老營在南岸六工。距天津海口百餘里。悉係高阜之地。若挑挖引河。不但需項甚多。難以興舉。且掘隄放水。該處數百村莊。難免淹浸。是李珍所請。將北九工隄堰補築。並於賀老營挑挖引河之處。均難照辦。復提訊李珍。據稱伊實未深悉該處河道情形。祇因大汛長水。地畝間被淹浸。冒昧赴京呈訴。今蒙道廳帶同查勘指示。業已明晰。不敢再行固執。查李珍未悉河道情形。妄以私見赴京越訴。殊屬不合。應照不應重律杖八十。折責發落。交原籍地方官收管。無任復出滋事。理合將遵旨委員查勘緣由。恭摺復奏。永定河志。

嘉慶十九年閏二月。直隸總督那彥成奏。據永定河道李逢亨稟稱。上年六月。北六工舊隄。因漲水衝缺。經該處賀堯營等村民。以力難補築。稟請動帑辦理等情。隨檢查舊卷。並石刻碑記。內載乾隆二十年前。任總督方觀承。奏請聖駕親臨指示機宜。於北岸六工。賀堯營開隄放水。改爲下口。入沙家淀。會鳳河入

大清河以南坦坡堰爲南隄。北越堰爲北隄。中寬四五十里。任其蕩漾。悉爲散水勻沙地面。查北六工原編二十號。歷來估工。總至八號爲止。緣八號以東。卽接北七工頭號。迤下卽屬下口。原可不必修防。又因八號至十號。可作北七工之挑水壩。每年仍令官兵防守。其餘任其蕩漾。賀堯營村坐落十六號。向不在修防之列。惟因左近村民。圖種河灘地畝。惟恐淹浸。間或集夫修築。以資保護。歷年亦聽其便。現因漲漫塌隄。未使請動官項。致滋糜費。稟請覈示。查該處南有南坦坡堰爲南隄。北有北越堰爲北隄。居中坐落河心。若逢盛漲。水由隄尾倒漾。前後一片汪洋。修之無益。至河內村莊。原應移居隄外。乃小民圖種灘地之利。未免安土重遷。亦止可聽其自爲設法防護。此段隄工。自十號以下。向不在估修之內。自應永遠停修。並禁止村民。不許補築。致遏水道。以省糜費。而重河防。永定河志。

三月工部議奏。軍機處交出直隸總督那彥成奏稱。永定河上年伏秋盛漲。拍岸盈隄。現在石景山石工疊經衝刷。多有脫落。必須補修。加砌石子堰。南北兩岸土工。自嘉慶十六年間。段加培時。逾三載。車馬往來。風雨剝蝕。內幫多有衝刷。外幫多有殘缺。愈形卑薄。三角淀下口。水緩沙停。河底淤高。隄身愈矮。每逢盛漲。水高隄頂。若不擇要加培。均爲可慮。當卽率同各員。周歷查勘。工段縣長。惟擇其必不可緩之工。石景山補修石隄。加砌石子堰。南北兩岸下口。或加培內外幫。或加高隄頂。或築越堰。或做挑水壩。摺節估計。謹開具工段丈尺土方銀數清單。敬呈御覽。奉硃批。工部速議具奏。欽此。臣等查永定河南北兩岸土隄。及石景山石工。自十六年奏明間段加培後。迄今三載。並未興修。此次奏請補修等工。自係實在情形。均應如所奏辦理。奉旨依議。永定河志。

嘉慶二十年二月。那彥成奏。永定河下口之水。向由葛漁城東南。流至三河頭。入大清河。嘉慶六年後。水勢北趨。將鳳河東隄。衝有缺口數處。其水改爲鳳河東隄以外行走。亦歸大清河。節經前任永定河道王念孫等。勘稟毋庸堵築。以資宣洩。上年冬。據該道李逢亨面稟。有馬家口等村民。在鳳河東隄外。私築土堰。應行拆毀。臣以該處缺口。實在應否堵築。土堰應否拆毀。面諭該道。勘明稟辦。茲據該道稟稱。勘明該處缺口。已經寬深。若欲堵築。非四五萬金不可。且缺口適當迎溜頂衝。堵合後。一遇汛漲。必致復被衝缺。仍請毋庸堵築。至下口爲永定河尾閘。今鳳河又係尾閘之尾閘。必須通暢。庶可迅消盛漲。今馬家口等村民。於此處築堰。阻遏河流。是下壅也。下壅卽恐上潰。於全河頗有關係。應卽拆毀等情。查鳳河東隄。自嘉慶六年被衝缺口。迄今十有餘載。水性就下。已成全河尾閘。且地處頂衝。堵築後。必致復被衝缺。應請毋庸堵築。並將馬家口等村民。於鳳河東隄之外。私築土堰。立飭永定河道李逢亨等。卽日親往督毀。以防阻遏。永定河志。

六月。那彥成奏。二十七日。接據永定河道李于培稟稱。二十二日夜。北岸七工。雨大風狂。水勢疊長。黑夜之間。但見中泓水立。有似蛟水。竟不能計丈尺。竭力搶護。無如水勢有增無減。兼之狂風驟雨。人力難施。致北岸七工。二十四號。於二十五日卯時。漫溢二十餘丈。都司謝成浮淌。現在尙無下落。已塌去六十餘丈。全河大溜。直注口門。現在盤做裏頭。並據通判鄭以簡回稱。差人順水查看。水過口門後。卽循隄外減河。及窪處荒地。經行。仍歸本河尾閘。下注東安縣。傍水小村。間有被淹之處。臣不勝驚駭愧悚。查今漫溢之二十四號。向來因係平工。僅止疏濬中泓銀兩。並無歲修搶修之項。惟時屆大汛。該管廳汛及協防各

員雖係暴長蛟水。究屬失於防護。實屬疎玩。相應參奏請旨。臣未能先事豫防。仰聖恩交部議處。現於二十八日赴工確勘辦理。其被淹村莊。俟勘明照例請旨賑卹。二十九日奉。上諭。那彥成奏永定河工漫水一摺。永定河北岸七工二十四號。因二十二日後雨大水長。漫口塌寬六十餘丈。該督現已飭令該管河道趕緊購買料物。並親赴該工查勘。此次永定河漫工。距下口甚近。過口門後。仍循隄外減河。歸入正河尾閘。現在盤做裏頭。著那彥成確實勘明。俟料物購齊。卽相機堵築。復歸故道。其失於防護之專管通判鄭以簡。主簿邱鳳梧。協防同知王履泰。通判單應魁。縣丞汪兆鵬。俱着摘去頂戴。仍留工効力。如堵築迅速。再奏請開復。永定河道李于培。到任甫逾一月。於河務情形。尙未閱歷。著加恩免其議處。那彥成自請議處。亦著寬免。俟漫工堵合。將用過工料銀兩。著落該督分賠十分之三。其被淹村莊。著迅速查明。奏請撫卹。永定河奏議。

七月初五日。那彥成奏。永定河北岸七工二十四號。因暴漲漫溢。臣於上月二十八日。自省城起程。次日馳抵履勘。該處距下口甚近。水勢側注河身。大溜掣入口門後。仍循隄外減河。歸入正河尾閘。先據報。蟄陷六十餘丈。及赴勘時。暴漲消落。現在口門業已掣涸。僅止四十餘丈。土性堅實。俱無汕刷。隨測量口門水深一丈七尺。漫口內水深五六七八尺不等。漫口外水深一丈一二尺不等。減河正身。尙無淤高之處。惟正河身因下游淤墊。形成高仰。通長應挑三十餘里。必須實力挑挖深通。方期順軌。日來天氣晴霽。俟稀淤曬乾。卽可先期勘辦。至都司謝成。先於漫溢時被水衝倒。旋即抱住隄邊大樹。得不漂沒。合並陳明。奉硃批。依議。永定河奏議。

九月二十一日。那彥成奏。七工漫口。原寬六十四丈。及八月間。因溜勢掣涸。水口僅寬四十一丈。水深八九尺至一丈七八尺不等。其餘二十三丈。悉成旱口。茲於二十一日。據溫承惠報稱。會同永定河道李于培。自八月二十五日開工後。引河長五千六百九丈。已一律挑完。深通如式。東西兩壩。察看大溜向背情形。以次進占。步步堅實。占占穩固。邊埽後戩。亦隨時鑲做。以資護衛。口門愈收愈窄。溜勢愈刷愈深。自初十日後。測量埽前水勢。已深二丈三四尺至二丈四五尺不等。迨十八日。又陡長水數尺。金頭刷跌愈深。測量竟深至三丈六尺。僉稱此次永定河水勢之大。爲從來未有。於十八日戌刻。西壩陡墊數占。勢甚危險。幸加鑲追壓。不稍停留。西壩甫經平穩。溜勢向東側注。東壩又復陡墊。隨墊隨鑲。亦俱保護無虞。十九日寅刻。將引河開放。卽於卯時合龍。二十日卯刻。已堅實穩固。壩前停淤。全河悉歸故道。理合飛速馳奏。仰紆聖廑。永定河奏議。

十月。吏部議得。直隸總督那彥成奏。永定河向設石景山同知。南岸北岸同知。並三角淀通判。共廳官四員。石景山同知。專管兩岸石工。南岸同知。專管南上南下南二南三南四南五南六共七汛。南七南八南九三汛。則歸三角淀通判管理。北岸同知。專管北上北中北下北二北三北四北五北六共八汛。北七北八二汛。亦歸三角淀通判管理。惟查石景山。向係兩岸石工。均極鞏固。別無要工。南岸同知管理七汛。北岸同知管理八汛。一遇搶險。每致鞭長莫及。至三角淀通判。駐節北七工。管理北七北八兩汛。又須越河經管南七南八南九三汛。勢難兼顧。而北七北八從前平工。近成險要。須專員加意防守。方可不致貽誤。臣與溫承惠及道員廳員等。悉心商酌。不如量爲改移。請將石景山北岸石工。仍歸石景山同知管理。並

添管接連之北。上北中北下北二共四汛。其北三北四北五北六北七北八共六汛。請俱歸北岸同知管理。石景山南岸石工。改爲南岸同知管理。仍管接連之南。上南下南二南三南四共五汛。其南五南六南七南八南九共五汛。請均歸三角淀通判管理。如此酌改。呼應較靈。如蒙俞允。所有石景山同知一缺。查現在務關同知田宏猷。曾任北岸同知。熟悉情形。請將現任石景山同知丁寶洲。與該員田宏猷對調。三角淀通判一缺。查現任滄州通判陳春熙。原係北岸同知。降補工程甚諳。請將現任三角淀通判宋綸光。與該員陳春熙對調。人地均屬相宜。於要工實有裨益。查永定河變遷靡常。今昔平險互異。應如該督所請。撥改管理。至稱現任務關同知田宏猷。請將現任石景山同知丁寶洲。與該員對調。現任滄州通判陳春熙。請將現任三角淀通判宋綸光。與該員對調等語。查田宏猷有降級二案。與調署之例不符。應毋庸議。宋綸光係該督題請調署三角淀通判。應俟奉旨准其調署三角淀通判後。方准與天津府河務通判陳春熙對調。該督違例奏請。應照例罰俸九個月。十二月初三日。奉旨務關同知田宏猷。准其與石景山同知丁寶洲對調。所有那彥成應得處分。著加恩寬免。餘依議。永定河奏議。

嘉慶二十四年七月二十一日。那彥寶奏。臣於二十日行抵盧溝橋。查看南北兩岸石工。均屬鞏固。惟水漲勢未見大落。調取簽簿。與誌椿較對。尙有一丈四尺二寸。大溜湧猛。正在傳詢汛官。適永定河道李逢亨由南岸馳到。稟稱自十八日子時至巳時。河水疊次驟長。至二丈一尺三寸。是日午時。雖漸消落數寸。二十日卯午未三時。又長水二尺一寸。兼之陰雨通宵達旦。兩岸各工。紛紛報險。其南上頭工十四五號。尤爲喫重。大溜側注埽前。十分危急。正在督率文武汛員搶護。竭三晝夜之力。尙未平穩。又據南下南二

南四南五南六北上北中北下北二北三北四北七北八等工。絡繹報險。或水高隄堰。或埽鑲陡墊。卽分飭各汛搶護。十九日戌時。先聞南六南四北八北四同時水過堰頂。隄身潰墊。隨於二十日由南岸馳至盧溝橋。正欲取道北岸。查看各工。接據石景山同知馬金陞署北二工縣丞王庚稟報。該汛二十一號埽前水勢洶湧。全河大溜。直注埽段。於二十日午時。河水漫過隄身。尙未掣動全河大溜。續又據南岸四工二十號報到。河水同時漫過隄身。亦未掣動全河大溜。其二處口門尺寸。現因溜勢猛大。一時尙不能較準。臣當卽飭令該道分飭各工。豫備盤護裏頭料物。一面札調下游兵弁。幫同趕辦。卽親赴該二處查看。俟河水漸落稍定。統歸一處。再酌定章程具奏。二十二日。奉上諭。那彥寶奏永定河北岸二工南岸四工漫溢情形。前因永定河水勢盛漲。特派那彥寶前往查看。茲於二十日午刻。北二南四兩工同時漫溢。著派吳礪那彥寶分投籌辦。吳礪接奉諭旨。迅速先赴北二工。如那彥寶在彼籌堵。吳礪卽速赴南四工勘辦。若那彥寶已赴南岸。吳礪卽駐北岸。辦理北二工。其南四工交那彥寶籌辦。伊二人各帶司員。專辦一處工程。不必會商。各將水勢情形。口門丈尺。及水歸下游淹浸何處。先行查明。各自具摺陳奏。其所需工料銀兩。亦各自約計數目。先行奏明。由部庫撥給。以便籌備料物。定期興工。永定河奏議。

是月二十四日。那彥寶奏。本日吳礪到盧溝橋。與臣公同履勘情形。查北二工南四工初漫之時。原係兩處分流。迨北上頭工漫開。地居上游。大溜奔騰。全歸該處漫口。其北二工南四工俱已斷流。現在無船。難以測量。實在丈尺。約計口門寬三百餘丈。連日晴霽。水勢漸落丈餘。自當次第經理。其趕辦料物。及挑挖引河。業經臣奏明。酌派州縣丞倅等。分投趕辦。其挑挖引河。臣等已令北岸同知張泰運。先往口門下游。

查明河身淤墊段落。分別高低。確切估計。以便奏調各員到齊。即可飭往分段開工。惟北岸上游。土性沙鬆。刻下先應派員於附近處尋覓好土。豫爲運工。以便堵築合龍之用。方能堅固。至兩岸下游。應辦之工甚多。如北二南四乾涸口門。補還原隄。其餘兩岸汕刷殘缺卑薄隄工。均需補築。所需土方高寬丈尺。應先勘估。其衝塌埽段防風。亦須補還。現已飭調永定河道。率同廳汛。逐工估計丈尺。一有確數。即先行趕辦。至漫口以正雜料物爲第一要務。引河亦頗需時日。應請敕下督臣方受疇。札飭署藩司祥泰。迅速派員前來分投承辦。其河水下注漫溢之處。據探水外委等回報。正河大溜。向東南由黃村東安武清一帶地界淹浸。應歸於鳳河入海。尙有一分小溜。斜趨東南。由南苑高米店迤北。衝開牆垣八丈。向西紅門迤南流注。所有下游被淹村莊戶口人數。應由督臣飭屬查明。奏請撫卹。二十五日奉。上諭。據那彥寶奏。永定河北上頭工。水勢漫溢。側注口門約三百餘丈。已掣動大溜七分等語。前因永定河北二南四兩工。同時漫溢。降旨令吳璥那彥寶分往籌辦。現在北岸上頭工。漫口三百餘丈。該工地處上游。旣已掣動大溜。河不兩行。北二工漫口。自己匯歸一處。其南四工漫口。諒必水淺挂淤。此時吳璥不必前往南四工。所有北上頭工漫口。即交吳璥那彥寶二人會同辦理。務同心共計。妥協籌商。以期迅速。歲工所需工料銀十萬兩。已降旨由戶部撥往應用。如有不敷。再行奏請。張裕慶准其帶往。並揀派京察一等司員三人。交伊等一並差遣委用。其丞倅等員。已降旨令方受疇派往矣。李逢亨業已革職。其南四工漫口。易於堵築。著吳璥等即飭知該革員。令往專辦此處工程。以贖前愆。如果愧奮出力。工竣後再行酌量施恩。吳璥等查明口門丈尺。水勢深淺。即速購料豫備興工。每屆五六日。將辦理情形具奏一次。以紓廩注。二十六日奉

上諭吳礲等奏永定河北岸上頭工漫口大溜全歸一處下游各口門俱已挂淤斷流商酌辦理一摺北岸上頭工漫口三百餘丈尙係約計之詞連日晴霽水勢漸消究竟寬深丈尺若干奪溜若干測量確數再行據實具奏其奏請酌派州縣丞倅各員本日復面諭該督飭知委員等迅速赴工以備差委至工需銀兩已由戶部撥銀十萬兩方受疇又飭署藩司祥泰賈銀十萬兩馳赴工次應卽分投購備料物此時吳礲等先將兩面裏頭盤護穩固勿令口門愈塌愈寬一俟料物齊全卽可定期興工永定河奏議

八月初一日吳礲那彥寶奏上月二十六七日兩奉廷寄仰蒙皇上訓示周詳俾有所遵循曷勝感戴其時因撥船俱在下游尙未調到無從測量口門丈尺二十九日撥船牽挽到工臣等隨卽飭令文武員弁赴北上頭工細加丈量計口門原寬四百四十丈今酌擬取直堵築計口門實寬四百二十六丈內已有淤灘長二百餘丈其餘俱係過水口門兩邊水深五六七尺中泓水深六七尺至丈餘不等現在盤做裏頭最爲要務現飭該廳汛趕鑲整齊可無遲誤履勘北上頭工舊隄原係灣曲而下形如弓背此次漫溢衝成缺口若照舊日隄根進築不惟現在兜溜着重且恐將來一遇盛漲尤爲可慮惟有將東西壩頭兩相針對進占時逐漸取直復於壩工後加築堅實好土裹戩與現存兩頭沙堆連成一勢工段旣可節省十數丈河勢亦較前順暢卽新築埽工不致過形著重似亦補偏救弊之一法至南北兩岸各工因此次異漲溜勢猛驟衝成旱口及刷塌隄身不可勝計北二北中汛並南四南二南六等工俱有旱口應卽早爲補築完整並加鑲防風邊埽以備合龍時開放引河得收禦水之益其餘兩岸汕刷殘缺卑薄各隄身亦應一律補修完固並恐新舊湊接之土工一時不能黏齧結實亦須補鑲防風埽段以資抵禦連日天

氣晴明。稀淤漸次曬乾。一俟估計丈尺確實。即將南四工旱口。遵旨交革員李逢亨前往。先行趕辦。其北二工及各處小旱口。並兩岸應加幫隄身邊埽等工。亦責成該革員督率各汛員。妥速經理。統俟該廳汛估報土方埽段丈尺確數到日。卽飭各員趕緊興築。奉上諭。吳璥等奏。勘明永定河北上頭二口門丈尺。酌籌取直堵築壩工情形一摺。昨已有旨。令吳璥馳往東河籌辦堵築漫口事宜。所有永定河漫口。專交那彥寶方受疇二人會辦。著卽照此次籌議章程。妥協經理。約計萬壽前當可合龍。如屆期未能歲工。十月內必可堵築完竣。前由部庫發去銀十萬兩。直隸藩庫又撥去銀十萬兩。是否已可敷用。如尙有不足。那彥寶等酌量奏明。再於藩庫添撥。如藩庫無款可動。卽於部庫請撥。均無不可。其水勢情形及進占成數。自奉旨日爲始。每隔十日具奏一次。永定河奏議。

九月二十三日。那彥寶方受疇奏。臣等恐水澤凝冰。難於措手。親督兩壩文武員弁。晝夜儻辦。二十日。金門僅祇三丈餘。以八十餘丈之河面。收束於三丈金門之內。水勢驟高至四丈五六尺。洶湧異常。兩壩俱形喫重。東壩陡墊數丈。加鑲追壓。甫臻穩固。西壩上水邊埽。又因回溜淘刷。紛紛墊陷。牽連正埽門占。隨墊隨鑲。竭兩晝夜之力。始皆保護平穩。引河均已一律深通。於二十一日丑刻啟放。旋見河水建瓴而下。大溜掣動。壩前水立消丈餘。隨於寅刻合龍。層土層柴。並力搶堵。二十二日午刻。漸次填實。金門斷流。毫無滲漏。查四百二十餘丈之壩工。一百八十餘里之引河。及兩岸數千丈之隄埽各工。將及四十日。得以普律告竣。皆由我皇上睿謨廣運。經始圖成。瀕河黎庶。共樂春臺。謹將大壩合龍。先行奏聞。仰慰聖廑。本日內閣奉上諭。此次堵築永定河北岸壩工。那彥寶督率在工人員。晝夜儻辦。興工以來。將及四旬。全河

挽歸故道。工程鞏固。辦理亦復迅速。那彥寶始終其事。甚爲出力。著交部從優議敘。方受疇往來河干。不能專力督辦。且係本管河工。有疎防之責。功過僅足相抵。著毋庸議。張泰運前令暫署永定河道。在工襄事。尙能稱職。著卽實授永定河道。其餘在工出力人員。著那彥寶再行據實保奏。永定河奏議。

十二月十六日。方受疇奏。永定河南北兩岸。分界立汛。每汛經管河隄。自十五六里至二十六七里不等。惟南岸六工。霸州州判分管。隄長三十里。當日因地處下游。河身寬展。工程平穩。故所管隄工獨長。近年水勢南趨。每逢盛漲。汕刷隄根。在在出險。修防甚爲緊要。該州判上下奔馳。顧此失彼。查永定河隄工險易。今昔情形不同。卽應隨時酌量改移。以裨要工。臣與永定河道詳加商酌。查有南隄九工。霸州淀河巡檢經管。隄工十二里。離河較遠。素無險工。自當酌量調用。請將南隄九工。霸州淀河巡檢移駐南六工。作爲南岸六工。霸州下汛巡檢。經管隄長十五里。原設南岸六工。霸州州判作爲上汛州判。經管隄長十五里。至南九工汛務。事簡工平。卽歸南八工武清縣主簿經管。其移駐之員。應支俸廉役食等項。悉照舊章。毋庸更易。如此酌量移駐。旣與定制並無更張。而於要工益資防護。所有分管隄工。分撥河兵。並南六工上下兩汛。應換印信。及移駐之員。建蓋衙署各事宜。俟命下日。另行題咨辦理。二十日奉硃批。依議。吏部知道。永定河奏議。

續行水金鑑卷第一百四十五

永定河水工程

石景山工程。石景山同知轄巡檢經管。今按永定河奏議。嘉慶二十年。奏准石景山北岸石工。仍歸石景山同知管理。石景山南岸石工。改南岸同知管理。石景山東西石工隄工。舊係工部司員管理。兩岸通編爲天字三十九號。雍正八年。奏歸永定河。設同知經理。乾隆二十八年。始分東西兩岸。東岸長二十三里五分。編二十四號。西岸長十四里。編十四號。四十九年。河道陳琮。以隄工號數。定限一百八十丈爲一里。以便稽核。稟請咨部更正。除南北金溝石工二段。舊例爲一號外。東岸南金溝起。至北岸上頭工交界止。長二十三里九十六丈。編爲二十四號。西岸盧溝橋以北。地勢高阜。舊本無隄。自橋趵南起。至南岸頭工交界止。長十四里。編爲十四號。

東岸第一號。北金溝片石隄。長十丈。南金溝片石隄。長三十丈七尺。雍正九年以前。工部修建。乾隆十七年。築片石戩隄。共長四十丈七尺。第二號。石景山前片石隄。長六十九丈五尺。雍正九年以前。工部修建。乾隆六年。修補片石戩隄。長六十三丈。片石隄。長七丈。大石隄。長十五丈五尺。片石隄。長八十丈。土隄。長八丈。內幫砌片石戩隄。第三號。土隄。長一百三十三丈。大石隄。長四十七丈。雍正九年以前。工部修隄。乾隆元年。廟後大石隄殘缺。修補片石戩隄十五丈。三十四年拆修。改築大石片石戩隄十六丈。內幫片石戩隄一百三十三丈五尺。第四號。大石隄。長七十三丈。雍正九年以前。工部修建。乾隆元年。修補片石隄。

十五丈。三十四年改做十六丈。片石隄長一百七丈。乾隆五年加大石餞隄二十丈。又南接片石餞隄二十五丈。十八年補修片石餞隄五十一丈五尺。雞嘴壩一座長四丈一尺。北極廟前鐵牛一具。第五號土隄長一百八十丈。內幫片石餞隄。隄上橫道通西山煤廠及潭柘戒壇之路。隄身大石包砌。名旱橋。第六號土隄長一百八十丈。內幫片石餞隄。此號內舊大石片石隄長十九丈二尺。乾隆四十六年修築。片石餞隄長二十五丈。五十年修築。片石餞隄長三十丈。第七號土隄長一百八十丈。內幫片石餞隄。第八號土隄長一百八十丈。內幫片石餞隄。攔河土壩一道長八十丈。乾隆三年築。第九號土隄長一百八十丈。內幫片石餞隄。第十號土隄長三十三丈。片石隄長六十丈。片石隄長六十七丈。內大石護隄三十七丈。乾隆元年修砌。片石隄長二十丈。第十一號片石隄長三十四丈。片石隄長五十二丈。乾隆二十三年築。三十年修築大石片石餞隄三十六丈五尺。片石隄長五十四丈。乾隆二十四年接築。土隄長四十丈。內幫片石餞隄。第十二號土隄長一百八十丈。內幫片石餞隄。第十三號土隄長一百三十七丈。石子隄長四十三丈。內幫片石餞隄。第十四號石子隄長一百七十五丈。乾隆二年加築灰頂八十五丈。三年內幫砌大石片石餞隄一百七十五丈。大石隄長五丈。嘉慶六年補還漫缺石隄一段長七丈。高一丈六尺。第十五號大石隄長一百一十五丈。雍正九年以前修建。乾隆四年修補。上有灰頂。上壩臺大石隄六十二丈。上有灰頂。乾隆五年築。片石小餞隄十丈。第十六號石子隄長八十丈五尺。乾隆元年壩臺南砌片石餞隄二十八丈五尺。三年上下壩臺中幫砌片石餞隄五十二丈。十三年補修片石餞隄三十二丈。下壩臺大石隄六十一丈。大石隄長三十八丈五尺。雞嘴壩一座長四丈五尺。第十七號大石隄長三十九丈。

五尺。片石隄長八十八丈。雍正十一年。築餞隄二十丈。乾隆八年。幫片石餞隄長七十丈。大石隄長十丈。片石隄長四十二丈五尺。內加片石餞隄四十二丈五尺。乾隆九年。築攔河壩十二丈。又接砌大石片石挑水壩五十六丈。片石橫隄長十六丈。第十八號。片石隄長二十二丈五尺。內加幫片石餞隄二十二丈五尺。大石隄長一百五十七丈五尺。內幫大石片石餞隄五十丈。第十九號。大石隄長一百八十丈。第二十號。至橋北雁翅止。大石隄長六十丈五尺。接南雁翅石子隄長一百一十九丈五尺。內加幫片石餞隄四十五丈。片石小餞隄三十丈。片石餞隄四十三丈五尺。嘉慶十一年。隄頂上加砌石子堰一段。長十三丈五尺。十二年。隄頂上加砌石子堰一段。長四十四丈五尺。第二十一號。石子隄長一百七十一丈。乾隆四年。修砌片石斜餞六十五丈。土隄長九丈。內幫片石餞隄九丈。此號連下號。嘉慶十二年。隄頂上加石子堰一段。長一百一十丈五尺。雞嘴壩一座。兵鋪一所。第二十二號。土隄長一百八十丈。內幫片石餞隄一百八十丈。嘉慶十一年。隄頂上加石子堰一段。長七十三丈。第二十三號。土隄長一百八十丈。內幫片石餞隄一百八十丈。此號嘉慶六年。補還漫缺石隄一段。長一百八十六丈五尺。高一丈五尺。又添砌月牙壩一道。長三十三丈。高一丈五尺。十一年。隄頂上加石子堰一段。長九十九丈五尺。第二十四號。土隄長九十六丈。內幫片石餞隄九十六丈。嘉慶十二年。隄頂上加石子堰一段。長二十八丈。雞嘴壩一座。西岸第一號。盧溝橋南雁翅起。石子隄長一百八十丈。雍正九年以前。部員修建。乾隆二年。修補九十九丈。七年。修補六十丈。嘉慶六年。稅局後身。補還漫缺石隄一段。長六十八丈。高一丈六尺。十三年。盧溝橋西北雁翅。稅局後身。加砌石子堰一段。長四十三丈五尺。又接連前工一段。加石子堰一段。長五十六丈。

第二號大石隄長一百八十丈。乾隆五年自玉露庵起接連下號修補大石隄共長四百二十丈。嘉慶六年補還漫缺石隄一段長六十二丈五尺高一丈六尺。第三號大石隄長一百八十丈。第四號大石隄長一百八十丈。乾隆十二年築片石戩隄六十二丈五尺。十九年築片石戩隄四十五丈。兵鋪一所。第五號大石隄長一百八十丈。乾隆十五年築片石戩隄五十四丈。二十年築片石戩隄四十二丈。第六號大石隄長一百三十丈。乾隆十六年修補片石隄三丈。土隄長五十丈。第七號土隄長一百八十丈。兵鋪一所。第七號土隄長一百三十丈。第九號大寧村第十號第十一號第十二號後高店第十三號前高店第十四號第九號至十四號地勢高阜尙未建隄今仍接丈分里編號南北兩岸工程南岸同知轄七汛北岸同知轄八汛經管今按永定河奏議嘉慶二十年奏准南上南下南二南三南四共五汛南岸同知管理南五南六共二汛改三角淀通判管理北上北中北下北二共四汛改石景山同知管理康熙三十七年挑河自良鄉縣老君堂舊河口起經固安縣北至永清縣郭家務止長八十二里有奇北岸築大隄自良鄉縣張廟場起至永清縣盧家莊止長一百二里有奇並於舊河口建竹絡壩使水并流東注復自南岸高店村土坡下起至壩止堆接沙隄三十五里連大隄通常一百七十七里四分北岸復自盧溝橋南石隄下起至利垡村南止堆築沙隄二十二里利垡至張廟場大隄五里地皆高阜後於康熙四十年接築連大隄通長一百二十九里二分康熙三十九年因安瀾城河口淤墊遵旨於南岸另挑一河以南岸爲北岸遂自郭家務改河出霸州柳岔口入辛章淀達天津歸海接築兩岸大隄南岸接郭家務大隄尾起至霸州柳岔口止連上共長一百七十九里北岸自盧家莊西何麻子營接大隄起至柳岔口迤東止連上

共長一百八十里。雍正三年，因辛章勝勞一帶，淀河淤墊，有礙清水達津之路，遵旨引渾河別由一道，遂於柳岔口稍北改河，由郭家務挑河，計長七十四里。經永清縣冰窖村東，入三角淀，達津歸海。接築兩岸大隄，南岸自冰窖起，至武清縣之王慶坨止，長四十四里，連上共長一百九十六里九十五丈五尺。北岸自何麻子營起，至武清縣范甕口止，長七十四里有奇，連上共長二百三里六十二丈。兩岸分八工，分隸南北岸同知管轄。其冰窖至柳岔口隄工，遂廢。即今之東西老隄也。雍正八年，因南七北七兩工險要，各分上下汛。十年，北岸以天地、黃、宇、宙、洪、日、月、盈、九、字，分工編號。南岸以辰、宿、列、張、寒、來、暑、往、九、字，分工編號。乾隆三年，接西老隄起，築坦坡堰，至武清縣龍尾止，長四十九里九分。分隸南岸七八工兼管。四年，自北岸六工十六號起，築北隄，至東安縣賀家新莊止，長三十六里五年。又接北隄尾起，築北堰，至武清縣東蕭家莊止，長四十七里一百二十六丈。分隸北岸七八工兼管。十六年，由冰窖草壩改河，以坦坡堰爲南堰，北隄改爲北堰，各分上中下三汛。撥隸三角淀通判管轄。并南北岸七八工舊管之南北大隄，分隸南堰上中兩汛兼管。即今之舊南北隄也。南北兩岸同知，遂止各管六汛。計自石景山同知所管交界起，南岸至南堰上汛交界止，隄長一百五十四里。北岸至北堰上汛交界止，隄長一百五十五里七十二丈。二十年，冰窖河口以北淤成南高北低，仰蒙聖駕臨視，將北六工洪字二十號以下，開隄放水，改爲下口。由沙家淀入海。自河口以下十一里，撥隸南岸六七工兼管。北岸隄工止，長一百六十六里七十二丈。二十九年，刪除舊編天地、黃等十八字，各依本工里數編號。四十三年，河出下口，逆折北趨。北岸六工十九號以上隄身裏外汕刷，因就水勢改洪字十八號出口，俾得向東過流，遂於南岸六工十七號頭，建築

順水壩一道。斜接北岸六工十九號下隄頭。並將北岸六工二十號舊河。一律培築。上接順水壩。下至南隄七工交界編號。共長二十九里。仍隸南六工兼管。南岸六汛隄工。通長一百五十三里。北岸六工編號十八里。連上六汛隄工。通長一百五十三里七十二丈。四十六年。北岸頭工。分爲上下兩汛。調南隄九工汛員。管理北頭工上汛。嘉慶五年。南岸頭工。分爲上下兩汛。十年。北岸頭工上汛。改爲中汛。其上汛以南九工汛員移駐。現在南北分防十五汛。

南岸頭工上汛。霸州州同經管。隄長十七里。分十七號。俱宛平縣境。第一號。隄頭接石景山西岸。十四號工尾。土坡兵鋪一所。謹按。各汛每里立一民鋪。不具載。岡凹村。茨頭村。獨義村。趙新店。第二號。兵鋪一所。稻田村。第三號。兵鋪一所。第四號。兵鋪一所。第五號。兵鋪一所。籬笆房。第六號。埽工四段。兵鋪一所。黃官屯。長洋村。軍留莊。高陵村。第七號。兵鋪一所。張家場。第八號。兵鋪一所。第九號。兵鋪一所。第十號。兵鋪一所。第十一號。兵鋪一所。第十二號。埽工八段。汛署一所。兵鋪一所。朱家岡。第十三號。埽工三十段。兵鋪一所。甄瓦汛房三間。凡甄瓦汛房。俱係嘉慶十八年新蓋。第十四號。埽工三十八段。兵鋪一所。汛房一所。閤仙堡。第十五號。埽工三十二段。兵鋪一所。汛房一所。第十六號。兵鋪一所。第十七號。兵鋪一所。南岸頭工下汛。宛平縣縣丞經管。隄長十一里三分。分十一號。第一號。兵鋪一所。第二號。兵鋪一所。前葫蘆堡村。後葫蘆堡村。第三號。兵鋪一所。第四號。埽工十七段。兵鋪一所。汛房一所。利村。第五號。埽工三十段。兵鋪一所。第六號。埽工三十段。兵鋪一所。汛房一所。下廠村。第七號。埽工三十七段。兵鋪一所。第八號。汛署一所。兵鋪一所。汛房一所。滿洲村。趙家莊。第九號。埽工三十一段。兵鋪一所。汛房一所。公義莊。第

十號。埽工三十一段。兵鋪一所。輒瓦汛房三間。第十一號。埽工二十六段。兵鋪一所。汛房一所。南岸二工。良鄉縣縣丞經管。隄長二十二里七分。編二十二號。一號至二號。七十二丈。宛平縣境。二號七十三丈。至十八號。良鄉縣境。十九號以下。涿州境。第一號。隄頭接南岸下頭工。十一號工尾。兵鋪一所。東石羊村。西石羊村。後石羊村。第二號。第三號。第四號。兵鋪一所。任家營。第五號。第六號。兵鋪一所。第七號。第八號。老君堂村。興隆莊。第九號。兵鋪一所。第十號。埽工二段。務子村。審上村。第十一號。埽工三十六段。兵鋪一所。汛房一所。第十二號。埽工三十七段。兵鋪一所。賈河村。陶村。第十三號。第十四號。金門閘一座。乾隆三年建。北壩臺。埽工十一段。南壩臺。埽工十段。龍王廟前灰堰一道。長十八丈。廟後雁翅埽。長五十丈。汛房一所。辛立莊。鮑家莊。五間房村。第十五號。第十六號。兵鋪一所。第十七號。第十八號。汛署一所。兵鋪一所。官莊村。韓家營。第十九號。埽工二十一段。安瀾亭一座。輒瓦汛房三間。兵鋪一所。古城村。四柳樹村。大興莊。鄧渠村。第二十號。埽工二十五段。兵鋪一所。北蔡李渠村。第二十一號。第二十二號。兵鋪一所。南蔡。

南岸三工。涿州州判經管。隄長二十里七分。分二十號。一號至五號。一百二十丈。涿州境。五號至九號。一百六十三丈。宛平縣境。以下固安縣境。第一號。隄頭接南岸二工。二十二號工尾。兵鋪一所。白家莊。第二號。渠落村。第三號。兵鋪一所。閻常屯。第四號。兵鋪一所。范家莊。第五號。屯子頭。第六號。埽工七段。兵鋪一所。丁各莊。河道汛署一所。第七號。埽工八段。汛房一所。長安城總督防汛署一所。第八號。南定村。第九號。埽工七段。兵鋪一所。汛房一所。南召村。北召村。第十號。兵鋪一所。馬村。第十一號。兵鋪一所。門村。此號舊

減水草壩一座。乾隆三十七年，因壩下減水不順，改向南移五十丈，建灰壩一座。第十二號兵鋪一所。北村第十三號兵鋪一所。西楊村第十四號兵鋪一所。東徐村第十五號兵鋪一所。東楊村。西徐村。南岸同知防汛署一所。此號至十八號。月隄一道，長五百九十丈。乾隆二年築。四十四年，因南北三工兩隄緊束，河身逼窄，奏准展寬，加培舊月隄爲大隄，將舊隄疏通，以暢河流。第十六號兵鋪一所。西它頭村。第十七號位村。第十八號兵鋪一所。齊家莊。相各莊。第十九號兵鋪一所。後西玉村。第二十號。前西玉村。南岸四工。固安縣縣丞經管隄長二十七里七分。編二十八號。俱固安縣境。第一號隄頭接南岸三工二十號工尾。兵鋪一所。官莊。此號上接南岸三工二十號工尾。至本工三號直隄一道，長四百十五丈。乾隆五十一年築。第二號兵鋪一所。第三號埽工二十六段。兵鋪一所。此號至五號。月隄一道，長三百七十九丈。乾隆三十八年築。第四號埽工五段。兵鋪一所。白村。第五號河道防汛署一所。汛署一所。甄瓦汛房三間。東玉鋪村第六號。北街第七號。兵鋪一所。第八號。兵鋪一所。第九號。高家莊。小西湖村。第十號。兵鋪一所。孫郭村。第十一號。兵鋪一所。第十二號。孝城村。第十三號。兵鋪一所。第十四號。兵鋪一所。第十五號。兵鋪一所。第十六號。兵鋪一所。第十七號。兵鋪一所。第十八號。兵鋪一村。第十九號。第二十號。兵鋪一所。知子營。第二十一號。第二十二號。兵鋪一所。第二十三號。兵鋪一所。汛房一所。河津村。第二十四號。兵鋪一所。第二十五號。第二十六號。第二十七號。兵鋪一所。第二十八號。黃垆。南岸五工。永清縣縣丞經管隄長二十四里六分。編二十五號。一號至三號。上段固安縣境。以下永清縣境。第一號隄頭接南四工二十八號工尾。兵鋪一所。辛務村。太平莊。第二號。白垆。第三號。兵鋪一所。南解

家務村第四號孫楊莊北小營第五號北解家務村第六號兵鋪一所順民屯第七號兵鋪一所汛房一所大王莊第八號許辛莊南戈奕村此號至九號月隄一道長五百二十丈乾隆三十年築第九號兵鋪一所曹內管營下七村第十號張家務大孟各莊小孟各莊第十一號兵鋪一所馮各莊第十二號兵鋪一所後仲和第十三號兵鋪一所前仲和第十四號南曹家務北曹家務胡其營此號至十六號月隄一道長五百五十丈乾隆五年築第十五號埽工二十九段汛房一所東桑園第十六號埽工四段汛房一所西桑園第十七號郭家務第十八號兵鋪一所談其營第十九號龍家務此號隄南接西老隄一道經南岸六七工界止霸州牛眼村長五十八里康熙三十九年改河所築排椿隄也第二十號大良村第二十一號小良村此號至二十三號月隄一道長五百丈雍正四年築乾隆三十七年加培第二十二號埽工二十九段兵鋪一所甄瓦汛房三間第二十三號曹家莊第二十四號兵鋪一所臺子莊第二十五號兵鋪一所

南岸六工霸州州判經管隄長三十里編三十號四十三年自本工南岸十七號隄頭起至北岸十九號下隄頭接築順水壩一道並培築兼管之北岸二十號缺口接連至南隄七工之舊北隄交界止連南岸上十六里通長三十里編三十號俱永清縣境第一號隄頭接南岸五工二十五號工尾董家務村官場第二號兵鋪一所賈家務村韓家莊東莊第三號菜園村王佃莊第四號第五號兵鋪一所第六號李黃莊劉總其營胡家莊三間房荆垡楊家莊第七號兵鋪一所第八號兵鋪一所大麻子村東北馬西北馬第九號兵鋪一所第十號兵鋪一所第十一號總督防汛署一所雙營村第十二號埽工十四段汛署一

所兵鋪一所。小麻子莊。佃莊第十三號。埽工十段。汛房一所。第十四號。埽工二十二段。兵鋪一所。減楊村。張先務村。第十五號。魯村。第十六號。第十七號。惠元村。第十八號。埽工十段。汛房一所。辛莊東西鎮。大黃村。第十九號。第二十號。兵鋪一所。沈家莊。小營村。第二十一號。龐各莊。陳佃莊。第二十二號。第二十三號。馬家鋪。韓家莊。第二十四號。兵鋪一所。小惠家莊。王虎莊。小黃村。第二十五號。大劉家莊。鄧家務。第二十六號。窩窩村。第二十七號。小劉家莊。第二十八號。兵鋪一所。冰窖。第二十九號。李奉先村。西武家莊。劉家楊。武家窖。第四里。第三十號。此號順水壩。接南岸十七號頭。今按嘉慶二十四年十二月。奏請將南隄九工。霸州淀河巡檢。移駐南六工。作爲南岸六工。霸州下汛巡檢。經管隄長十五里。原設南岸六工。霸州州判。作爲上汛州判。經管隄長十五里。

北岸頭工上汛。武清縣縣丞經管。隄長十五里。分十五號。俱宛平縣境。第一號。隄頭接石景山東岸二十四號工尾。兵鋪一所。挑水壩八段。埽工十四段。彰義村。第二號。埽工三十七段。兵鋪一所。汛房一所。第三號。埽工三十八段。兵鋪一所。看丹口。第四號。埽工十六段。兵鋪一所。第五號。兵鋪一所。第六號。胡家莊。第七號。兵鋪一所。第八號。埽工十三段。兵鋪一所。第九號。兵鋪一所。第十號。埽工二十一段。兵鋪一所。汛房一所。第十一號。兵鋪一所。第十二號。兵鋪一所。第十三號。埽工十六段。兵鋪一所。甄瓦汛房三間。第十四號。兵鋪一所。立岱。狼岱。第十五號。兵鋪一所。

北岸頭工中汛。武清縣縣丞經管。隄長十六里。分十六號。俱宛平縣境。第一號。埽工二十一段。兵鋪一所。汛房一所。第二號。埽工二十六段。兵鋪一所。第三號。埽工三十七段。兵鋪一所。第四號。埽工十二段。兵鋪

一所。汛房一所。鵝房村第五號兵鋪一所。第六號埽工六段。兵鋪一所。後辛莊第七號埽工三十六段。兵鋪一所。甄瓦汛房三間。老隄莊第八號埽工十七段。兵鋪一所。汛房一所。前辛莊第九號埽工二十一段。兵鋪一所。汛房一所。胡家莊第十號兵鋪一所。太平莊第十一號兵鋪一所。第十二號兵鋪一所。第十三號兵鋪一所。第十四號兵鋪一所。第十五號兵鋪一所。第十六號兵鋪一所。

北岸頭工下汛。宛平縣縣丞經管隄長十六里三分。編十六號一號至九號。宛平縣境。以下良鄉縣境。第一號第二號兵鋪一所。甄瓦汛房三間。第三號汛房一所。馬房村第四號汛房一所。大營村第五號兵鋪一所。皮各莊第六號兵鋪一所。第七號兵鋪一所。第八號兵鋪一所。朱家營此號月隄一道。長六十二丈。乾隆三十三年築。第九號兵鋪一所。王家莊第十號兵鋪一所。前官營此號乾隆四十五年築。月隄一道。長一百十三丈。第十一號汛署一所。小高各莊此號至十三號尾止。月隄一道。長五百一十七丈。乾隆五年築。第十二號埽工十一段。兵鋪一所。汛房一所。北張客第十三號兵鋪一所。大高各莊第十四號兵鋪一所。留各莊第十五號埽工十五段。兵鋪一所。汛房一所。南張客第十六號埽工五段。汛房一所。

北岸二工。良鄉縣縣丞經管隄長二十三里四分。編二十三號一號至四號。良鄉縣境。以下俱宛平縣境。第一號隄頭接下頭工十五號工尾。兵鋪一所。保安莊第二號兵鋪一所。定福莊第三號兵鋪一所。丁村第四號兵鋪一所。梁家務第五號埽工三十二段。兵鋪一所。汛房一所。趙村第六號埽工三十五段。兵鋪一所。南莊子第七號埽工十五段。汛署一所。兵鋪一所。常各莊此號至八號。月隄一道。長一百九十丈。第八號兵鋪一所。第九號兵鋪一所。第十號兵鋪一所。第十一號兵鋪一所。第十二號兵鋪一所。第十三號

兵鋪一所第十四號埽工八段兵鋪一所石垡村此號至十五號頭舊月隄一道長一百丈第十五號兵鋪一所里河村第十六號兵鋪一所魏家莊第十七號兵鋪一所劉家莊此號直隄一道長五十五丈第十八號兵鋪一所西柳村第十九號兵鋪一所麻各莊第二十號埽工三十段兵鋪一所第二十一號兵鋪一所甄瓦汛房三間第二十二號兵鋪一所北莊子村第二十三號兵鋪一所黃各莊

北岸三工涿州州判經管隄長十八里三分編十八號一號至十二號宛平縣境以下固安縣境第一號隄頭接北二工二十三號工尾兵鋪一所辛莊第二號兵鋪一所第三號兵鋪一所此號舊減水草壩一座乾隆二十七年築三十七年閉移於號首建築灰壩第四號兵鋪一所求賢村第五號兵鋪一所第六號兵鋪一所練莊村第七號兵鋪一所甕各莊第八號兵鋪一所第九號兵鋪一所于垡第十號兵鋪一所西胡林村第十一號埽工十四段兵鋪一所汛房一所第十二號埽工三十段兵鋪一所東胡林村第十三號兵鋪一所此號舊月隄一道長一百三十丈雍正三年建第十四號北十里鋪第十五號兵鋪一所汛署一所北岸同知防汛署一所第十六號兵鋪一所南張化村第十七號埽工八段兵鋪一所第十八號埽工十一段兵鋪一所甄瓦房汛三間辛安莊

北岸四工固安縣縣丞經管隄長二十四里九分編二十五號一號至二十號固安縣境二十一號東安縣境二十二號固安縣境二十四五號東安縣境第一號隄頭接北三工十八號工尾兵鋪一所第二號張化村第三號兵鋪一所馬家屯第四號王家屯第五號北張化村第六號兵鋪一所康家張化村第七號曹辛莊第八號汛房一所黑垡村第九號兵鋪一所西押隄村第十號東押隄村第十一號兵鋪一

所第十二號北小店村第十三號兵鋪一所馮百戶營第十四號石家堡郭家務第十五號兵鋪一所石佛寺村第十六號賈家屯第十七號聚福屯第十八號兵鋪一所西化各莊第十九號崔指揮營第二十號東化各莊第二十一號兵鋪一所洪家辛莊第二十二號兵鋪一所梁各莊第二十三號第二十四號兵鋪一所眼照屯第二十五號張家莊

北岸五工永清縣縣丞經管隄長二十一里四分編二十一號俱永清縣境第一號隄頭接北四工二十五號工尾兵鋪一所張野雞莊第二號兵鋪一所宋家莊邱家務第三號紀家莊第四號兵鋪一所王居村第五號池口第六號北戈奕第七號兵鋪一所西營第八號吳家莊第九號韓臺村第十號埽工二十五段兵鋪一所仁和鋪第十一號埽工四段泥安村第十二號兵鋪一所倉上村第十三號兵鋪一所支各莊第十四號泥塘村第十五號汛署一所何麻子營第十六號兵鋪一所姚家馬房村第十七號樓臺村第十八號兵鋪一所盧家莊第十九號張家茹葦村第二十號兵鋪一所王家茹葦村第二十一號兵鋪一所張家莊沈于靳村楊家營

北岸六工霸州州判經管隄長三十里乾隆二十年二十號開隄放水改爲下口以下隄工十里撥隸南岸六七工分管四十三年自南岸六工十七號建築順水壩接至本汛十九號下隄頭河從十九號出口現管隄長十八里編十八號俱永清縣境第一號隄頭接北五工二十一號工尾兵鋪一所柴家莊第二號兵鋪一所董家務第三號苑家莊第四號埽工八段兵鋪一所賈家務村第五號埽工十三段兵鋪一所辛屯第六號小荆堡第七號第八號兵鋪一所此號重隄之東於乾隆二十八年接築月堰一道卽今

北隄隸三角淀屬。四十五年。自本汛大隄八號。接築至北隄工頭。長四十九丈。歸北隄七工經管。第九號。第十號。埽工九段。汛署一所。兵鋪一所。半截河村。第十一號。第十二號。第十三號。兵鋪一所。趙百戶營。第十四號。第十五號。第十六號。兵鋪一所。賀堯營。第十七號。第十八號。

三角淀工程。三角淀通判轄五汛經管。今按永定河奏議。嘉慶二十年。奏准南七南八南九。仍歸三角淀通判管理。其北七北八。改北岸同知管理。南隄北隄。下口之兩岸也。乾隆十六年。南岸七工。冰窖草壩。改河。將南北岸六工以下之南坦坡堰。北大隄北堰。改爲南北堰。各分上中下三汛。隸三角淀通判轄。三十八年。改南北堰爲南北隄。上中下三汛。改爲南北隄七八九工。四十七年。南隄九工汛員。調管北岸頭工。上汛。淀河州判。移駐九工。兼管汛務。嘉慶十一年。北隄九工汛員。調管北岸頭工。上汛。原上汛。改爲中汛。其北隄九工隄工。歸北八工兼管。南堰舊名坦坡堰。乾隆三年。築以格淀水。西自霸州牛眼村。接西老隄。起東至武清縣龍尾止。長四十九里九分。八年。於東西老隄工尾。接築橫堰。長六十一丈。十六年。將冰窖以下廢東老隄。連坦坡堰。普律加培。並自龍尾接坦坡堰。築至天津縣青光村止。東老隄自南六工二十八號岔頭起。至橫堰。長十八里八分。坦坡堰接橫堰起。至青光村止。長六十一里十四丈。改坦坡堰爲南堰。分上中下三汛。其南北岸上下七工舊隄。分隸南堰上汛兼管。南北岸八工舊隄。分隸南堰中汛兼管。卽今之舊南北隄。三十八年。南堰改爲南隄。上中下三汛。改爲七八九工。四十七年。南隄九工汛員。調管北岸頭工。上汛。其南九工隄工。以淀河汛員兼管。北堰上段。舊名北大隄。乾隆四年。築。西接北岸六工十六號重隄起。至東安縣賀家新莊止。長三十六里一百二十六丈。五年。自北大隄三十四號。至武清

縣東蕭家莊鳳河邊止。接築北堰。長四十七里一百二十六丈。以禦渾河北漲。至十六年。上段亦改稱北堰。共長八十一里一百二十六丈。分爲北堰上中下三汛。二十年。北岸六工二十號。改爲下口。河循北堰歸沙家淀。二十一年。於北堰之北。築遙堰一道。西自永清縣趙百戶營村。前接北岸六工十六號。重隄起。東至武清縣南宮村北鳳河邊止。長八十四里九丈。二十七年。十八號以下渾流蕩淤十餘里。二十八年。取直接築。共長八十一里九十五丈。是年奏明河出北堰十七號外。循遙堰內行。將遙堰分交上中下三汛經管。又於遙堰之北。築越堰一道。西自永清縣半截河村後。接北岸六工八號。重隄起。東至武清縣劉家莊後止。長四十九里一百二十八丈。三十二年。河出遙堰外行。遂以越堰爲北堰。分交上中下三汛經管。三十八年。改北堰爲南隄。上中下三汛。改爲七八九工。四十五年。北隄七工。工頭西至北岸六工大隄八號。接築北隄。長四十九丈。歸七工經管。嘉慶十一年。以北隄九工汛員。移駐北岸頭工上汛。其北九工隄工。歸北八工兼管。

鳳河東隄。於雍正十一年。築下段。自天津縣韓家樹起。至雙口村止。長十二里。以防渾水東注。乾隆五年。接築中段。自雙口起。至武清縣龐各莊止。長十四里。十九年。調石景山水關外委。移駐經管。並將天津縣韓家樹接東隄尾起。至桃花寺止。築斜堰一道。長七里三十六丈。撥歸外委兼管。二十一年。接築上段。自武清縣陳辛莊起。至龐各莊止。長三十三里九分。通長五十九里一百六十五丈。三十七年。建涵洞二處。洩斜堰以北瀝水。四十六年。因斜堰逼近清河。常被汕刷。改由東隄四十八號起。至天津桃花口北運河西岸止。築斜堰長七里三十丈。其東隄四十九號以下。及舊斜堰均廢。五十六年。鳳河東隄外委。仍歸石

景山管理石工。以濬船把總。經管鳳河東隄工。

南隄七工。東安縣主簿經管。南隄長二十里。編二十號。一號至十八號。中霸州境。以下東安縣境。第一號。隄頭接東老隄橫堰尾。兵鋪一所。牛眼。即柳岔口。第二號。第三號。兵鋪一所。第四號。崔家鋪。信安鎮。第五號。兵鋪一所。馬家鋪。南北城上。第六號。第七號。第八號。兵鋪一所。第九號。兵鋪一所。堂二鋪。何趙鋪。宋家鋪。第十號。王家鋪。第十一號。兵鋪一所。范家鋪。第十二號。第十三號。第十四號。兵鋪一所。董家鋪。黃家鋪。外安瀾城。第十五號。第十六號。第十七號。兵鋪一所。佛城圪塔。第十八號。楊家鋪。胡家莊。第十九號。李家鋪。第二十號。兵鋪一所。樊家鋪。兼管東老隄。長十八里八分。編十九號。一號至十六號。永清縣境。以下霸州境。附隄村莊。莊窠。商人莊。甄家莊。尹家場。張家場。四勝口。三勝口。武家莊。吳家場。朱家莊。趙家場。五道口。唐家鋪。四間房。兼管舊南隄。長二十一里一百四十三丈。編二十一號。一號至十五號。中永清縣境。以下東安縣境。第十五號。汛署一所。附隄村莊。南二鋪。安瀾城。即郎城。柳園村。兼管舊北隄。長十九里十六丈。編二十號。一號至十四號。永清縣境。以下東安縣境。兵鋪五所。附隄村莊。新安莊。趙家樓。開口。惠家場。九家鋪。郭家場。

南隄八工。武清縣主簿經管。隄長二十里。編二十號。一號至六號。二十二丈。東安縣境。六號二十三丈。至八號九丈五尺。霸州境。八號九丈六尺。至十一號四十五丈。靜海縣境。十一號四十六丈。至二十號工尾。武清縣境。今按永定河奏議。嘉慶二十四年。奏將南九工汛務。歸於南八工。武清縣主簿經管。第一號。隄頭接七工南隄二十號工尾。策城。王家圈。得勝口。第二號。寨上。磨汊港。馬家口。第三號。褚河港。于家鋪。第

四號陳家鋪第五號兵鋪一所大黃莊第六號第七號第八號第九號第十號東沽港第十一號兵鋪一所第十二號第十三號第十四號第十五號第十六號兵鋪一所第十七號王慶坨第十八號第十九號第二十號兼管舊南隄長十九里七丈編二十號一號至十四號五十丈東安縣境以下武清縣境兵鋪三所附隄村莊宋流口小范甕口兼管舊北隄長十七里十五丈編十八號一號至十四號三十丈東安縣境以下武清縣境兵鋪三所附隄村莊淘河新村大范甕口鄭家樓

南隄九工原設武清縣縣丞經管隄長二十一里十四丈十二號以下舊係淀池地勢窪下南近大清河北鄰葉淀東逼鳳河下口歷被蕩刷乾隆三十年詳廢止管隄長十二里編十二號一號至四號中武清縣境四號中至工尾天津縣境四十七年武清縣縣丞調管北岸頭工上汛以淀河霸州州判移駐九工兼管汛務嘉慶十二年州判改爲巡檢今按永定河奏議嘉慶二十四年奏准南隄九工霸州淀河巡檢移駐南六工作爲南岸六工霸州下汛巡檢其南九工汛務卽歸南八工武清縣主簿經管第一號兵鋪一所第二號第三號明家場第四號綫兒河第五號兵鋪一所曹家鋪第六號第七號第八號第九號第十號郝家鋪第十一號兵鋪一所第十二號汛署一所安光三河頭杈夫房楊家河青光

北隄七工東安縣主簿經管隄長二十五里三分編二十五號一號至十五號七十二丈永清縣境以下東安縣境第一號隄頭原接北岸六工重隄八號乾隆四十五年接連北岸六工大隄八號築北隄至本工頭長四十九丈兵鋪一所第二號陳各莊第三號兵鋪一所第四號大站此號有月隄一道長八十五丈第五號第六號兵鋪一所第七號東西橫亭第八號兵鋪一所東溜第九號小站第十號劉趙莊第十

一號兵鋪一所。小營第十二號兵鋪一所。堦上此號有月隄一道。長一百六丈。第十三號兵鋪一所。別古莊第十四號第十五號辛立莊第十六號第十七號第十八號兵鋪一所。北馬子莊南馬子莊第十九號張家鋪第二十號兵鋪一所。朱官屯第二十一號第二十二號兵鋪一所。灰城洛圖莊第二十三號第二十四號兵鋪一所。大益留屯小益留屯此號至工尾有土壩五段第二十五號兼管舊北堰原長三十四里。改管二十五里。附隄村莊小賀堯營河西營柳坨第五里村兼管舊遙堰長二十里。甄家莊後第六號村曹家莊胡家莊李家莊。

北隄八工。東安縣主簿經管。原管隄長二十四里七分。嘉慶十八年奏明請廢四里。現管二十里七分。計二十一號一號至十九號八十八丈。東安縣境以下武清縣境第一號崔家莊大鄭莊土壩一道計長十五丈。第二號兵鋪一所。趙家莊濟南屯草壩一道計長十五丈。第三號大小麻莊北崔屯高莊張家莊馬頭村草壩一道計長十五丈。土壩二道計長十五丈。第四號谷家莊大紀莊小紀莊田家莊草壩一道計長十五丈。土壩一道計長十五丈。第五號兵鋪一所。汛署一所。楊官屯金官屯草壩一道計長十五丈。第六號馬神廟莊麻子屯范家莊第七號孔家窪東栗莊艾萬莊史家莊第八號孟東屯屯東莊孫東莊許東莊惠家鋪小鄭莊神家營南關土壩一道計長十五丈。第九號前所營前後羅官屯土壩一道計長十四丈。草壩一道計長十五丈。此號至十一號頭止。嘉慶十七年添築月隄一道長四百二十丈。第十號大馬家莊北崔莊第十一號莊窠東西安莊第十二號邢官營白草窪豐盛店第十三號劉七隄盧七隄響口村第十四號兵鋪一所。八里橋土壩一道計長十五丈。第十五號第十六號第十七號兵鋪一所。落垡

青坨。蠻子營。胡家營。羅古判。解口。東安辛莊。武清辛莊。第十八號。周六營。東安曹莊。第十九號。馬家營。三田莊。草壩一道。計長十五丈。第二十號。包家營。岸胡營。第二十一號。雙廟。南雙廟。眷茲村。楊家營。甄家營。龔家營。李家營。列家莊。黃花店。東張莊。條河頭。

鳳河東隄。把總經管。原長五十九里一百六十丈。原編六十號。並兼管斜堰七里二分。乾隆四十七年。因舊斜堰被清河汕刷。改從東隄第四十八號。接築至天津桃花口。北運河西隄。計長七里三十丈。其四十九號以下隄堰。遂廢。東隄編四十八號。一號至三十七號。一百七十七丈。武清縣境。以下俱天津縣境。淀河汛管轄村莊。附孫家坨。沈家莊。老隄頭。于家隄。葛漁城。穆家口。以上六村。東安縣屬。定子務。石各莊。敖家嘴。梁各莊。西南莊。李各莊。以上六村。武清縣境。

疏濬下口河淀。雍正九年。添設疏濬下口銀五千兩。每年雇募民船民夫。疏撈永定河下節淀池河道。十二年。設三角淀通判。將文安縣左各莊。以東之石溝臺頭。揚芬港。楊家河。至三河頭以下一帶淀河。東子牙新河。撥歸管理。並設武清縣縣丞。東安縣主簿二員。隸通判管轄。以資分理。乾隆三年。三角淀添設堡船二百隻。並添設霸州州同。州判二員。把總四員。外委二十名。杖夫六百名。七年。裁祁河通判。改設子牙河通判。將堡船並員弁杖夫。各半分隸。十年。又添設土槽船二百隻。杖夫六百名。千總二員。亦各半分隸。十一年。又將堡船員弁杖夫。新舊搭配分隸。保定天津兩同知。三角淀子牙河兩通判。經管三角淀通判。分管堡船一百隻。州判一員。千總一員。外委五名。杖夫三百名。並原管縣丞主簿二員。疏通三角淀一帶淤淺。十三年。又裁堡船內之牛舌頭船二十隻。杖夫六十名。十五年。十八河員。俱兼巡檢銜。分管附隄十

里村莊於枯河時調集附隄民夫分段挑挖淤淺按日給與米菜錢文十六年改移下口將三角淀武清縣縣丞調管南堰下汛東安縣主簿調管北堰下汛二十九年因船塋疏濬功效有限糜費實多將塋船並千總外委全行裁汰嗣後河淀工程如需用夫船臨時雇覓其淀河霸州州判一員仍循其舊三十七年添設濬船三角淀通判分管五艚船四隻並三艚船三十隻並器具督率霸州州判並調格淀隄把總一員添設船外委二名撥兵管駕疏排下口淤淺以暢河流又將北隄七八兩汛兼管之廢北堰五十六里七分並附隄村莊十二處撥隸霸州淀河州判管轄調撥如遇工大土多照例給價四十六年淀河州判兼管南隄九工汛務移駐三河頭所管廢北隄交還北隄七八兩工兼管村莊十二處仍隸淀河汛專司疏濬四十七年裁汰濬船其州判一員把總一員外委二名仍令督率兵夫隨時疏濬下口河淀嘉慶十二年淀河州判改爲巡檢濬船把總改管鳳河東隄

疏濬中泓乾隆十五年兩岸歲修項下奏准添設銀五千兩疏濬中泓如有餘剩卽留爲下年之用如或不足前後通融辦理並奏准十八汛河員皆兼巡檢銜分管附隄十里村莊勘明應挑中泓淤灘於河枯時調集附隄民夫分段挑挖按日給與米菜錢文三十七年設立濬船一百二十隻除分撥三角淀疏下口外南岸分撥五艚船四十隻三艚船五隻北岸分撥五艚船三十六隻三艚船五隻並器具分交各汛經管撥兵撐駕汛前汛後遇有新淤嫩灘沙嘴乘時撈濬裁截如或工大土多添雇民夫照例給價四十七年因濬船已滿十年例應再行排造奏請裁汰以省糜費如遇應行疏淤之時飭令廳汛雇募渡船民夫同河兵實力妥辦以上皆永定河志

